



Broj: 01/1-02-196/21

Ilijaš, 04.02.2021. godine

**ZAPISNIK**

sa 2. sjednice Općinskog vijeća Ilijaš, održane dana 04.02.2021. godine, sa početkom u 10:00h.

Sjednicom Općinskog vijeća Ilijaš predsjedavala je predsjedavajuća Općinskog vijeća g-đa Alma Omerović.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	ALMA OMEROVIĆ
2	ANEL BUMBULOVIĆ
3	MEHMED SINANOVIĆ
4	ELMA MASNOPITA
5	ALEN HASKOVIĆ
6	ALEN ARNAUTOVIĆ
7	ADEM ALIĆ
8	HALID DIZDAREVIĆ
9	SEID BEKTIĆ
10	KENAN HASIĆ
11	SEMIR DEDIĆ
12	DENIS DILBEROVIĆ
	<b>NIP</b>
13	VERNESA BEŠLIJA
14	ALMIR ŠPIODIĆ
15	KENAN BUZA
16	DINO ČUSTOVIĆ
17	ADNAN ABADŽIJA
18	AMINA RAMIĆ
19	MEHO HIDO
20	ALEMA DŽAFO
	<b>SDP</b>
21	ALAN ŠERAK
22	ANELA SUBAŠIĆ
23	SELMA BARIĆ
	<b>SBB</b>
24	AKIF BEŠLIJA
25	MUHAMED HANDŽIĆ

Prisutni gosti:

1. Aida Muratović - Radio Ilijaš
2. TV Vogošća
3. Mirsad Kurspahić - komandir PS Ilijaš
4. Emir Dedić - pomoćnik komandira
5. Denis Kahriman - predstavnik Uprave za šumarstvo

Ostali prisutni:

1. Akif Fazlić – općinski načelnik
2. Nijaz Spahić – pomoćnik načelnika
3. Sanja Zagorac-Jozić - pomoćnik načelnika
4. Merima Osmanović - pomoćnik načelnika
5. Nizama Mališević - pomoćnik načelnika
6. Ilda Kahriman – sekretar OV-a Ilijaš
7. Muamer Mešetović - šef odsjeka za dozvole
8. Jasmin Šuvalija - Stručni saradnik operativnog centra i koordinator za deminiranje u Službi civilne zaštite
9. Enisa Mešetović - stručni saradnik za obrazovanje, pitanje mladih i NVO sektor
10. Dženan Suša – IT administrator
11. Maida Habibović – zapisničar

Nakon intoniranja himne, predsjedavajuća je konstatovala da je prisutno svih 25 vijećnika, da postoji kvorum za odlučivanje, te otvorila 2. sjednicu OV-a Ilijaš.

Zatim je predsjedavajuća dala na razmatranje zapisnik sa 1. sjednice OV-a.

Primjedbi na Zapisnik nije bilo, pa je OV-e jednoglasno usvojilo Zapisnik sa 1. sjednice OV-a.

Predsjedavajuća je potom pročitala predloženi dnevni red za 2. sjednicu OV-a Ilijaš i isti dala na razmatranje.

**AKIF FAZLIĆ** - općinski načelnik

Ispred predlagača, tačku 7. Prijedlog Odluke o odobravanju i izdvajanju novčanih sredstava iz budžeta općine Ilijaš za RVI 100% I grupe-paraplegičare ćemo povući sa dnevnog reda. Ovu materiju ćemo definisati kroz Odluku o izvršavanju Budžeta Općine Ilijaš i ona će praktično biti u formi kako je i data na današnju sjednicu Vijeća. Također, predlažem da pod tačkom 7. uvrstimo Prijedlog Odluke o izmjenama i dopunama Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademske 2020/2021. godini. Ova Odluka je proizašla iz rezultata Konkursa koji smo imali za stipendije za ovu narednu školsku i akademsku godinu. Rezultati su pokazali da imamo znatno veći broj učenika i studenata u odnosu na osnovni Plan koji je dostavljen za stipendiranje u ovu narednu školsku/akademsku godinu i naša želje jeste da svim tim učenicima i studentima koji su ispunili kriterije omogućimo da dobiju stipendije kroz Budžet Općine Ilijaš za 2021. godinu i zbog toga je ovaj prijedlog Odluke koji omogućava da taj znatno povećani broj učenika i studenata koji su ispunili uslove da se nađu u finansiranju, odnosno da se nađu u mogućnosti da dobiju stipendiju.

ALAN ŠERAK - vijećnik SDP-a

Vezano za 3. tačku dnevnog reda Informacija o stanju sigurnosti na području općine Ilijaš za 2020. godinu. Praksa je da Informacije uvijek budu na kraju dnevnog reda. Ne znam zašto smo sada predvidjeli da bude na samom početku dnevnog reda.

ALMA OMEROVIĆ - predsjedavajuća

Ako se ne varam, mi smo imali diskusiju po pitanju dolaska gostiju kada je u pitanju tačka dnevnog reda i ispravite me ako griješim, i vi ste kolega govorili da goste trebamo pomjeriti na početak kako ne bi čekali čitavu sjednicu Vijeća.

ALAN ŠERAK - vijećnik SDP-a

To se odnosila kada nam gosti dolaze sa strane da to ispoštujemo. Ovdje se radi o ljudima koji rade i egzistiraju u Općini Ilijaš. Za ubuduće tretirajte da Informacije ljudi koji dolaze iz Ilijaša budu na kraju dnevnog reda, osim kada imamo nekoga sa strane, uvažit ćemo tu činjenicu i staviti Informaciju na početak dnevnog reda.

ALMA OMEROVIĆ - predsjedavajuća

Slažem se i neka to ubuduće bude praksa.

Obzirom da prijedloga i primjedbi na predloženi red više nije bilo, OV-e je jednoglasno usvojilo sljedeći

#### DNEVNI RED

1. Vijećnička pitanja i inicijative
2. Izvještaj o realizaciji zaključaka sa 1. sjednice Općinskog vijeća Ilijaš
3. Informacija o stanju sigurnosti na području općine Ilijaš za 2020. godinu
4. Prijedlog Odluke o davanju mišljenja na Godišnji plan realizacije šumskoprivredne osnove
5. Prijedlog Zaključka kojim se usvaja Izvještaj o rješavanju upravnih predmeta u Jedinstvenom općinskom organu uprave općine Ilijaš za 2020. godinu
6. Prijedlog Programa rada Općinskog vijeća Ilijaš za 2021. godinu
7. Prijedlog Odluke o izmjenama i dopunama Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademske 2020/2021. godini
8. Nacrt Odluka o
  - a) usvajanju Regulacionog plana "Apartmansko naselje Doci"
  - b) provođenju Regulacionog plana "Apartmansko naselje Doci"
9. Prijedlog Odluke o pristupanju izradi Regulacionog plana "Apartmansko naselje Mrakovo II" Ilijaš
10. Prijedlog Odluke o visini bazne cijene za određivanje naknade za uređenje građevinskog zemljišta na području općine Ilijaš za 2021. godinu
11. Prijedlog Odluke o utvrđivanju prosječne konačne građevinske cijene 1 m<sup>2</sup> korisne stambene površine u stambenoj izgradnji na području općine Ilijaš za 2021. godinu
12. Prijedlog Odluke o izmjeni i dopuni Odluke o potvrđivanju rezultata izbora za predsjednika i članove Savjeta mjesnih zajednica na području Općine Ilijaš

13. Prijedlog Odluke o davanju saglasnosti za zaključenje Anex-a Ugovora o kreditnoj liniji uz regresiranje ukupne kamatne stope (profitne marže) u 2020. godini, br:01/2-11-1510/20 od 30.07.2020. godine
14. Prijedlog Odluke o povjeravanju vršenja poslova Pravobranilaštva Kantona Sarajevo za 2021. godinu
15. Prijedlog Odluke o prestanku važenja Odluke o neposrednoj pogodbi za prodaju neizgrađenog građevinskog zemljišta
16. Prijedlog Odluke o utvrđivanju raspona cijena za neizgrađeno građevinsko zemljište prema zonama građevinskog zemljišta u općini Ilijaš za 2021. godinu
17. Prijedlog Odluke o neposrednoj pogodbi za prodaju neizgrađenog građevinskog zemljišta k.č.br. 760/25 Srednje
18. Prijedlog Rješenja iz imovinsko-pravne oblasti, broj: 06/1-27-3414/20 od 22.01.2021. godine
19. Informacija Službe Civilne zaštite o protivminskim akcijama i mjerama zaštite i spašavanja za 2020. godinu.

#### AD-1

#### Vijećnička pitanja i inicijative

DENIS DILBEROVIĆ - vijećnik SDA

Inicijative:

1. Pokrećem inicijativu prema BH Telecomu za rješavanje problema internet konekcije na području Mjesne zajednice Dragordi i Gajevi.

Obrazloženje: Roditelji i djeca OŠ Srednje su se obratili sa zahtjevom za rješavanje problema slabe internet konekcije na području Gajeva, Vrutaka, Sudića, Dragorada, Donjeg Sela i drugih ruralnih mjesta ovog područja gdje je vjerovatno zbog slabe opreme 3G i 2G internet jako spor. Poseban problem je odvijanje on-line nastave. Da bi ovi učenici imali podjednake šanse i priliku da pokažu svoje znanje, te da bi nastavnici imali realnu sliku prilikom ocjenjivanja, potrebno je što prije unaprijediti kvalitet interneta na način da se na baznoj stanici pojača oprema ili da se izvrši prebacivanje na 4G mrežu.

2. Pokrećem inicijativu prema Ministarstvu saobraćaja Kantona Sarajevo za registraciju autobuske linije Dradoradi-Sarajevo.

Obrazloženje: Građani Mjesnih zajednica Dragoradi i Gajevi su se obratili sa zahtjevom za registraciju gore navedne autobuske linije. Molim vas da izvršite registraciju iste, jer ona se u praksi saobraća od 2005. godine.

3. Pokrećem inicijativu prema Ministarstvu saobraćaja Kantona Sarajevo da se urgentno provjeri zašto se redovne linije gradskih autobusa ne odvijaju za Crnu Rijeku (Kamenicu), te da hitno počnu saobraćati, obzirom da bi po nekim naznakama djeca trebala u narednom periodu početi sa redovnom nastavom, a i radnici ispaštaju zbog naredovnih linija. Naime, građani Crne Rijeke (Kamenice), obratili su se sa problemom koji se često dešava, a to je da autobuske linije gradskog prevoza izostanu, tako da putnici ostaju čekati i po tri do četiri sata na slijedeću liniju. Najčešće izostajanje autobusa je ujutro 06:30 h i popodne linija sa polaskom u 13:30 h. Urgentno traže rješavanje problema, a naročito jer i učenici završnih razreda osnovne i srednje škole kreću sa redovnom nastavom. Naravno, ova linija je vezana za sve učenike koji vozare sa tzv. "Gornjeg kraja općine"

(Kamenica, Nišići, Čevljanovići, Srednje i Ljubina). Smatramo da GRAS ili Ministarstvo saobraćaja Kantona Sarajevo ili neko drugi ko je nadležan, mora da obezbjedi jedna prava svim građanima i djeci ovog Kantona.

4. Pokrećem inicijativu prema RTV BiH da obezbjedi TV prijem/signal na području Mjesne zajednice Gajevi.

Obrazloženje: Građani Mjesnih zajednica Dragoradi i Gajevi su se obratili ovom inicijativom i mole nadležne službe da riješe navedeni problem i pitaju kako je moguće da je RTV BiH duži niz godina naplaćivala uslugu koju nije ni pružala.

5. Pokrećem inicijativu prema JKP "Sarajevo-šume" da obezbjedi građanima Kamenice i svih naseljenih mjesta "Gornjeg kraja općine" mogućnost otplate ogrijevnog drveta "na panju".

Obrazloženje: Naime, stanovnici Kamenice i tzv. "Gornjeg kraja" imaju dugogodišnji problem da se kroz njihovo selo izvoze velike količine ogrijevnog drveta, te da većina stanovništva ima trektore i mehanizaciju, te bi sami mogli realizirati svoj ogrijev bez plaćanja sječe i dovoza. Npr. da vam dovezu drva u Kamenicu, morate dati od 100-200,00 KM za prevoz, a u ostalim mjesnim zajednicama na području Općine Ilijaš data je mogućnost uplate i sami da odsiječete i dovezete ogrijev i smanjite troškove stanovništva. Međutim, ja mislim da je ovo slučaj na čitavom "Gornjem kraju", a ne samo u Kamenici.

SEID BEKTIĆ - vijećnik SDA

U naselju Gornja Karaula stanovnici imaju problem snadbijevanja električnom energijom. Ukoliko uključe dva ili više aparata u kući, dolazi do iskakanja sklopke.

Inicijative:

1. Tražim da mi se dostavi informacija u kojoj je fazi postavljanje i puštanje u rad trafo stanice u naselju Gornja Karaula?

Pokrećem inicijativu da se postavljanjem trafo stanice tehnički omogući adekvatno snadbijevanje električnom energijom svih stambenih objekata u naselju Gornja Karaula, te da se ne pristupa parcijalnom rješavanju problema snadbijevanja električnom energijom.

2. Pokrećem inicijativu da se postave horizontalni usporivači saobraćaja u ulici Moševačka na regionalnoj cesti R445 kod firme "Hodžex" kako bi se omogućilo bezbjednije uključivanje u saobraćaj za učesnike koji dolaze iz ulice Žrtava genocida u Srebrenici na regionalnu cestu R445.

Obrazloženje: Gore pomenuta raskrsnica je jako nepregledna, a regionalna cesta jako frekventna, te se na istoj vrlo često ne poštuje postojeća vertikalna signalizacija, u smislu dozvoljene brzine kretanja. Horizontalni usporivači bi doprinijeli bezbjednosti učesnika u saobraćaju, te smatram da su opravdana rješenja.

3. Pokrećem inicijativu da se postave zaštitne bankine na mostove na području općine Ilijaš.

Obrazloženje: Zbog učestalih saobraćajnih nesreća, slijetanja vozila sa ceste, potrebno je

preventivno djelovati i izvršiti postavljanje zaštitnih bankina na slijedjećim mostovima (ovdje sam gledao da su to mostovi na regionalnoj cesti, a kolege vijećnici mogu i sa gornjeg kraja da predlože):

1. Malešićki most (regionalna cesta R445)
2. Most preko rijeke Misoče u Starom Ilijašu (regionalna cesta R445)
3. Most na Gnionici (regionalna cesta) R445)
4. Most na rijeci Stavnja (regionalni put R445)
5. Most na rijeci Bosni u MZ Ljubnići.

KENAN HASIĆ - vijećnik SDA

Inicijative:

1. Ispred Kluba vijećnika OO SDA Ilijaš i u svoje lično ime, pokrećem inicijativu da se uvede nova autobusna linija koja bi saobraćala na relaciji Kadarići-Ilijaš. Inicijativu pokrećem nakon konsultacija sa građanima Kadarića, te nakon uvida u trenutnu situaciju.

Obrazloženje: Nakon razgovora sa građanima i prikupljanja podataka, uvidio sam da se javila potreba za uvođenjem nove autobusne linije, iz naselja Kadarići trenutno u OŠ "Hašim Spahić" Ilijaš idu 52 učenika. Time zaključujemo da ima veći broj od potrebnog kako si se uvela nova linija. Djeca prilikom dolaska i vraćanja iz škole moraju da pređu most, prugu i magistralnu cestu sa tri trake, a postojeći semafor i pješački prelaz nisu u 100% funkciji. Kadarići su veliko naselje, tako da bi se obezbijedila 2 ili 3 mjesta za čekanje autobusa (stajališta).

2. Ispred Kluba vijećnika OO SDA Ilijaš i u svoje lično ime, pokrećem inicijativu da se obilježe javna parking mjesta/prostori na području Ilijaša.

Obrazloženje: Nakon razgovora sa građanima i prikupljanja podataka, te uvidom na licu mjesta, događaju se situacije da određeni građani nepropisno parkiraju, te zauzmu "dva parking" mjesta, iako nisu ocrтана. Zbog boljeg iskorištavanja parking prostora i zbog olakšavanja posla policijskim službenicima, pokrećem inicijativu da se ocrтаju parking mjesta na svim javnim parking površinama, te da se završi ocrтavanje parking mjesta u ulici Ivana Franje Jukića koje je započeto u 2019. godini. Također, prilikom ocrтavanja parking prostora, treba voditi računa o mjestima za invalide, itd.

3. Ispred Kluba vijećnika OO SDA Ilijaš i u svoje lično ime, pokrećem inicijativu vezano za temu lošeg održavanja Javne rasvjete na području općine Ilijaš. Znači, da se općina Ilijaš obrati jednim pozivom, aktom, kako bi im se skrenula pažnju na loše održavanje javne rasvjete. U mandatu predsjednika MZ Ilijaš Grad, prijavljivao sam 10 puta isto rasvjetno tijelo koje još uvijek nije popravljeno. Firma koja održava javnu rasvjetu i prijavni centar Kantona Sarajevo očito da ne rade svoj dio posla, barem prema općini Ilijaš, kako treba. U kontaktu sa svim predsjednicima mjesnih zajednica, koji su na sebe uzeli teret prijavljivanja rasvjetnih tijela koja ne rade, zaključili smo da ekipe zadužene za redovno održavanje nisu radile svoj dio posla kako treba na području Ilijaša.

Obrazloženje: Ekipa JKP "Park" Sarajevo je zadužena za održavanje javne rasvjete na području Kantona Sarajevo. Prilikom prijave kvarova, rečeno nam je da će ekipe doći u najkraćem roku. Zadnji dolazak ekipe iz JKP "Park", a na poziv Mjesne zajednice Ilijaš Grad, bio je u septembru mjesecu.

Prijavni centar zaista više nema ni smisla zvati iz razloga što svaki put uposlenice uzmu iste podatke, a nikada se ne riješi dati problem. Pokrećem inicijativu da se ovaj problem riješi, da se skrene pažnja na naše nezadovoljstvo, te da su građani spremni pokretati tužbe/žalbe.

Ovako je u ovoj mjesnoj zajednici, a mogu misliti kako je u drugim mjesnim zajednicama na području općine Ilijaš. To bi bilo i jedno pitanje prema Službi za održavanje javne rasvjete i naravno inicijativa da se to stanje popravi.

ALMIR ŠPIODIĆ - vijećnik NIP-a

Neću sve inicijative čitati, a iz razloga da ostavimo prostora i ostalim kolegama da i oni mogu iznijeti svoje mišljenje. Ono što bih sugerisao, a jako su mi se svidjele inicijative vijećnika Denisa Dilberovića i mislim da ove inicijative vezano djecu i autobuske linije trebamo ići sa jednim zaključkom, jer je to jača forma nego sama inicijativa. Znači da donesemo Zaključak, jer je to zaista gorući problem, a i mojim kolegama sa "gornjeg kraja" su to građani prijavljivali.

Jednu inicijativu, ipak, moram pročitati, čisto da se zna.

Inicijativa:

Na osnovu Statuta Općine Ilijaš ("Službene novine Kantona Sarajevo", br.20/09, 46/18 i 7/19), člana 25. i 26., grupa vijećnika u skladu sa Statutom podnosi inicijativu:

1. Pokrećemo inicijativu za raspisivanje referenduma za poništavanje postojećih općinskih akata vezani za mjesne zajednice, raspuštanje trenutnog saziva savjeta mjesnih zajednica, te izrada općinskog propisa i akata za uspostavu demokratskog i zakonitog procesa izbora u savjetima mjesnih zajednica uz reforme mjesnih zajednica sa prilagođenim brojem mjesnih zajednica.

Zakonski okvir:

Zakon o principima lokalne samouprave FBiH i Zakon o lokalnoj samoupravi KS propisuju referendum po istom principu po kojem to propisuje Statut Općine Ilijaš član 25. i to raspisivanje istog u skladu sa članom 26. stav 1. na način da minimalno 1/3 ukupnog broja izabranih vijećnika predloži raspisivanje istog. O inicijativi, Općinsko vijeće Ilijaš, dužno je odlučiti glasanjem uz prethodno provedenu diskusiju.

Obrazloženje: U razgovorima sa stanovništvom sa područja cijele općine i sami smo uvjereni da je građanski model učešća građana u vlasti oslabljen ili nedemokratizovan, te da je zakonski okvir koji definiše izbor savjeta mjesnih zajednica neustavan i nezakonit, jer krši Izborni zakon BiH, Zakone o lokalnoj samoupravi FBiH i Kantona Sarajevo, te Statut Općine Ilijaš. Primjer svemu navedenom je tačka 12. dnevnog reda na današnjoj sjednici, gdje se u obrazloženju kaže da savjet mjesne zajednice predlaže člana savjeta mjesne zajednice prilikom istupanja izabranog člana iz savjeta. Imajući na umu koliko je važno da svi mi ustvari oslikavamo stvarno stanje među stanovništvom općine Ilijaš koje nas je, uostalo, i izabralo da ih parlamentarno zastupamo u Općinskom vijeću Ilijaš, ubjeđenja smo da bi u ovom konkretnom slučaju ne komuniciranje ovog problema i zanemarivanje povratne informacije od samih građana bilo poražavajuće za demokratsko društvo i društvo jednakih šansi koje gradimo i svakodnevno se trudimo popravljati. Sveukupna zakonska i objektivna opravdanost inicijative za izmjene izbornog procesa u savjetima mjesnih zajednica, a imajući na umu kako je ovo pitanje isključivo u nadležnosti onih kojima izmjena modela izbora i funkcionalnost mjesnih zajednica najviše donosi,

smatramo obaveznim konsultirati mišljenje većinskog stanovništva općine Ilijaš. Kako su odredbama na osnovu kojih su provedeni posljednji izbori za savjet mjesnih zajednica jasno povrijeđeni gore navedeni zakonski propisi, te je isti izbor učinjen invalidnim, uz raspisivanje referendumskog pitanja, obavezni smo, kao OV-e Ilijaš, izglasati i raspuštanje postojećih savjeta mjesnih zajednica do provođenja novih demokratskih izbora. Referendumsko pitanje treba ponuditi izbor volje građanima u smislu potreba za izmjenom propisa i akata, a koji regulišu izbor savjeta mjesnih zajednica u smislu poništavanja Odluke koja propisuje izbor predsjednika i savjeta zatvorene liste, te poštivanje Zakonskih propisa FBiH i KS, te Statuta Općine Ilijaš član 86. i Izbornog zakona BiH, a sve prema građanskoj inicijativi koja se tiče ovog pitanja sa ove sjednice. Referendarski način je jedinstveni princip, zakonski propisan, koji nam dozvoljava da građani Općine Ilijaš odluče samostalno o ovom pitanju, te da se poštuje princip građanske inkluzije u vlasti, posljedično navedenom grupa vijećnika potpisuje vijećničku inicijativu.

2. Pokrećem inicijativu da se hitno izvrši uređenje školskog dvorišta područne škole Ljubnići, a što podrazumjeva izgradnju dječijeg igrališta i terena za održavanje tjelesnog odgoja učenika.

Obrazloženje: Građani Ljubnića u proteklih nekoliko godina ukazuju na potrebu da se uradi igralište i uredi školsko dvorište područne škole Ljubnići, kako bi učenici koji pohađaju osnovnu školu imali prikladne uslove za održavanje tjelesnog odgoja koji dolikuje 21. vijeku. Roditelji djece iz Ljubnića na sastanku Vijeća roditelja OŠ "Podlugovi", načelnika i vijećnika koji je održan 2018. godine u OŠ "Podlugovi" ukazali su načelniku na problem i tražili da se isti riješi u što kraćem roku, što je načelnik i obećao. Međutim, prošle su gotovo tri godine, a ništa se po ovom pitanju nije uradilo. Očekujem da ova inicijativa bude prihvaćena i realizovana u tekućoj godini. S obzirom na to da će uskoro biti i nacrt Budžeta, ova inicijativa će biti, između ostalog, i prijedlog Naroda i Pravde kroz javnu raspravu za nacrt Budžeta.

2. Pokrećem inicijativu da se hitno izvrši sanacija makadamskog puta prema repetitoru u naselju Sovrle, dok se put ne asfaltira.

Obrazloženje: Građani Sovrla već tri godine imaju problem sa putem koji poslije svake veće kiše bude neprohodan za putnička vozila. Prethodnih godina put su sami održavali dok su ga samo oni koristili. Međutim, problem koji ne mogu samo rješavati nastaje izgradnjom apartmanskih naselja i prolaskom teških građevinskih mašina i kamiona koji dovlače građevinski materijal za izgradnju apartmanskog naselja. Pripremom terena za izgradnju objekata, iskopima i skidanjem humusa, dolazi i do povećanja oborinskih voda koje prouzrokuju oštećenja puta i njegovu kratkotrajnost nakon sanacije. Potrebno je hitno uraditi sanaciju, nasipanje puta i iskop kanala za oborinske vode.

Na prijedlog grupe građana, pokrećem slijedeće inicijative prema nadležnim općinskim službama i Kolegiju Općinskog vijeća.

3. Poništavanje Odluke o uslovima, načinu kandidiranja, održavanja izbora, dodjeli mandata u mjesnim zajednicama i razrješenju predsjednika i članova savjeta mjesnih zajednica broj: 01/I-02-800-8/19 od 18.04.2019. godine i Odluke o izmjenama i dopunama Odluke o osnivanju mjesnih zajednica na području Općine Ilijaš ("Službene novine KS" broj 17/19).



4. Poništavanje Odluke o potvrđivanju rezultata izbora za predsjednike i članove Savjeta mjesnih zajednica na području Općine Ilijaš i Odluke o konačnim rezultatima izabranih lista članova Savjeta MZ-a Općine Ilijaš.

5. Izrada općinskog propisa ili akta izbornog okvira savjeta mjesnih zajednica i reforma broja mjesnih zajednica prema potrebama stanovništva.

Obrazloženje: U proteklom periodu mnogo vremena sam proveo u posjeti i druženju, pa tako i razgovoru sa građanima iz svih dijelova naše prelijepe općine. Ne mogu, a da odmah ne naglasim da svi dijele jedno identično razmišljanje, poražavajuće i zastrašujuće, a ujedno alarmantno, i to da im je zakonski zagarantovano pravo da budu participant u odlučivanju, oduzeto. Prava građana da učestvuju u odlučivanju i raspravama narušeno je i najbahatije uksraćeno zbog političke klime koja je u najmanju ruku autokratska. Autokratska kažem, bez da želim ikoga vrijeđati, ali moram biti senzibilan i izraziti duboko žaljenje zbog situacije u koju smo dovedeni u 21. vijeku iz ko zna kojih razloga, a smo kao društvo u mnogo čemu podbacili. Ono što je gorući problem naroda jeste politička retorika dobrovolje i blaženstva u vremenu kada ovakvim i sličnim postupcima ne težimo ka jačanju uloge mjesne zajednice u društvu, nego unazađujemo demokratičnost društvenog poretka. Inicijacija je direktno vezana baš za ovo obrazloženje, za građane i njihovu inkluziju. Inicijativu koju iznosim, smatram inicijativom svih građana, a tiče se isključivo volje naroda za izmjenu odluke kojom se proces izbora savjeta mjesnih zajednica učinio nelegitimnim, neprincipijelnim, a povrh svega i nezakonitim. Tako, kao jedna od rijekti, možda i jedina općina o kojoj smo upoznati, sveli smo mjesne zajednice i njihovo postojanje u koš političkih obračuna, političke hijerarhije i političkog funkcionerstva, a ne za prostor uključivanja građana u procese odlučivanja na nivou JLS. U osnovi, derogirali smo građanski model mjesnih zajednica i izuzeli iste iz modela građanskih, zasigurno ne predstavljaju tijelo iz zakona koje kaže da je mjesna zajednica oblik neposrednog učestvovanja građana u odlučivanju. Mjesne zajednice Općine Ilijaš možda su funkcionalne po željama pojedinca, ali su nereprezentativne.

Zakonski okvir:

Zakonski okvir osnivanja mjesnih zajednica početno proističe iz Zakona o principima lokalne samouprave u FBiH član 26. i Zakon o lokalnoj samoupravi KS član 37. stav 1. i 2., a definisan je Zakonom o lokalnoj samoupravi KS član 36. stav 1., a onako kako je do definisano Odlukom o osnivanju mjesnih zajednica Općine Ilijaš, načinu provođenja postupka izbora savjeta mjesnih zajednica, sva pravna formulacija u praksi je obesmislena. Nadalje, Izbor savjeta mjesnih zajednica zatvorenim listama protivpravan je i diskriminirajući sa Izbornim zakonom BiH od ovjere i kandidature prema članu 4.1 čime se sprječava kandidatura pojedinca, ali i u pogledu postojanja koalicija, prestanka mandata, prava građana da budu birani i drugo. Ono najbitnije, kao legalist, moram najoštrije osuditi nepoštivanje i nipodaštavanje hijerarhijski najstarijeg dokumenta lokalne samouprave i to Statuta Općine Ilijaš koji u članu 86. stav 2. jasno definiše da legitimno pravo izbora u savjet imaju kandidati koji dobiju najveći broj važećih glasova birača, a koje se uskraćuje na način da se onemogućava pojedinačno glasanje za kandidate, već za liste koje se ni u jednom dijelu navedene odredbe ne spominju. Također, provođenjem izbornog procesa u mjesnim zajednicama kako je to urađeno na posljednjim mjesnim izborima, grubo se krši i stav 6. istog člana i to na način da je uspostavljen nedemokratski princip popune upražnjenih mjesta u savjetu mjesne zajednice, iz razloga što se oduzelo pravo birača, ali i

kandidata za pojedinačno izjašnjavanje o svim kandidatima. Naime, kada neki pojedinac istupi iz savjeta, njegovo mjesto nemoguće je demokratski i pravnovaljano popuniti, jer ne postoji drugi kandidat koji je ostvario bilo kakav izborni rezultat iz razloga što je to pravo uskraćeno svima, pa tako svodimo demokratske procese u ruke pojedinaca ili grupa pojedinaca. Zakonski okvir za provođenje izbora savjeta mjesnih zajednica mora oslikavati zakonodavni okvir Izbornog zakona BiH, proizlaziti iz normativa i propisa FBiH i KS, a biti bazno naslonjen na Statut Općine Ilijaš. Izbor savjeta mjesnih zajednica treba omogućiti kandidaturu pojedinaca i koalicija, iznaći rješenje demokratskog reizbora ili prijevremenog izbora, ali i nadopune savjeta u slučajevima koje zakon tretira. Reforma mora zastupati i interese većine građana, a koji se ogledaju i u vraćanju statusa mjesnih zajednica onim mjesnim zajednicama koje su to imale, ali i uspostava statusa mjesne zajednice onim naseljenim područjima na kojima za to postoji objektivna opravdanost kao što su Kadarići, Han-Popovići, Bioča i Nišići. S obzirom da je trenutni izbor baziran na protivpravnim i neustavnim odlukama Općinskog vijeća, ista je potrebno invalidirati i sve procese proizašle iz istih poništiti.

MEHMED SINANOVIĆ - vijećnik SDA

Inicijativa:

Pokrećem inicijativu prema općinskoj službi da se na svakom javnom parkingu za motorna vozila na području MZ Ilijaš Grad obilježi dva ili više parking mjesta za osobe s invaliditetom, vodeći računa da obilježena mjesta budu što bliže stambenim objektima, kulturno-društvenim objektima i sl. kako bi što je moguće više olakšali pristup pomenutim objektima korisnicima tih parking mjesta.

VERNESA BEŠLIJA - vijećnica NIP-a

Prije nego što pročitam pitanja i inicijative, mislim da nas je trenutno u sali više od trideset prisutnih.

ALMA OMEROVIĆ - predsjedavajuća

Evo sad će izaći kamerman, jer oni su samo došli da uzmu izjave.

VERNESA BEŠLIJA - vijećnica NIP-a

Inicijative:

1. Podnosim inicijativu prema Zavodu za javno zdravstvo Kantona Sarajevo da se postojeći laboratorij u Domu zdravlja Ilijaš osposobi i prilagodi radu na način da se omogući da analize nalaza koji se do sada rade u Domu zdravlja Ilidža, rade u Ilijašu.

Obrazloženje: Svjedoci smo da naši sugrađani svakodnevno rade nalaze za koje nije osposobljen postojeći laboratorij u Domu zdravlja Ilijaš, te su zbog istih primorani da idu u Dom zdravlja Ilidža, a to im iziskuje kako novčane troškove, tako i vremenske. Otvorenjem proširenog laboratorija u Ilijašu, građanima bi mnogo olakšali, posebno iz činjenice slabijeg zdravstvenog stanja ne moraju putovati na Ilidžu.

2. Podnosim inicijativu za postavljanje video nadzora u dječijim parkovima na području Općine Ilijaš.

Obrazloženje: Na području Općine Ilijaš nema mnogo sadržaja gdje bi naši najmlađi sugrađani mogli provoditi svoje slobodno vrijeme i družiti se sa vršnjacima, a i nekoliko postojećih parkova bude redovno uništeno od strane nesavjesnih građana. Postavljanjem video nadzora u parkovima, naša djeca bi bila sigurnija i sačuvali bi postojeći mobilijar.

3. Podnosim inicijativu da Općina Ilijaš u roku od tri godine ukine taksu za istaknutu firmu.

Obrazloženje: Taksu za istaknutu firmu, kao jedan od najpoznatijih parafiskalnih nameta, pravna lica i obrti, obavezni su plaćati početkom svake godine. Naplatom navedene takse, pravna lica i obrti nemaju nikakve usluge i zaista nije jasno koja je svrha plaćanja. To plaćanje ne znači da pravno lice ili obrt ima pravo da koristi vanjski znak za svoju firmu, jer je definisano kroz druge takse koje se plaćaju.

Predlažem da se u roku od tri godine ova taksa ukine. U prvoj godini, iznos takse si se smanjio za 40%, u drugoj 30%, te u trećoj za ostatak od 30% trenutnog iznosa, što bi na kraju dovelo do toga da Općina Ilijaš više ne bi naplaćivala taksu za istaknutu firmu kao parafiskalni namet.

4. Podnosim inicijativu za obnovu porušenog objekta Osnovne škole u MZ Ljubina-selo Korita, a koji će se koristiti kao spomen soba šehidima i poginulim borcima.

Obrazloženje: Svima je dobro poznat doprinos pripadnika Armije R BiH u sastavu čete Korita koji su dali nemjerljiv doprinos u odbrani naše domovine, a posebno rejona Jasen. U neprednoj blizini navedenog objekta nalazi se i spomen obilježje šehidima i poginulim borcima odbrambeno-oslobodilačkog rata 1992.-1995. godina, tako da bi izgradnja spomen sobe činila jednu cjelinu.

5. Podnosim inicijativu da se na raskrsnici u MZ Luka postavi saobraćajno ogledalo radi lakšeg funkcionisanja saobraćaja i smanjenja nezgoda.

Obrazloženje: Raskrsnica prema Bioči i Industrijskoj zoni "Luka" nije adekvatno obilježena saobraćajnim znacima. Do prije određenog vremena nije bilo nikakvog znaka i važno je pravilo desne strane u saobraćaju, a koje većina vozača iz pravca Bioče nije poštovala. Nedavno je postavljen saobraćajni znak "stop", međutim preglednost raskrsnice je jako loša, posebno kada se dolazi iz pravca Industrijske zone i želi skrenuti prema prolazu. Postavljanjem saobraćajnog ogledala na suprotnoj strani uveliko bi se olakšalo učesnicima u saobraćaju i samim tim bi se smanjio broj saobraćajnih nezgoda u tom mjestu.

6. Podnosim inicijativu da se izvrši uređenje otvora na parking u između ulica Kakanjska i Hašima Spahića (tj. između zgrada Kolektivnog centra, zgrade Fazum gradnje i Kakanjska br.17).

Obrazloženje: Mnogi građani automobile parkiraju na navedenom parking u, na kojem ima nekoliko većih otvora. U noćnim satima, kada je smanjena vidljivost, kao i prilikom padavina, kiše i snijega, rupe su neuočljive, te građani ne znajući da postoje iste, nailaze sa automobilima na kojima dolazi do oštećenja. Takođe, na istom parking u u pravcu SŠC "Nedžad Ibrišimović" postoji veće oštećenje uljed čega je skraćen parking prostor.

Pitanja:

Postavljam pitanje za općinskog načelnika Akifa Fazlića.

1. Koliko je ugovora o djelu zaključeno u 2020. godini?

Molim da mi se dostave svi zaključeni ugovori o djelu u 2020. godini, uz napomenu da li su osobe sa kojima su zaključeni ugovori angažovani na poslovima navedenim u ugovoru ili na nekim drugim (npr. održavanje stadiona itd.).

Postavljam pitanje za općinskog načelnika Akifa Fazlića.

2. Ko i na osnovu kojih uslova može sa Općinom Ilijaš zaključiti Ugovor o obavljanju volonterskog rada, radi sticanja prvog radnog iskustva?

Obrazloženje: Svjedoci smo da ima mnogo mladih osoba koje nakon završetka svog visokoškolskog obrazovanja nemaju mogućnost da steknu prvo radno iskustvo u Općini Ilijaš.

Pitanje za JU "KSC i Radio Ilijaš"

3. Nakon okončanja postupka javnog otvaranja pristiglih ponuda po javnom pozivu za postavljanje 18 reklamnih mjesta na stubove javne rasvjete u svrhu promocije političkih subjekata za lokalne izbore 2020. godine, Komisija je konstatovala da je prvorangirani ponuđač odustao od ponude, te uputila prijedlog direktoru JU "KSC i Radio Ilijaš" da Ugovor o korištenju stubova zaključi sa drugorangiranim ponuđačem tj. Strankom demokratske akcije OO Ilijaš po cijeni od 212,00 KM bez PDV-a po jednom stubu.

Pitanje: Da li je Stranka demokratske akcije OO Ilijaš uplatila navedeni novčani iznos i kojeg datuma je izvršena uplata?

Molim vas da mi dostavite kopiju ugovora zaključenog između JU "KSC i Radio Ilijaš" i Stranke demokratske akcije OO Ilijaš, kao i bankovne izvode na kojima je vidljivo kojeg datuma i koji iznos je Stranka demokratske akcije uplatila po osnovu zaključenja ugovora.

4. Pitanje građana MZ Luka

U MZ Luka uspostavljena je kanalizaciona mreža, međutim, nekoliko domaćinstava koja se nalaze na raskrsnici za Ribariće ispod firme "Standard" i na lijevoj strani prema drugom propustu na putu za Bioču, još uvijek nisu prikopčani na istu. Građani postavljaju pitanje kada i na koji način će se to završiti.

Obrazloženje: Kanalizaciona mreža u MZ Luka je uspostavljena, međutim, u zadnjem projektu nekoliko domaćinstava nije priključeno na istu, iako im je predsjednik Savjeta MZ usmeno obećao da će biti priključeni. Nadajući se da će to biti tako, građani već neko vrijeme nisu iscrpavali svoje septičke jame, te se sada javljaju problemi kako za njih, tako i za građane koji čive i prolaze kroz taj dio Luke. Naime, dolazi do prelijevanja vode iz septičke jame, te ista curi na cestu, što higijenski nije dobro.

5. Pitanje građana MZ Misoča

Građani MZ Misoča dobili su informaciju da će u 2021. godini biti planirano asfaltiranje puta od raskrsnice zvane Višak do mjesta Široka njiva u dužini od cca 300 m. Građane interesuje da li će ovim projektom biti obuhvaćeno i rješavanje problema potoka?

Obrazloženje: Potok koji se nalazi pored puta utiče na stanje istog, jer ga potkopava u

dužini od 50-ak metara. Takođe, na tom dijelu nalaze se i dvije kuće koje imaju probleme zbog navedenog potoka. Građani koji žive na tom području predlažu da se ugrade cijevi ili da se betonira taj dio kako bi se trajno riješio navedeni problem. Potporni zid koji je bio privremeno napravljen sada se obrušava na put. Prijedlog je da se uradi betonski zid kao trajno rješenje koje više neće štetiti navedenom putu.

AMINA RAMIĆ - vijećnica NIP-a

Inicijative:

1. Temeljem informacije da je održan sastanak načelnika općina Kantona Sarajevo sa ministricom pravde i uprave, Lejlom Brčić, a povodom uvezivanja kantonalnih registara i integracije podataka općinskog s kantonalnim nivoom, pokrećem inicijativu da se na prvoj slijedećoj sjednici, Općinsko vijeće izjasni o predmetnom programu s obzirom da je načelnik, gospodin Fazlić, najavio da se prije odluke želi konsultovati s Općinskim vijećem.

2. Pokrećem inicijativu da se hitno uradi nova savremena ili redizajnira stara web stranica, kako bi se građanima općine Ilijaš olakšao pristup informacijama.

Obrazloženje: Općinska web stranica ilijaš.ba je zasnovana na tehnologiji koja se ne koristi već skoro 10 godina. Izgled trenutne stranice podsjeća na period 90-ih godina i prvih stranica koje su se pojavile na internetu. Stranica nije prilagođena za sve uređaje, nepregledna je, pretrpana i bespotrebno zapostavljena. Danas 80% prometa na internetu dolazi sa mobilnih telefona, a stranica općine nije prilagođena za takve korisnike, već za korisnike monitora sa katodnim cijevima tj. za tehnologiju koja se prestala koristiti pred kraj 20. stoljeća. Mnogobrojne opcije sa strane zbunjuju korisnike i čine korištenje općinske stranice izrazito teškim, a za mlađe korisnike skoro nemogućim, jer nisu navikli na stranice koje su ovako loše održavane i zapostavljene, klikom na određene podmenije, utvrđeno je, citiram:"Ovaj dio sit-a je još u izgradnji..." - i to godinama stoji nepromijenjeno. Najbolji način da shvatite koliko je ustvari stranica naše općine zapostavljena, jeste da pogledate stranice Općine Centar, Novi Grad ili bilo koje druge općine u Kantonu Sarajevo i šire i vrlo lahko će te doći do jednostavnih zaključaka - potreban je hitan i kvalitetan redizajn općinske stranice.

3. Pokrećem inicijativu da se otvore službeni i društveni kanali, poput Fstranice i službenog YouTube kanala, na kojima bi se redovno objavljivao sadržaj od značaja za građane općine Ilijaš.

Obrazloženje: Svjedoci smo napredovanja tehnologije i popularnosti društvenih mreža koje spadaju u najefikasnije online marketing platforme. S obzirom na to, neophodno je građanima pružiti adekvatan kanal komunikacije, te svakodnevne vijesti, obavještenja, konkurse itd., dijeliti i na službenoj Facebook stranici, a video sadržaje na službenom YouTube kanalu, u svrhu poboljšanja komunikacije i lakšeg pristupa informacijama.

4. Pokrećem inicijativu da se omogući LIVE prenos sjednica Općinskog vijeća Ilijaš, putem službene Facebook stranice Općine Ilijaš ili službenog YouTube kanala.

Obrazloženje: Obzirom da je praksa da se sjednice snimaju, te kao takve, režu i puštaju u programu Radio Ilijaša dan poslije, javnost je uskraćena za određene dijelove prijenosa sjednica OV-a Ilijaš i postoji zahtjev i zainteresovanost za praćenje sjednica putem Facebook stranice ili YouTube live stream-a.

Pitanja:

1. Na temelju informacija dostavljenih od nadležne općinske službe, kao odgovor na niz mojih pitanja vezanih za održavanje puteva, molim nadležnu općinsku službu da mi dostavi tendersku dokumentaciju koja se odnosi na zimsko održavanje puteva. Također, molimo da mi se dostavi Plan održavanja po mjesnim zajednicama.

2. Molim informaciju o cjelokupnom vlasništvu Općine Ilijaš koje se daje na korištenje, izdaje u komercijalne svrhe ili podliježe koncesiji.

Potrebno je da mi se dostave podaci o broju poslovnih prostora u vlasništvu Općine Ilijaš, također i informacije o statusu tih poslovnih prostora u kontekstu koliko je njih dato u najam, a koliko je slobodnih, po kojoj cijeni se izdaju i u skladu s kojim kriterijima, te da li su razvrstavni po zonama. Koji poslovni prostori su perspektivni, a koji ne, u smislu perioda koliko dugo su iznajmljivani, te na uvid tražim potpisane Ugovore, informaciju da li se uredno plaćaju obaveze režija, te da li postoji dugovanja.

ALAN ŠERAK - vijećnik SDP-a

Inicijativa:

Pokrećem inicijativu i tražim da se o istoj izjasni Vijeće u formi Zaključka koji glasi:

"Vijećnici koji su članovi radnih tijela u OV-u Ilijaš nemaju pravo na naknadu za rad u istim. Ovim Zaključkom se ujedno mijenja dio Odluke o naknadama koji tretiraju navedeno pitanje".

Obrazloženje: Obzirom da Budžet Općine Ilijaš, prema projekciji za ovu godinu, će biti manji cca 4.000.000,00 KM, predlažemo da se počnemo ponašati odgovorno prema istom i da izvršimo određene uštede u Budžetu na način da se odričemo vlastitih prihoda i iste usmjerimo u rješavanje socijalnih pitanja građana Općine Ilijaš.

Pitanje.

1. Postavljam pitanje načelniku Općine Ilijaš, g-dinu Akifu Fazliću. Ko je prošao na javnom konkursu za prijem novih uposlenika u organ uprave, da li su isti povezani sa strankom SDA i da li se radi o svojevrsnom nepotizmu obzirom da postoje saznanja da su primljeni članovi porodice načelnika općine i predsjedavajuće OV-a Ilijaš?

Zamolio bih da mi odgovor ponudite odmah, usmeno, na ovoj sjednici Općinskog vijeća.

MUHAMED HANDŽIĆ - vijećnik SBB-a

Pitanja:

1. Da li je u Budžet Kantona Sarajevo ugrađen Zaključak Općinskog vijeća Ilijaš iz marta prošle godine, a koji se odnosi na otvaranje Centra za pružanje komunalnih usluga za građane Općine Ilijaš u Ilijašu.

Obrazloženje: Naime, podnio sam inicijativu koju je Općinsko vijeće pretvorilo u Zaključak i uputilo nadležnom ministarstvu Kantona Sarajevo, a koja se odnosila na gore navedeno. Dobili smo odgovor da navedeni projekat nije planiran u Budžetu KS, te da će isti biti planiran u Budžetu za tekuću godinu (2021.). Obzirom da je Centar za pružanje komunalnih usluga neophodan građanima Ilijaša koji svakog mjeseca izdvajaju značajna

novčana sredstva za plaćanje taksi za svoje račune, te da su takvi centri otvoreni u gotovo svim općinama KS, postavlja se pitanje diskriminacije ili opstrukcije vlasti u Kantonu Sarajevo kada je Ilijaš u pitanju.

2. Kada će Služba za imovinsko-pravne poslove, geodetske poslove i katastar Općine Ilijaš implementirati Rješenje broj:06/1-27-2628/20 od 28.10.2020. godine, a koje se odnosi na utvrđivanje granice-graničnih linija između građevinskog zemljišta u privatnom vlasništvu i zemljišta označenog kao državna svojina javno dobro u naselju Vlaškovo?

Obrazloženje: Mjesna zajednica Stari Ilijaš podnijela je zahtjev gore navedenoj službi da se izvrši navedeno razgraničenje koje je djelimično urađeno (obilježeno kočicama), ali je i dalje problem isti kao i do sada, a koji se ogleda u nesavjesnom djelovanju vlasnika privatnih parcela koji su svoje ograde iznijeli duboko u putnu komunikaciju tako da se u ovome dijelu naselja ne mogu kretati motorna vozila većih gabarita, niti je moguće izvršiti zimsko čišćenje puta, a da se ne poremete nelegalno postavljene ograde.

U tom smislu Vas molim da poduzmete sve zakonske mjere i riješite ovaj problem.

U prilogu je Rješenje Službe, donio sam par slika sa terena i dobro bi bilo da se ovo Rješenje implementira u potpunosti na terenu, da ne dovodimo u situaciju građane da oni uzimaju Zakone i pravdu u svoje ruke.

3. Kada će nadležna općinska služba izvršiti deložaciju osoba koje koriste socijalne općinske stanove, a istovremeno su vlasnici, uslovnih za stanovanje, stambenih jedinica?

Obrazloženje: Naime, sve je više građana naše općine koji su u stanju socijalne potrebe, a da nemaju ni krov nad glavom, a neki od njih imaju i po nekoliko maloljetne djece koja žive u ekstremnim uslovima, dok veliki broj korisnika stanova u LAMELAMA u Starom Ilijašu ne žele napustiti iste, a imaju u vlasništvu kuće na području naše općine koje su potpuno uslovne za stanovanje.

Tražim da se izvrši provjera svih korisnika stanova na lokalitetu Lamela u Starom Ilijašu, te da se oslobode stanovi koji bi se dodijelili onima kojima su stvarno potrebni, a da se dvostruki korisnici deložiraju.

Navešću nekoliko primjera koji se protežu po društvenim mrežama kod nas (mislim da se radi o osobi Saneli Bojić iz Misoče koja preživljava sa troje djece, samohrana je majka, siječe šumu, a kako sama kaže krade, da bi prehranila djecu), a mi u Lamelama u Starom Ilijašu imamo sigurno 1/3 lica koja koriste stambene jedinice sa smještaj lica u stanju socijalne potrebe, a istovremeno imaju napravljen kuće pod dva, tri sprata. Ako me budete pitali, ja ću vam neke navesti imenom i prezimenom, jer raspolazem tim podacima. Davali smo im i neke donacije da opreme svoje stambene jedinice. Oni su to opremili, međutim, ovo im je tamo đaba korištenje, pa lakše im je ne plaćati. Dakle, ukoliko ovo ne uradite u roku od 2-3 mjeseca, ja ću nastojati da raspišemo peticiju ili na neki drugi demokratski način, mislim da će mi se pridružiti veliki broj građana, da te ljude iz Lamela iselimo koji su već 20 godina u socijalnim stanovima, a ja sam veći socijalni slučaj od njih.

4. Kada će se boračka udruženja koja su na Budžetu Općine Ilijaš sjetiti da urade idejne projekte za izgradnju spomen obilježja rahmetli komandantu Hašimu Spahiću i njegovom saborcu Šemsi Baručiji na mjestu pogibije, te spomen obilježja ubijenim građanima Općine Ilijaš na brdu Žerovanj?

Obrazloženje: Prošlo je više od 25 godina od završetka agresije na našu BiH, a na navedenim lokacijama se nalaze samo simbolična kamena obilježja koja nisu primjerena

zaslugama i djelima onih koji su poginuli braneći našu zemlju. S tim u vezi, insistiram kao čovjek-borac veteran i kao vijećnik u ovom Općinskom vijeću, da se ODMAH pristupi izradi idejnih rješenja za dostojanstvena spomen obilježja na navedenim lokacijama, te da se boračka udruženja koja baštine tradiciju ovih događaja učine odgovornim za njihovu implementaciju, naravno uz novčanu podršku općinskog organa.

Ovo Vijeće je često pominjalo problem nerada boračkih udruženja i trebalo bi biti upitno njihovo finansiranje. Kada idemo u posjetu tim mjestima zločina i pogibije (Žerovanj i Moševačko brdo) svjedoci smo jednog cirkusa. Dođemo gore i okupimo se oko jednog kamena i kao držimo čas istorije, a ne znam da li je imalo stid te ljude koji prisustvuju tom činu na onako neuređenom mjestu držati čas istorije. Potrebno je uraditi lijep spomenik komandantu Hašimu Spahiću, potrebno je uraditi nadstrešnice i potrebno je na brdu Žerovanj takođe uraditi spomenik, pristupne staze, puteve i ono sve što pripada gore.

Pozivam kolegice i kolege, ukoliko boračka udruženja budu dostavila svoje zahtjeve za budžet, a ne budu uradili bar idejne projekte da se ovo uradi, da ne podržimo njihovo finansiranje iz Budžeta Općine Ilijaš i da im se potpuno ukine finansiranje za narednu godinu dok se nalaze jedni te isti ljudi proteklih 20 godina, što je apsurd.

Ja im finansiranje sigurno neću podržati ako ne urade idejne projekte za bar ova dva obilježja i neću dozvoliti budžetska sredstva, a da nam spomenik rahmetli komandanta Hašima Spahića bude avet i da oni ljudi koji su izginuli na Banjerskoj kosi (njih je 32, a ne 30 kako piše na onom kamenu i poginuli su u junu, a ne u julu kako piše) imaju adekvatno spomen obilježje i moramo pristupiti autentičnosti istorije koja je, na žalost, takva kakva jeste u ovom proteklom periodu.

**SELMA BARIĆ - vijećnica SDP-a**

Inicijativa:

1. Pokrećem inicijativu za rekonstrukciju i zatvaranje dijela ulice 126. Ilijaške brigade u skladu sa Regulacionim planom Banovac, koja vodi od OŠ "Hašim Spahić" Ilijaš do dječijeg parka koji se nalazi ispred JKP "Vodostan", tačnije javna površina ispred A1, A2 i A3 objekata kolektivnog stanovanja.

Obrazloženje: Kao stanovnik MZ Ilijaš Grad, a i u razgovoru sa građanima navedena ulica je već duže vremena u lošem stanju, što pješacima i stanovnicima navedene ulice predstavlja veliki problem. Također, djeca koja se igraju u dječijem parku uvijek su izložena opasnosti od saobraćaja, a ujedno na navedenom području gravitiraju dvije obrazovne ustanove.

**ALEMA DŽAFO - vijećnica NIP-a**

Inicijative:

1. Pokrećem inicijativu za vraćanje autobuske linije Kamenica-Sutjeska u 06:20h, za koju je zaduženo JKP GRAS.

Obrazloženje: Građani MZ Kamenica su izrazili veliko nezadovoljstvo ukidanjem jutarnje autobuske linije i traže njeno vraćanje u 06:20h. S obzirom da veliki broj stanovništva ovog mjesta radi u Sarajevu i okolnim mjestima, ova linija je odgovarala njihovim potrebama. Takođe, i učenicima koji idu u škole u okolini Sarajeva, ali i Ilijaš, je odgovarala ova linija i nisu bili prisiljeni čekati dugi vremenski period kao što je to trenutno slučaj.



2. Pokrećem inicijativu za postavljanje saobraćajnog znaka za zabranu parkiranja kod Centra za socijalni rad u Ilijašu.

Obrazloženje: S obzirom da trenutno nema znaka za zabranu parkiranja ispred Centra za socijalni rad, građani tu vrlo često ostavljaju svoje automobile čime nerijetko blokiraju izlaz službenog vozila iz garaže i u hitnim slučajevima, kao i mjesta za parkiranje invalidnih lica koji su i česti korisnici usluge ovog Centra.

3. Pokrećem inicijativu za postavljanje branika na novoasfaltiranom putu u Hadžićima, na dijelu od potoka do prve krivine u dužini cca 100 m.

Obrazloženje: Rekonstrukcija puta u Hadžićima nije uključila i postavljanje branika na ovom navedenom dijelu. S obzirom da se radi o obali i da su rekonstrukcijom puta uklonjena sva stabla na ovom dijelu koja su pružala neki vid sigurnosti, vozači trenutno strahuju od toga da auto sleti sa puta, naročito u ovom hladnom periodu kada su česte poledice.

Pitanja:

1. Kada je rok za izvođenje radova u MZ Stari Ilijaš, ispred Lamela, koja firma izvodi radove i koji su to konkretno radovi koji se izvode?

Obrazloženje: Građani ovog područja su izuzetno nezadovoljni, jer smatraju da se radovi izvode sporo i ne ulaže se napor za ubrzavanje procesa. S obzirom na radnje koje se izvode, stanovnicima ovog područja su isključena rasvjetna tijela, zbog čega je povećan broj krađa. Građane zanima kada će radovi u ovom području biti okončani kako bi što prije dobili rasvjetu i prohodan put.

2. Koji je rok za izvođenje radova na regionalnom putu R445, odnosno na relaciji Malešići-Stari Ilijaš? Zašto su radovi započeti u zimskom periodu i ko će odgovarati u slučaju nezgode zbog otežanog kretanja na ovoj relaciji?

Obrazloženje: S obzirom da ovi radovi traju već neko vrijeme, a nije napravljen neki značajniji pomak, zbog vremenskih neprilika i velike hladnoće, na relaciji Stari Ilijaš-Malešići, dio kojim se inače kreću građani je blatnjav, te su ljudi prisiljeni kretati se kolovozom i bivaju izloženi opasnosti. S obzirom da će se učenici uskoro naći u školskim klupama, i djeca će biti izložena ovoj opasnosti na putu do škole.

MEHO HIDO - vijećnik NIP-a

Pitanje:

Dokle se stiglo sa realizacijom probijanja nove trase puta za naselje Velike Šume, a koja je započeta prošle godine?

Molim nadležne općinske službe da nastave ka realizaciji iste, izađu na teren i ponude zadovoljavajuće rješenje za 15 porodica domicilnog i vikend stanovništva.

Drago mi je da je ovdje prisutan načelnik i moj kolega Hasković koji je obnašajući direktora u JP "Sarajevo-šume" i svjedok je da svake godine imamo zahvate i intervencije na glavnom putu od Čevljanovića prema Gajevima, a to je otklanjanje posljedica. Uzroci ovih problema su u ovim naseljima sa strane kao što su Velike Šume gdje prilikom većih padavina velike bujice stvaraju dole probleme koje stvaraju.

Inicijative:

1. Pokrećem inicijativu za elektrifikaciju i snadbijevanje električnom energijom naselja: Lipnik u MZ Gajevi, zaseoka Stanovi, naselja Medojevići u MZ Srednje.

Obrazloženje: Naselje Lipnik se nalazi na pograničnom dijelu općine sa manjim entitetom. Svjedoci smo da električna energija predstavlja jedan od osnovnih uslova za povratak stanovništva. U ovom dijelu općine imamo izgrađenu elektrodistributivnu mrežu do naselja Gornji Šići. Potrebno je produženje mreže u dužini od 2 km. Za realizaciju ove aktivnosti, interesovanje je pokazalo 15 porodica: Čelik, Hasanović i Selimović.

Zaseok Stanovi se nalazi na polovini ratnog puta između Medojevića (Jelice) i Velikih Šuma. Zasluge stanovnika ovog kraja su veoma dobro poznate (18 šehida i 5 zlatnih ljiljana). Postojeću elektromrežu sa Jelice potrebno je produžiti prema Stanovima u dužini od 1,5 km. Ovdje je interesovanje pokazalo 10 porodica: Osmanović i Kahrmanović. Realizacijom ovog projekta otvaraju se predispozicije za bolje infrastrukturno uređenje ostalog dijela naselja Medojevići po pitanju putne infrastrukture i vodosnadbijevanja.

Oba ova naselja su u prijeratnom periodu imala električnu energiju i molim nadležne općinske službe da ulože trud i napor i nastupe ka nadležnim javnim preduzećima i elektrodistribuciji i svim nivoima vlasti, kako bi se ovi projekti rekonstruisali.

ANELA SUBAŠIĆ - vijećnica SDP-a

Inicijative:

1. Upućujem inicijativu za pronalazak sistemskog i dugoročnog rješenja za problem poplavljenog podvožnjaka u Luci. Naime, radi se o dugogodišnjem problemu s kojim se suočavaju stanovnici MZ Luka i nedovoljna su privremena rješenja kao što su ispumpavanje vode i otklanjanje nakupljenih nečistoća u začepljenim odvodima. Smatram da se pomenutom problem treba pristupiti mnogo ozbiljnije.

Obrazloženje: Kao stanovnik MZ Luka, a i u razgovoru sa komšijama, pokrećem inicijativu za rješavanje dugogodišnjeg problema poplavljenog podvožnjaka u Luci. Naime, svaki put nakon obilnijih padavina, usljed začepljenja odvodnih cijevi, građani su suočeni sa dobro poznatim problemom. S obzirom da se radi o frekventnoj saobraćajnici, mnogim vozačima i pješacima poplavljeni podvožnjak predstavlja otežano ili onemogućeno kretanje, a znatan broj stanovnika je pretrpio oštećenja na vlastitim automobilima. Posljednjih godina, kao i prethodnih dana, ovaj problem se uglavnom rješavao ispumpavanjem vode i otklanjanjem nečistoća u začepljenim odvodima. Međutim, pomenuta rješenja nisu adekvatna i dugoročna, te vas molim u ime svih stanovnika MZ Luka da uvažite moju inicijativu kako bi se ovaj problem otklonio dugoročno.

2. Upućujem inicijativu za postavljanje otvorenog klizališta u vrijeme zimskih mjeseci u našoj lokalnoj zajednici. Predlažem postavljanje ledene plohe u decembru 2021. godine u centralnom dijelu općine.

Obrazloženje: Stanovnici općine Ilijaš, nažalost, nemaju dovoljno prostora za sportske i rekreativne aktivnosti u vrijeme zimskog perioda. Iz tog razloga, mnogi roditelji svoju djecu vode na otvorena klizališta u sarajevske ili druge općine, dok drugi roditelji nemaju sredstava kako bi djeci priuštili radost klizanja vodeći ih na udaljenija mjesta. Klizalište bi znatno oživjelo svakodnevnicu svim građanima u Ilijašu, a pogotovo djeci i

omladini. To bi bio jedan od načina da naši najmlađi sugrađani, ali i oni stariji, provode dane zimskog raspusta družeći se i uživanjem na ledenoj plohi. Osim toga, klizanje kao sport, sigurna sam da bi višestruko zadovoljio mališane po sportsko-rekreativnim, zdravstvenim, zabavnim i edukativnim (kod najmlađih klizača) osnovama. Moj prijedlog je da sada planiramo realizaciju ove ideje kako bi klizalište bilo otvoreno u decembru ove godine. Ukoliko podržite moju inicijativu, uvjerena sam da će se među mnogobrojnim posjetiteljima otvorenog klizališta naći i posjetiocima iz susjednih općina.

3. Upućujem inicijativu za nabavku i postavljanje pametnih solarnih klupa. Predlažem postavljanje najmanje dvije pametne solarne klupe i to jedna na platou ispred KSC-a u ulici Hašima Spahića, a druga u gradskom šetalištu. Pomenute višenamjenske klupe koriste solarnu energiju, pružaju ambijentalno osvjetljenje, opremljene su USB priključcima za punjenje mobitela i ostalih pomenutih uređaja i omogućavaju superbrzi Internet. Osim toga, u klupama su ugrađeni sistemi hlađenja koji osiguravaju da temperatura ostane ugodna u svim vremenskim prilikama. Ono što bih posebno naglasila je da su klupe projektirane kao ANTI-VANDAL i skoro je nemoguće oštetiti je, jer su njeni čelični dijelovi vrlo otporni.

Obrazloženje: Prateći savremene trendove i pokušavajući zadovoljiti potrebe građana, pokrenula sam ovu inicijativu za postavljanje pametnih solarnih klupa. Višenamjenske solarne klupe već postoje u mnogim gradskim općinama, ali i manjim centrima u Bosni i Hercegovini. Praksa postavljanja solarnih klupa pokazala se kao nešto od velike koristi za nove generacije. Smatram da je ova inicijativa jako važan korak u osavremenjavanju naše lokalne zajednice. Ukoliko bi se realizovala ova ideja, prateći nove i sofisticirane trendove, pokazali bi smo spremnost da se naša općina nosi sa izazovima savremenog doba, a građanima, prvenstveno mlađoj populaciji, mnogo bi značilo i olakšalo svakodnevnicu. Ističem da ove solarne klupe već postoje u općinama Banovići, Lukavac, Istočno Sarajevo, Općina Centar i mnoge druge.

ADNAN ABADŽIJA – vijećnik NIP-a

Na početku bih postavio pitanje načelniku Akifu Fazliću.

Pitanje:

1. Dokle se došlo i da li se uopšte nešto radilo po pitanju projekta spomen obilježja u Crnoj Rijeci-Kamenici i zaseoku Nanići? Konkretno pitam zbog nekoliko šehida koji su tu dali svoje živote i da li se može preporučiti na narednoj sjednici i najvjerojatnije je da ću ja, ako ne bude ništa poduzeto, podnijeti inicijativu da se tu uradi spomen obilježje gdje bi boračka udruženja uradila idejni projekat, upravo ovo što je rekao kolega Handžić.

To bi bilo usmeno pitanje.

Inicijative:

1. Pokrećem inicijativu za postavljanje saobraćajne signalizacije (ogledala) u naselju Salkanov Han, skretanje za "Marinu" i skretanje za "Haluge".

Obrazloženje: Nedostatak preglednosti prilikom skretanja na ovim lokacijama predstavlja potencijalnu opasnost za učesnike u saobraćaju. Postavljanjem istih, vozačima motornih vozila bi se olakšalo uključanje na glavni put.

2. Pokrećem inicijativu za hitnu sanaciju udarnih rupa na kolovozu. Dionica puta Vratuša-Podlugovi (do pruge).

Obrazloženje: Izvođač radova na ukopvanju kablova (BH Telecom) navedenu dionicu puta je vratio u prvobitno stanje, kako je bilo definisano ugovorom.

Gore navedena dionica puta je u katastrofalnom stanju gdje su prokopani dijelovi puta, iako asfaltirani, propali prirodnim slijeganjem tla i nasipa koji nije adekvatno urađen. Ista dionica predstavlja opasnost za sve učesnike u saobraćaju koji saobraćaju na toj relaciji, a posebno učenice OŠ "Podlugovi" koji se kreću tom dionicom, na kojoj nema pješačke staze (trotoara). Vozači motornih vozila obilazeći rupe često ugrožavaju živote pješaka od kojih su to uglavnom djeca, učenici koji idu prema ili iz škole.

3. Pokrećem inicijativu za hitnu sanaciju ogromnih udarnih rupa na kolovozu u Srednjem, na dionici puta od zgrade poslovnice BH Pošte do ulaza u školsko dvorište OŠ "Srednje".

Obrazloženje: Gore navedena dionica puta je u katastrofalnom stanju, a na kolovoznim trakama su udarne rupe promjera i preko jednog metra, dubine cca 10 cm. Iste predstavljaju opasnost za sve učesnike u saobraćaju koji saobraćaju na toj relaciji, a posebno ističem učenike Osnovne škole. Vozači motornih vozila obilazeći rupe često ugrožavaju živote pješaka od kojih su to uglavnom djeca, učenici koji idu prema ili iz škole. Predlažem da nadležna općinska služba izađe na lice mjesta, te da isti problem hitno riješi (hladni asfalt ili dr.).

SEMIR DEDIĆ – vijećnik SDA

Pitanje/inicijativa:

Kako je definisano održavanje puta kroz Industrijsku zonu u smislu čišćenja puta? Je li to jednom mjesečno ili koliko već (pogotovo u vremenima nakupljanja soli, pijeska, itd.). Zavisno od odgovora koji dobijem, pokrećem inicijativu da to bude najmanje dva puta mjesečno ili da se poštuje Ugovor.

Pitanje:

1. U kojoj su fazi postupci javnih nabavki za rekonstrukciju dva puta u Misoči: prvi je put za Široku Njivu i drugi za Dediće. Ukoliko su potpisani Ugovori, kada je definisan početak radova, te koji je rok završenja istih.

ANEL BUMBULOVIĆ – vijećnik SDA

Pitanje/inicijativa:

1. Na zahtjev mještana MZ Podlugovi postavljam pitanje i pokrećem inicijativu prema JU DZ Kantona Sarajevo.

Naime, mještani MZ Podlugovi obratili su mi se pitanjem i zahtjevom kada će se u ambulanti porodične medicine Podlugovi ponovo uspostaviti rad u drugoj smjeni, koji je obustavljen zbog pandemije Corona virusom.

U pomenutoj ambulanti Podlugovi se nalazi registrovano imeđu 6000-7000 zdravstvenih kartona (što po normative podrazumijeva tri ljekara). Građani navode da je ljekar koji radi u jednoj smjeni preopterećen, te da ne može na vrijeme i adekvatno odgovoriti na zahtjeve pacijenata za zdravstvenim uslugama. Građani takođe navode da oni građani koji su u radnom odnosu ne mogu ostvariti zdravstvene usluge u drugoj smjeni, te iste moraju ostvarivati u drugoj smjeni u centralnom objektu DZ Ilijaš ili uzimati slobodne dane sa svog

radnog mjesta.

Inicijativa:

Pokrećem inicijativu prema nadležnim službama da se izvrši rekonstrukcija javne rasvjete u ulici Žrtava genocida u Srebrenici.

Obrazloženje: Naime, javna rasvjeta u pomenutoj ulici se nalazi u katastrofalnom stanju. U navedenoj ulici veliki broj stubova za javnu rasvjetu je oštećen ili preopterećen, te se nalazi u ne adekvatnom položaju (nakrivljen), te postoji osnovana prijetnja da bi ti stubovi mogli da padnu na saobraćajnicu i pješačku stazu. Na jednoj od sjednica Općinskog vijeća Ilijaš u prethodnom mandate sam pokretao istu inicijativu, nadležni organi su izlazili na lice mjesta, ustanovili stanje, ali do danas nije došlo do sanacije navedene rasvjete.

ALEN ARNAUTOVIĆ – vijećnik SDA

Pitanja:

1. Zašto se tako dugo odugovlači rješavanje površinskih/atmosferskih voda u dijelu naselja Mrakovo?

Obrazloženje: Veliki broj građana koji je ugrožen navedenom elementarnom nepogodom postavlja gore navedeno pitanje, jer do sada nije ništa operativno urađeno. Puno je vremena utrošeno ko, kako i kada problem riješiti? Veliki naponi su od strane organa MZ Mrakovo uloženi iz imovinsko-pravne naradi, da se dobiju saglasnosti građana kroz čije parcele prolazi trasa za odvodnju površinskih tj. atmosferskih voda. Krajnje je vrijeme, jer nadolazeće vremenske prilike donose ogromne padavine i time se ugrožavaju ljudski životi i njihova materijalna dobra.

2. Kada će se na prostoru MZ Mrakovo izvršiti distribuiranje tj. Postavljanje PHD posuda za otpad?

Obrazloženje: Prošlogodišnjim i ovogodišnjim Operativnim planom planirano je da se na prostoru MZ Mrakovo distribuiraju tj. postave posude za otpad, čime bi olakšali procedure i zahtjeve naših građana. Obzirom da nije ništa po navedenom pitanju učinjeno, molimo vas da se ispoštuju dogovorene procedure.

Inicijative:

1. Pokrećem inicijativu da općinski načelnik, putem nadležne službe i nadležnog ministarstva Kantona Sarajevo, preciznije i detaljnije uredi oblast odvoženja smeća, kabastog materijala, plaćanja računa istog, zamjene i popravke hajfiša/kontejnera, ispiranja istih, približavanje usluga građanima, nabavke drugih i drugačijih posuda, kao i uspostave obligacionih odnosa između davaoca i primaca usluga na cijelom prostoru Općine Ilijaš.

Obrazloženje: Smatramo da dosadašnji način prikupljanja i odvoženja, plaćanja smeća, kao i kabastog otpada na području Općine Ilijaš ne funkcioniše na pravi način. Potrebno je navedenu oblast što prije zakonski preciznije urediti i istu uslugu približiti građanima naše općine (npr. nabavkom manjeg motornog vozila za odvoz smeća i nabavkom plastičnih posuda za svako domaćinstvo).

2. Pokrećem inicijativu da općinski načelnik, putem nadležne službe i nadležnih u

Kantonu Sarajevo, koordiniranom aktivnošću iznađu rješenje uspostave trajnog i sistemskog funkcionisanja Ambulante porodične medicine u punom radnom vremenu u Mrakovu.

Obrazloženje: Savjet MZ Mrakovo, u proteklom period od menadžmenta JU "Dom zdravlja" Kantona Sarajevo, tražio je uspostavljanje trajnog i sistemskog rješenja zdravstvene zaštite građana Mjesne zajednice Mrakovo, cijeneći statističke i demografske pokazatelje, gdje postoje optimalni uslovi za uspostavljanje kvalitetne zdravstvene zaštite građana barem od jednog tima doktora porodične medicine. Organi MZ Mrakovo čine stalne napore da motivišu građane govoreći im da su i oni djelimično odgovorni za trenutno stanje, ali ne gube nadu, jer postoje svi uslovi da se na ovom području ozbiljnije razvijaju navedene usluge (posebno u prevenciji).

3. Pokrećem inicijativu da općinski načelnik, putem Službe za saobraćaj, stambeno komunalne poslove i građenje, uputi akt Ministarstvu saobraćaja tj. Direkciji za puteve Kantona Sarajevo, a u vezi hitnih intervencija na putu Ilijaš-Mrakovo-Salkanov Han i Popovići.

Obrazloženje: Obzirom da je navedeni put jako frekventan u pokretu motornih vozila, djece i odraslih građana, a samim time se ugrožava njihova sigurnost, hitno je potrebno pokrenuti procedure sanacije oštećenja poslije zime, početak izgradnje trotoara na istom putu, kao i postaviti ogledala na uralgičnim izlaznim tačkama i izvršiti odvodnju oborinskih/atmosferskih voda, posebno u Salkanovom Hanu i Mrakovu. Više puta smo svojim aktima upozoravali na navedene činjenice, ali bezuspješno.

4. Pokrećem inicijativu prema općinskom načelniku da, putem nadležne službe, a po potrebi i drugim organima, iznađu finansijska sredstva i implementiraju projekat horizontalne i vertikalne signalizacije na lokalnim javnim putevima na prostoru MZ Mrakovo.

Obrazloženje: Više puta smo tražili i ukazivali na navedenu inicijativu, ali smo dobivali "jalove" odgovore nadležne službe. Obzirom da se navedena putna infrastruktura ozbiljno devastira od nepoznatih investitora i ličnih potreba, potrebno je poduzeti i ozbiljnije mjere propisane zakonom koji tretira navedeno pitanje, kako bi istu zaštitili.

DINO ČUSTOVIĆ – vijećnik NIP-a

Pitanje:

1. Postavljam pitanje za nadležnu službu i načelnika.

Da li ste imali sastanak sa predstavnicima Opštine Breza vezano za rješavanje kanalizacije koja prolazi potokom kroz našu općinu, tačnije kroz Salkanov Han?

Miris je često nepodnošljiv, te se nadam da ćete u skorije vrijeme, ako niste, krenuti u rješavanje ovog problema.

Inicijative:

1. Pokrećem inicijativu za ukidanje komunalne takes na istaknutu firmu za privredne subjekte na području naše opštine.

Obrazloženje: Obzirom na tešku situaciju koja je zadesila privrednike na području naše

opštine, ukidanjem ovog nameta, pomoći ćemo privrednicima da novac usmjere u neke druge bitne stvari za opstanak njihovog biznisa. Po monogim svjetskim, ekonomskim stručnjacima posljedice pandemije osjetit ćemo tek u ovoj godini, tako da bilo kakva oslobađanja troškova naših privrednika mogu osigurati njihov opstanak.

2. Pokrećem inicijativu da se produži Odluka o ne naplaćivanju javnih površina.

Obrazloženje: Obzirom na pandemiju koja je pogodila sve privrednike, a naročito ugostitelje, ovu inicijativu pokrećem da se Odluka produži i u 2021. godini.

3. Pokrećem inicijativu za ukidanje nameta pri otvaranju firme.

Obrazloženje: Bosna i Hercegovina je država u kojoj je najduži period otvaranja firme. Naročito u vremenu pandemije kad se ljudi zbog postojećih troškova ne usuđuju krenuti u sprovođenje svojih biznis planova. Mi sa opštinskog nivoa možemo ohrabriti i olakšati budućim privrednicima.

KENAN BUZA – vijećnik NIP-a

Inicijative:

1. Pokrećem inicijativu da se postavi mobilijar za vježbanje na otvorenom u Mjesnim zajednicama Ilijaš Grad, Podlugovi, Stari Ilijaš, Misoča, te mobilijar za dječije igralište u Srednjem.

Obrazloženje: Primarni cilj ove inicijative je djeci i omladini sa područja navedenih mjesnih zajednica obezbjediti mogućnost za kvalitetno i sigurno korištenje slobodnog vremena. Podstaci ćemo djecu i mlade da se na ovim mjestima okupljaju, druže, te vježbaju i igraju.

2. Pokrećem inicijativu da se sjednice Općinskog vijeća prenose uživo putem live stream-a preko kanala društvenih mreža, te da iste obezbjedi Radio Ilijaš koji ima ovlaštenje i kapacitete da snima i prenosi sjednice.

Obrazloženje: Primarni cilj ove inicijative je unapređenje standard upravljanja, povećanje nivoa transparentnosti i odgovornosti u radu vijećnika i organa uprave. Naime, građani i organizacije civilnog društva imaju pravo biti direktno informisani, a sve u svrhu da se dobro poslovanje unaprijedi, da se nagrade kapaciteti lokalnih učesnika radi postizanja većeg kvaliteta, učinkovitosti i efektivnosti ove lokalne zajednice, što će zasigurno povećati uključenost, transparentnost i odgovornost svih zainteresiranih strana. Tako će građani moći uživo pratiti rad Općinskog vijeća, moći će upoznati vijećnike i lakše će im biti da uspostave kontakte i ostvare svoja prava da njihovi interesi budu adekvatno zastupani.

AKIF FAZLIĆ – općinski načelnik

Kada je u pitanju konkurs koji se provodio u Općini Ilijaš, dakle, procedura završetka konkursa još nije završena. Konkurs se odnosio na pet upražnjenih radnih mjesta. Dakle, samo za jedno mjesto je završeno, a ostala četiri nisu, ali vrlo brzo će biti završena i tada ćete dobiti potpunu informaciju. To je jedna stvar, a druga stvar, zamolio bih sve nas da lahko ne dajemo kvalifikacije, pogotovo ako nemamo potpune informacije kojima trebamo vladati da bi davali te kvalifikacije i da na korektnom osnovu razmatramo svako pitanje i svaku problematiku koja je i objektivna ili je i subjektivna i dakle i s aspekta te

vrste odgovornosti.

Bilo je usmeno pitanje od gospodina Abadžije. Ovu inicijativu, prije svega, treba još jednom razmotriti i treba je definisati. Bilo je puno tih ideja, one još uvijek nisu konkretizovane kada je u pitanju spomen obilježje u Crnoj Rijeci, jer gore imamo jednu specifiku da zaista na nekoliko mjesta imamo izgrađena neka spomen obilježja i vjerovatno kroz želju da se sva ta mjesta na neki način obilježe danas imamo takvu situaciju, a vjerovatno je potreba da se ima neko centralno spomen obilježje. Dakle, tu ideju treba potpuno definisati, dovesti je do kraja i onda pokrenuti procedure. Generalno, obzirom da je bilo dosta inicijativa vezano za spomen obilježja, mi ćemo ovdje na Vijeću trebati utvrditi prioritet onoga što ćemo raditi. Ne možemo pokrenuti sva. Kazat ćemo "ove godine ćemo pokrenuti ovo, ono je broj jedan, slijedeće broj dva" i uz taj zajednički stav ići u realizaciju svih ovih inicijativa.

ALMA OMEROVIĆ – predsjedavajuća

Prijedlog Zaključka vijećnika Alana Šeraka glasi: "Vijećnici koji su članovi radnih tijela u OV-u Ilijaš nemaju pravo na naknadu za rad u istim. Ovim Zaključkom se ujedno mijenja dio Odluke o naknadama koji tretiraju navedeno pitanje".

HALID DIZDAREVIĆ – vijećnik SDA

Treba da se izjasnimo o Zaključku gospodina Šeraka koji ja u suštini opravdavam, ima smisla. Međutim, imamo neke druge stvari koje treba da nam dođu dnevni red kao što je Budžet i predviđam da je stavka za socijalna pitanja uvijek bila uvrštena u Budžet, te cijenim da ne bi trebalo ovako parcijalno definisati i izdvajati sredstva od određenih primanja. Dakle, kada budemo radili određene stavke i "rezali", treba to sveobuhvatno uzeti, pa čak ako treba i od naših paušala da se određeni iznosi preusmjere za socijalna pitanja mi ćemo apsolutno biti ZA, a za djelimične zaključke nećemo biti ZA i ovaj Zaključak nećemo prihvatiti.

ALAN ŠERAK - vijećnik SDP-a

Obrazloženje kako bježiš od ovog Zaključka, da ne upotrijebim neki grubi izraz, jeste da je vrlo štur, ali eto dosjetio se kako i na koji način zaobići ovu stvar. To je tvoja lična stvar i stvar vašeg Kluba hoćete li podržati Zaključak ili nećete. Vezano za paušale, to vam je na idućoj sjednici Vijeća, to da znate. Obzirom da vidim da ste na neki način ohrabreni, a i mene ohrabrujete, evo ja pozivam da vi budete ti koji će napraviti prijedlog Odluke da ukinemo odmah sve paušale. Ja sam ZA, a to da li je to djelimično ili nije djelimično fino u prijedlogu Zaključka piše - odričemo se tih naknada i iste usmjeravamo za rješavanje socijalnih pitanja, prije Budžeta, prije Nacrta, prije svega, tako da Halide to obrazloženje u najmanju ruku, je smiješno i čuvaj svoj dignitet, kao vijećnika, molim te.

ALMA OMEROVIĆ – predsjedavajuća

Predloženi Zaključak je dala na glasanje.

Općinsko vijeće je za predloženi Zaključak glasalo sa 11 glasova ZA, 9 PROTIV i 4 UZDRŽANA.

Konstatovano je da Zaključak nije dobio potrebnu većinu.



## AD-2

Izvještaj o realizaciji zaključaka sa 1. sjednice Općinskog vijeća Ilijaš

ALMA OMEROVIĆ - predsjedavajuća

Zaključaka nije bilo, ali tehnički, tačku dnevnog reda moramo izglasati.

Diskutanata po ovoj tački dnevnog reda nije bilo, pa je OV-e jednoglasno usvojilo

Izvještaj o realizaciji zaključaka sa 1. sjednice Općinskog vijeća Ilijaš

Uslijedila je pauza od 11:20-11:30h.

## AD-3

Informacija o stanju sigurnosti na području općine Ilijaš za 2020. godinu

MIRSAD KURSPAHIĆ – komandir PS Ilijaš

Što se tiče rada policijskih službenika, ovdje mislim na uniformisane policijske službenike i policijske službenike Kriminalističke policije tj. govorit ću u ime policijske stanice i odjeljenja kriminalističke policije. U toku 2020. godine policijski službenici su preduzimali mjere i radnje u skladu sa svojim ovlaštenjima, zakonima, zakonskim propisima i važećim naredbama nadležnih organa. Što se tiče oblasti kriminaliteta, mogu reći da su policijski službenici u toku 2020. godine svakodnevno preduzimali mjere i radnje u skladu sa sačinjenim planovima po određenim oblastima, pa tako imamo planove za razbojništva, drske krađe, teške krađe, džepne krađe, šumske krađe itd. U 2020. godini ukupno je evidentirano 135 krivičnih djela, dok je u istom periodu 2019. godine prijavljeno 129 krivičnih djela. Znači, 6 krivičnih djela više u odnosu na period iz 2019. godine. Od ukupnog broja prijavljenih krivičnih djela, 70 djela se odnosi na krivična djela po poznatom izvršiocu, dok je 69 krivičnih djela po nepoznatom izvršiocu. Osvrnut ću se na krivična djela koja su, recimo, bila malo brojnija, pa tako od ukupnog broja 135 krivičnih djela, 43 se odnose na teške krađe, 24 krivična djela za nasilje u porodici, 15 krivičnih djela ugrožavanje sigurnosti, 8 krivičnih djela oštećenje tuđe stvari, 2 krivična djela razbojništvo koja su oba rasvijetljena isti dan kada su i prijavljena itd. Preduzimajući pojačane mjere i radnje na rasvijetljavanju krivičnih djela, policijski službenici su tokom 2020. godine rasvijetlili ukupno 99 krivičnih djela što u procentima iznosi 73,33%. U toku 2020. godine policijski službenici su kantonalnom tužilaštvu dostavili 135 službenih izvještaja ili izvještaja o počinjenom krivičnom djelu protiv 114 lica. U cilju dokumentovanja prijavljenih krivičnih djela u toku 2020. godine, policijski službenici su lišili slobode 39 lica, izvršili 87 uviđaja na licu mjesta, izvršili 7 pretresa lica, 7 pretresa stambenih objekata, a u službene prostorije je pozvano 242 lica. Kada se sagleda ova situacija, oblast kriminaliteta, može se reći da je situacija zadovoljavajuća u odnosu na broj prijavljenih krivičnih djela. Kada se uzme podatak 135 krivičnih djela na 365, to je svaki treći dan jedno krivično djelo. Što se tiče oblasti javnog reda i mira policijski službenici su takođe postupali po sačinjenim planovima, određenim oblastima, pa tako imamo planove za škole, prosjačenjem, nelegalno zauzimanje javne površine, upotreba pirotehničkih sredstava itd. Policijski službenici su postupali u skladu sa važećim zakonskim propisima koji regulišu ovu oblast, kao i važećim naredbama nadležnih kriznih štabova. Vi znate da su one naredbe o zabrani kretanja i nenošenje maski, jednim dijelom spadale u oblast javnog

reda i mira, pa ćete vidjeti da je došlo do povećanja prekršaja kada je u pitanju ova oblast, a to povećanje se može obrazložiti postupanjem policijskih službenika po važećim naredbama kriznih štabova. U toku 2020. godine ukupno je prijavljeno, odnosno registrovano 1020 prekršaja po javnom redu i miru u čijem činjenju je učestvovalo 1035 lica. Od ukupnog broja prijavljenih prekršaja, 1012 se odnosi na prekršaje koje reguliše Zakon o prekršajima protiv javnog reda i mira u čijem činjenju je učestvovalo 1026 lica, zatim 6 prekršaja koje reguliše općinska Odluka u čijem činjenju je učestvovalo 6 lica i 2 prekršaja koja definiše, odnosno reguliše Zakon o nabavljanju, držanju i nošenju oružja i municije u čijem činjenju je učestvovalo 3 lica. Znači, najbrojniji su prekršaji koje reuliše Zakona o prekršajima protiv javnog reda i mira 1012 prekršaja, pa su najbrojniji prekršaji – 908 nepostupanje po naredbama, odnosno nenošenje maski, 47 ograničenje kretanja (policijski sat), 18 prekršaja se odnosi na prosjačenje, 13 prekršaja učestvovanje u tuči i napad i to je dobro što znači da tokom cijele godine je bilo samo 13 takvih prekršaja koji direktno utiču na sigurnosnu situaciju, 12 prekršaja za naročito drsko ponašanje itd. Većina prekršaja je izvršena na ulici 1008 prekršaja, znači na ulici i drugim otvorenim prostorima, u ugostiteljskom objektu 1 prekršaj, dok je na ostalim mestima izvršeno 11 prekršaja. Kada je u pitanju oblast sigurnosti saobraćaja, policijski službenici svakodnevno preduzimaju pojačane mjere i radnje u skladu sa sačinjenim planovima i mjesečnim planovima pojačane kontrole saobraćaja sa određenim akcentom na pojedine prekršaje kao što je brzina kretanja, upravljanje motornim vozilom pod dejstvom alkohola, bez položenog vozačkog ispita, ne registrovanim motornim vozilima itd. Tokom analiza mi radimo na tome da analiziramo te lokacije na kojima najčešće dolazi do činjenja nezgoda i na tim prostorima uglavnom planiramo pojačane kontrole saobraćaja, pa se može reći da se u toku 2020. godine dogodilo ukupno 178 saobraćajnih nezgoda, a u istom periodu 2019. godine 238 saobraćajnih nezgoda, znači, za 60 saobraćajnih nezgoda manje u odnosu na 2019. godinu. Od ukupnog broja saobraćajnih nezgoda koje su se dogodile, 33 se odnose sa nastradalim licima, dok se 145 odnosi na saobraćajne nezgode sa materijalnom štetom, što je dobar podatak. Znači u 2020. godini nismo imali poginulih lica kada su u pitanju saobraćajne nezgode, dva lica su teško povrijeđena i 41 lice je zadobilo lakše tjelesne povrede. U toku 2020. godine policijski službenici su ukupno kontrolisali 16114 vozača i vozila. Registrovali su 8371 prekršaj od čega je 8343 uručeno prekršajnih naloga, a 28 se išlo sa zahtjevom za pokretanje prekršajnog postupka kod nadležnog suda. U istom periodu 2019. godine bilo je evidentirano 4018 prekršaja što je za 4353 manje u odnosu na 2020. godinu što se može reći da su policijski službenici vršili jedan pojačani obilazak terena, pojačanu kontrolu vozila i vozača, te u skladu s tim preduzimali mjere i radnje u skladu sa zakonom. Ukupno je zadržano u službenim prostorijama 68 vozača kod kojih je utvrđeno da posjeduju više od 1,5 g/kg alkohola u krvi. Kada je u pitanju mirujući saobraćaj, policijski službeni su ukupno uručili 1294 prekršajna naloga. Od ukupnog broja registrovanih prekršaja u saobraćaju, 208 se odnosi na upravljanje vozilom pod dejstvom alkohola, 124 upravljanje vozilom bez položenog vozačkog ispita, 183 korištenje mobilnog telefona, 390 nekorištenje sigurnosnih pojaseva itd. Kada se sagledaju ovi parametri, može se reći da je stanje saobraćaja i broj saobraćajnih nezgoda na području ove lokalne zajednice na zadovoljavajućem nivou. Kada je u pitanju segment mirna okupljanja, može se reći da je u ovoj 2020. godini bilo manje javnih okupljanja i sve je to odraz trenutnog stanja epiedmiološke situacije, tako da je ukupno održano 53 javna skupa, dok je 2019. godine ukupno održano 125 javnih skupova. Uglavnom, većina se javnih skupova odnosi na predizborne aktivnosti. To su manji skupovi u čijem je osiguranju učestvovalo 106 policijskih službenika. Kada je u pitanju segment pružanje pomoći drugim organima koji obavljaju poslove po osnovu javnih ovlaštenja, u toku 2020. godine primilo smo 5 zahtjeva za pružanje asistencija, dok je u 2019. godini su zaprimljena

2 zahtjeva za pružanje pomoći. Kada je u pitanju zakonitost u radu policijskih službenika, tokom 2020. godine ukupno je podneseno 6 predstavi na rad policijskih službenika. Policijski službenici su u jednom slučaju upotrijebili sredstva sile i to fizičku snagu i sredstva zavezivanja, dok je zabilježen jedan slučaj napada na policijskog službenika koji je dobio lakše tjelesne povrede. Kada je u pitanju segment rada policije u zajednici, policijski službenici koji su zaduženi za ovu oblast su nastavili i u 2020. godini i pored loše epidemiološke situacije sa provođenjem određenih projekata po školama, vršili obilaskе mjesnih zajednica, vladinih i ne vladinih udruženja, predstavnika vjerskih zajednica, tako da smo razmjenjivali te neke bitne činjenice koje su bitne za naš rad, a i ukupnu sigurnosnu situaciju. Kada je u pitanju migrantska kriza, odnosno migranti, mi imamo sačinjen Plan kao i svaka organizacija jedinica policije po kojem postupamo. Može se reći da u 2020. godini nismo zabilježili niti jedan bezbjedonosno interesantni događaj u kojem su učestvovali migranti. Bilo je sredinom 2020. godine prijava u nekoliko slučajeva da su se migranti počeli „na svojoj ruti“ kretanja od Sarajeva prema Srednjoj Bosni i Unsko-Sanskom Kantonu, useljavati u pojedine objekte koji su napušteni i devastirani. Međutim, mi smo i tim svojim Planovima obuhvatili da vršimo pojačan obilazak tih lokaliteta tako da je ta negativna pojava svedena na minimum, a u posljednje vrijeme nemamo uopšte takvih situacija. I dan danas, za očekivati je i bolje dane, pojačano prisustvo migranata po ulicama, raskrsnicama, ispred tržnih centara i mi ćemo kroz planske aktivnosti vršiti pojačan obilazak i u koordinaciji sa Službom za poslove sa strancima, migrante vraćati u prihvatne centre ukoliko rade neke nezakonite radnje, prekršaje ili krivična djela. Ukoliko nisu registrovani, predavat ćemo ih Službi za poslove sa strancima. Dakle, kada je u pitanju migrantska situacija, migrantska kriza, mi možemo sveobuhvatno biti zadovoljni sa situacijom kada je u pitanju migrantska populacija u odnosu na ostale lokalne zajednice na području Kantona Sarajevo.

ALMA OMEROVIĆ – predsjedavajuća

Zamoliti ću vijećnike da postave pitanja, pa onda da komandir odgovori.

MIRSAD KURSPAHIĆ – komandir PS Ilijaš

Ono što mogu odgovoriti ću odmah, a što ne, onda ću dostaviti u pisanoj formi.

SEID BEKTIĆ – vijećnik SDA

Imam dva pitanja i odnose se na 15.11.2020. godine. Moje prvo pitanje glasi ovako: „Je li okupljanje pristalica i simpatizera i članova koji su podržavali kandidata za poziciju načelnika općine Ilijaš delegiran od strane političkih partija tzv. „Četvorke“ koji je održan u periodu od 15.11.-18.11.2020. godine pravoremeno i u skladu sa odredbama Zakona o javnom okupljanju Kantona Sarajevo, najavljen Sedmoj PU MUP-a KS?“. Molio bih gospodina da to pribilježi i odgovori danas ili u pisanoj formi na slijedećoj sjednici.

Drugo pitanje: „Ko je u evidenciji Sedmoj PU, PS u Ilijašu registrovan kao organizator, odnosno lice koje je bilo zaduženo za pripremu, sazivanje i osiguravanje mira tokom skupa održanog neposredno nakon okončanja glasanja na biračkim mjestima u općini Ilijaš 15.11.2020. godine?“.

Jedno privatno pitanje za gospodina: „Je li po njegovoj naredbi pisan prekršajni nalog Seidu Bektiću koji je pokušao da uđe u općinu 16.11.2020. godine da ovjeri dokumente gdje je grupa simpatizera „Četvorke“ onemogućila zviždanjem, aplaudiranjem i ostalim, gdje je policijski službenik po prezimenu Berović legitimisao dotičnog u autu i nakon par

dana poslao prekršajni nalog u iznosu od, čini mi se, 110,00 KM. Gospodin nije tražio vozačku, saobraćajnu. Da se razumijemo, nosio sam masku, bio sam vezan, a dobio sam prekršaj da nisam imao upaljena svjetla, a auto je bio upaljen. Znači, zamolio bih gospodina da odgovori na to pitanje ukoliko zna, a ukoliko ne zna, neka pošalje službeno odgovor općinskoj službi, Općinskom vijeću i meni lično.

Dalje, zamolio bih gospodina da mi odgovori na slijedeće pitanje: "Kako je moguće da dan poslije izbora i u izbornoj noći pred zgradom Općine Ilijaš građani ne nose maske, a prije toga kaznili ste mene dok sam se sa suprugom razmjenjivao u autu ispred kafića „Bulevar“ u Ilijašu na cesti?". Tada sam dobio informaciju da je gospodin komandir ili neko ko je već bio u autu, da je on izričito rekao „pišite ovog momka“. Znači, samo što sam izašao 30 sekundi zbog djeteta koje je plakao i trebala ga je majka preuzeti, ja sam se samo trebao zamijeniti za vozač i suvozač, stali smo, upalili sva četiri pokazivača smjera i u tom momentu policajac je izašao i rekao pomaknite auto, kao nepropisno zaustavljeno. Kasnije sam dobio prijavu da sam nepropisno parkirao auto. Ja sam se samo zaustavio zato što je bila hitna i nužna situacija, upalio sva četiri pokazivača smjera što znači da sam dao do znanja da nešto nije uredu, gdje bi policajci sa vama u autu (tako sam dobio informaciju) se zaustavili i kao kaubojski istrčali i rekli gospodine pomaknite auto, ne nosite masku i napisali mi prekršaj u iznosu od 500,00 KM.

ALMIR ŠPIODIĆ – vijećnik NIP-a (poslovnička intervencija)

SEID BEKTIĆ – vijećnik SDA

Gospodine Špiodiću, molim da ušutite. Ja neću praviti cirkus, ovo je sjednica OV-a i ja neću dozvoljavati da mi se ulazi u riječ. Je li vam to jasno?

ALMA OMEROVIĆ – predsjedavajuća

Seide, još 15 sekundi imaš.

ALMIR ŠPIODIĆ – vijećnik NIP-a (poslovnička intervencija)

SEID BEKTIĆ – vijećnik SDA

Zamoliti ću Alma da ga isključite da završim.

ALMA OMEROVIĆ – predsjedavajuća

Samo sekundu, ja vodim sjednicu i pazite.

SEID BEKTIĆ – vijećnik SDA

Ja imam pravo da postavim pitanje komandiru.

ALMA OMEROVIĆ – predsjedavajuća

Seide stani, sačekaj. U pitanju je poslovnička intervencija, nastavićeš poslije. Imat ćeš 30 sekundi.

ALMIR ŠPIODIĆ –vijećnik NIP-a (poslovnička intervencija)

Ja se zaista izvinjavam gospodinu Seidu Bektiću ako ga prekidam u njegovom iznošenju. Mislim da ovo što on iznosi su lične stvari. Tačka dnevnog reda je Informacija o stanju sigurnosti na području općine Ilijaš za 2020. godinu i trebalo bi da usmjerite diskusije u tom pravcu.

ALMA OMEROVIĆ – predsjedavajuća

Neosnovana poslovnička intervencija. Postavljamo pitanja i diskutujemo. Seide imaš još 30 sekundi za diskusiju i molim vas da malo tiše govorite. Znači, 30 sekundi, vrijeme pratimo i da se samo poštujemo.

SEID BEKTIĆ – vijećnik SDA

Samo da se vratim na temu. Gospodin Špodić me prekida i ja ne volim ta upadanja koja nisu osnovana.

ALMIR ŠPIODIĆ – vijećnik NIP-a (poslovnička intervencija)

Nisam vas prekidao, tražio sam Seide poslovničku intervenciju. Molim vas naučite šta je poslovnička intervencija.

SEID BEKTIĆ – vijećnik SDA

Molim te da me ne prekidaš dok govorim. Hoću da završim svoje, pa onda govori šta imaš, želiš i šta hoćeš da kažeš. Ja imam svoje da kažem i čekam dva mjeseca da kažem ovo i nemoj da me zaustavljaš, je li ti jasno! Hoću komandiru policije da pokažem slike.

ALMA OMEROVIĆ – predsjedavajuća

Seide nemoj da povisuješ ton, imaš 10 sekundi.

SEID BEKTIĆ – vijećnik SDA

Hoću komandiru policije da pokažem slike na kojima se vide ljudi koji ne nose propisno maske, bez maski su, a meni se pisala kazna nakon 30 sekundi izlaska iz auta.

ALMA OMEROVIĆ – predsjedavajuća

Seide sačekaj, ja vodim sjednicu. Isteklo ti je vrijeme, fotografije vidimo i znači idemo dalje.

Za riječ se javio Semir Dedić, pa Alen Arnautović.

Molim vas nemojte dobacivati, nemojte da moram opominjati i hajdemo se samo poštovati. Seide zamolit ću te da sjedneš na svoje mjesto kada predaš fotografije. Još jedna opomena, predaj fotografije i vrati se na svoje mjesto.

SEID BEKTIĆ – vijećnik SDA

Mene ste kaznili pet puta, a ove ovdje niste niti jednom.

ALMA OMEROVIĆ - predsjedavajuća

Seide, druga opomena po ovoj tački dnevnog reda. Molim te vrati se na svoje mjesto, poštuju dnevni red i dozvoli kolegici da diskutuje.

MIRSAD KURSPAHIĆ – komandir PS Ilijaš

Jesam li ja ovdje da me neko linčuje?

ALMA OMEROVIĆ – predsjedavajuća

Oprostite, evo ja sam kolegu opomenula drugi put.

MIRSAD KURSPAHIĆ – komandir PS Ilijaš

Ja ću napustiti sjednicu, obavijestiti svoje nadležne, a svaki vijećnik neka pismeno dostavi svoje pitanje i odgovore ćemo dostaviti pismeno. Neću ja sada ovdje njemu odgovarati što mu je neko napisao prekršajni nalog.

ALMA OMEROVIĆ – predsjedavajuća

Dala sam riječ kolegici, opomenula Seida Bektića i Seide još jedna opomena i morat ćeš napustiti sjednicu. Dakle, zamolit ću te da isključiš mikrofon, da poštujemo jedni druge, komandir će zapisati pitanje, odgovarati i nema potrebe za nekim ovakvim stvarima. Pratim vrijeme svakom vijećniku i molim vas ne dobacujte bez moje dozvole.

SEMIR DEDIĆ – vijećnik SDA

Imam dva pitanja:

1. Jesu li službenici Sedme PU, odnosno PS Ilijaš, po službenoj dužnosti, bili prisutni održavanju nezakonito organizovanog okupljanja pristalica tzv. „Četvorke“, te protivno naredbama i preporukama kriznog štaba Federalnog ministarstva, odnosno naredbama kriznog štaba Ministarstva Kantona Sarajevo?
2. Jesu li službenici Sedme PU zaprimili poziv za pomoć u osiguravanju mirnih i dostojanstvenih uslova za rad uposlenika Općine Ilijaš u periodu od 15.11.-18.11.2020. godine? Je li uslijedila blagovremena nužna reakcija?

ALEN ARNAUTOVIĆ – vijećnik SDA

Postavit ću jedno pitanje: „Je li Ministarstvo unutrašnjih poslova KS, odnosno Sedma PU blagovremeno obaviještena o naredbama Kriznog štaba Federalnog ministarstva zdravstva, odnosno Kriznog štaba kantonalnog ministarstva zdravstva u pogledu ograničenja okupljanja na otvorenom prostoru i je li determiniran način postupanja u slučaju kršenja istih?. Navest ću samo da je Krizni štab Ministarstva zdravstva Kantona Sarajevo 04.11.2020. godine donio dvije naredbe u kojima zabranjuje okupljanje ne više od 30 osoba u zatvorenom prostoru i ne više od 60 osoba na otvorenom prostoru i da ova naredba stupa na snagu danom donošenja i da će se primjenjivati od 15.11.2020. do 31.12.2020. godine.

## ANEL BUMBULOVIĆ – vijećnik SDA

Prije svega, ja bih da pohvalim rad Sedme PU i njihov rad je veoma bitan za sigurnost svih naših građana i svaka pohvala za njihov trud i rad. Međutim, imao bih par pitanja i ono što je meni „zaparalo“ oči prilikom čitanja ove Informacije.

Pitanje: „Koliko je na području Općine Ilijaš tokom prethodne godine registrovano saobraćajnih prekršaja, uključujući one iz nepropisnog parkiranja i možete li uporediti taj podatak iz 2019. godine i obrazložiti razliku ukoliko ona postoji?“. Ja bih se još malo bavio ovom analizom, čisto da iznesemo neke činjenice. Malo ćemo i matematikom da se bavimo. Ja sam našao Izvještaj MUP-a KS da je broj uručenih prekršajnih naloga u Kantonu Sarajevo došao do pada za nekih 2,9% na teritoriji cijelog Kantona, a samo je u Ilijašu došlo do povećanja, po mojoj računici, za nekih 110%, pa me zanima na osnovu čega je?

Obzrom da se ovdje radi o našim građanima, ja bih se ovdje nešto i finansijski računao. Naime, ovih 900 kazni za maske i to je cca, ako uplate odmah, 225.000,00 KM, 8300 prekršajnih naloga po 40,00 KM to je prosjek i to je cca 334.000,00 KM. Kada to sve saberemo, našim građanima je u protekloj godini uručeno kazni u vrijednosti 559.840,00 KM i kada to podijelite po glavi stanovnika to znači da je svaki stanovnik morao platiti bilo koju kaznu neke vrijednosti 29,00 KM. Sada mene zanima da mi neko obrazloži da li je to realno i šta se ovdje zapravo dešava?

Svakako da podržavam da policija nastavi svoj posao, ali da ovoliki broj prekršaja u Ilijašu bude i ne znam da li u Zakonu postoji neka stavka gdje se vozač može prvo upozoriti, a ne odmah da se uruči kazna. Ipak, naši stanovnici nisu toliko imućni i nemaju tolika primanja da bi se moglo izdvajati. Dakle, nije mi jasno zbog čega je ovolika razlika u odnosu na Kanton i zato bih želim da mi neko malo pojasni, ako je moguće.

## DENIS DILBEROVIĆ – vijećnik SDA

Pitanje: „Jeste li na neki način participirali ili bili konsultovani u procesu kreiranja Zaključka Ministarstva unutrašnjih poslova KS u čijem meritumu je evidentan prijedlog da se problem preopterećenja prihvatnih kampova za migrante riješi na način premještanja određenog broja njih u kasarnu Bijambare, na području Nišićke visoravni, Općina Ilijaš?“. Smatrate li vi, pored svih potencijalnih lokacija na drugim općinama u Kantonu Sarajevo, racionalnim i za građane Općine Ilijaš prihvatljivim, prijedlog MUP-a KS da se područje Bijambara koje je pri tome Zakonom proglašeno zaštićenim pejzažom i namijenjeno za naučna istraživanja, edukaciju, rekreaciju i turizam, pretvori u mjesto naseljenim licima ne rijetko sklonim socijalno neprihvatljivim oblicima ponašanja?“.

## MEHMED SINANOVIĆ – vijećnik SDA

Pitanja:

1. Da li ste upoznati sa devijentnim i društveno neprihvatljivim, agresivnim i krajnje opasnim načinima slavlja imaginarne izborne pobjede u Crnoj Rijeci tokom noći 15.11.2020. godine kada su nasesljem odjekivali čak i pucnji iz vatrenog oružja?
2. Na fonu dosadašnjih pitanja i diskusija, smatrate li moralnom obavezom da, zbog nesavjesnog obavljanja dužnosti u predizbornim i postizbornom periodu selektivne primjene propisa i pristrasnog i neobjektivnog postupanja u vrlo delikatnim, po zdravlje rizičnim uslovima, preuzmete dio odgovornosti i

uputite javno izvinjenje, prije svega, građanima Općine Ilijaš kojima je nekoliko dana bilo onemogućeno konzumiranje prava na pomoć i zdravstvenu zaštitu, a zatim zdravstvenim radnicima Doma zdravlja Ilijaš kojima je rad bio znatno otežan. Ne mislite li da bi bilo krajnje korektno da uputite javno izvinjenje načelniku Općine Ilijaš koji je svojim predanim radom i svojim nesebičnim zalaganjem Općinu Ilijaš učinio atraktivnim mjestom ugodnog življenja, zbog toga što ste tokom prethodnog perioda, vjerovatno po instrukcijama viših instanci, podržavali necivilizovane, maliciozne pokušaje destrukcije njegove neprikosnovene reputacije.

**ALEN HASKOVIĆ – vijećnik SDA**

Mene, kao vijećnika, interesuje većina odgovora koje su postavile moje kolege, a posebno ona pitanja koja se tiču održavanja protesta neposredno nakon Lokalnih izbora, poslije 15.11.2020. godine. Također me interesuje da li je Policijska uprava Ilijaš poduzela neku vrstu aktivnosti u cilju ispitivanja počinioca koji su u izbornoj noći bacali flaše na kuću našeg aktuelnog i tadašnjeg načelnika gospodina Akifa Fazlića?

Pored svega toga, ja ne mogu da ne pohvalim rad Odjeljenja za kriminalističke poslove PU Ilijaš na čijem čelu se nalazi gospodin načelnik Gačanović, jer se iz ove Informacije vidi da su oni pojačali rasvjetljavanje krivičnih djela. Ukupno su riješili 99 slučajeva od ukupno 135, što je 73% od ukupno prijavljenih krivičnih djela.

**ELMA MASNOPITA – vijećnica SDA**

Pitanja:

1. Koliko je konkretno učesnika spornog skupa (govorim o skupu ispred zgrade Općine Ilijaš između 15.11. i 18.11.2020. godine) kažnjeno zbog nepoštivanja propisanih higijensko-epidemioloških mjera, između ostalog, nepropisno nošenje zaštitnih maski, te neodržavanje preporučene fizičke distance od 2 metra?
2. Koliko je na području Općine Ilijaš, uz izuzetak održavanja pomenutih masovnih okupljanja u postizbornom periodu, registrovano kršenja propisanih epidemioloških mjera ponašanja, te koliko je istih novčano sankcionisano?

**MEHO HIDO – vijećnik NIP-a**

Moje pitanje nije lično, nije u ime političkog subjekta, nije dirigovano iz nekog „centra moći“, nego je moje pitanje u ime građana naselja Srednje i okoline da mi odgovorite onoliko koliko znate, a pitanje glasi:

1. Dokle se stiglo sa Policijskom stanicom u Srednjem i formiranjem policijskog odjeljenja?

**MUHAMED HANDŽIĆ – vijećnik SBB-a**

Selamim komandira i želim mu dobrodošlicu i da se ugodno osjeća u ovim prostorijama u



kojima mi radimo. Moram da primjetim da komandir želi da postavi barijere između nas, kao zakonodavne vlasti na ovoj općini, i njega, kao organa koji egzistira u našoj lokalnoj zajednici, na način da će napustiti sjednicu. Meni je ovo treći mandat i to se do sada nikada nije desilo. Mi smo ovdje dočekali i ispratili više od deset komandira Policijske uprave u Ilijašu i imali smo izuzetno korektan odnos i dobru saradnju sa svim komandirima koji su do sada bili. Ne znam zbog čega takve tenzije i zbog čega stavljati barijeru između vas i nas, kao vijećnika, odnosno vas i u ovom slučaju, koliko sam kolege uspio čuti, građana, a radi se o slijedećem i navest ću i činjenice. Molim vas, 952 građana je sankcionisano po pitanju Zakona koji je donijela Civilna zaštita. U općini koja broji 20.000 stanovnika, a računajući i one koji su otišli na privremeni rad i ne vjerujem da nas ima više od 15-16.000 ovdje. Dakle, to je negdje 7-8% kažnjenih stanovnika na području Općine Ilijaš. Ništa lično neću govoriti za sebe, a doživio sam i ja neprijatnosti, kao i moje kolege koje su sa malo jačim tonom istupile ovdje, od strane policije i provođenja Zakona na našoj općini. Moram priznati da ove mjere koje se provode u Kantonu Sarajevo su najviše izražene na našoj općini i čini mi se da je naša općina postala poligon za treniranje strogoće kad se tiče Policijske uprave, a kolega ne znam kako ćete to Vi shvatiti, a dobro bi bilo da shvatite onako kako sam ja rekao, da je Ilijaš kaznena ekspedicija za ove koji nam dolaze ovdje da rukovode policijskim organom. U kojem smislu kaznena ekspedicija, da ne biste drugačije protumačili? Ko god treba da dobije veći čin ili treba da ga unaprijede, prvo „idi u Ilijaš, jer dole trebaš ono stanje malo prodrmati tamo-ovamo, pa idete dalje“. I ovo ću reći – mene je bilo stid kada policijski službenik na Banovcu zapisuje svog komšiju zbog nenošenja maske prvo, a u vozilu sjedi njegov (ne odnosi se na ovog čovjeka koji je iza mojih leđa-komandir), komandir nižeg ranga, jer sam vidio da ima dvije zvjezdice i mora zapisati svog prvog komšiju, prijatelja, a čovjek je samo iznio smeće da baci u kontejner na Banovcu bez maske i zapisao ga je i čovjek je dobio kaznu 500,00 KM. To je tužno šta se radi. Iz tog razloga gospodine komandiru mi želimo vama da sugerišemo ovdje one činjenice koje nama smetaju, kao građanima, a mi smo predstavnici građana i prenosimo ovdje njihova pitanja i probleme.

ALMIR ŠPIODIĆ – vijećnik NIP-a

Ja zaista pozdravljam rad policijskih službenika, ali kada kažem „policijskih službenika, mislim na momke koji su na terenu i koji svaki dan, iako ih je malo, uspostavljaju red i mir na području Općine Ilijaš. Zaista je i meni, kao vijećniku, neprihvatljivo da neko trenira strogoću nad građanima Općine Ilijaš u smislu kažnjavanja zbog nenošenja maske, a isto tako u ovom Izvještaj je za pohvaliti broj riješenih krivičnih djela u ovoj godini, što nije bio slučaj u proteklim godinama u izvještajima. Ovu do sada diskusiju, kako predsjedavajuća reče da su to bila pitanja od strane vijećnika iz pozicije (vijećnika iz SDA), pomognuti i nekim drugim, je zaista nekorektno. Prije svega, tražim da u kodeks Etičke komisije se uvede i da mi se dostavi stenogram Zapisnika sa ove sjednice o povišenom tonu i prijetnji da „ušutim, tišina“ od gospodina Bektića. Mislim, ako on ima nešto na ličnoj osnovi, ovdje nije vrijeme da raspravljamo o tome. To je jedna stvar. Kolega Sinanović je kroz svoje izlaganje iznio neistine da je neko bacao flašu, paušalne neistine da je neko bacio flašu na kuću gospodina Akifa Fazlića.

HALID DIZDAREVIĆ – vijećnik SDA (poslovnička intervencija)

Nalazimo se na tački koja se zove Informacija o stanju sigurnosti na području općine Ilijaš za 2020. godinu. Svi vijećnici su postavili pitanja, iznijeli svoje stavove, svoja mišljenja, kao i kolega Sinanović i ne znam koga ste još spomenuli i ne možete vi sada nešto tvrditi da je

nešto istina ili neistina na osnovu svojih pretpostavki. Dakle, mi postavljamo pitanja komandiru. Da li je to istina ili nije istina i mi tražimo je li istina.

ALMA OMEROVIĆ – predsjedavajuća

Kolega Halide prekinut ću vas da kolega Špiodić nastavi.

MEHMED SINANOVIĆ – vijećnik SDA (krivi navod)

Ja nisam spominjao nikakve flaše kolega Špiodiću.

ALMA OMEROVIĆ – predsjedavajuća

Zamolit ću vas kolega Špiodiću da nastavite, produžit ću vam vrijeme diskusije 30 sekundi. Molim vas nemojte upućivati poslovničke intervencije tamo gdje nisu osnovane. Kolega Špiodić upućuje pitanje i svoje konstatacije, a na kraju ćemo krivi navod ili šta već, ali samo da se ispoštujemo.

ALMIR ŠPIODIĆ – vijećnik NIP-a

Svakako biće prilika da diskutujemo i repliciramo i hvala predsjedavajuća, ipak ste me u zaštitili u ovom momentu. Znači, konkretna pitanja koja se odnose na Sedmu PU upravu, PS Ilijaš, odnose se i na sami red održavanja izbora koji su se desili u nedjelju.

Šta je urađeno po nasrtanju nekih članova Vijeća na određene ljude koji su se nalazili u blizini biračkog mjesta? Čini mi se da je kružio neki audio snimak i dokaz o fizičkom nasrtaju.

HALID DIZDAREVIĆ – vijećnik SDA (krivi navod)

ALMIR ŠPIODIĆ – vijećnik NIP-a

Predsjedavajuća, molim vas, ja postavljam pitanja.

ALMA OMEROVIĆ – predsjedavajuća

Halide, molim vas. Kolega postavlja pitanje komandiru, a poslije ćemo otvoriti diskusiju.

ALMIR ŠPIODIĆ – vijećnik NIP-a

Ja cijenim da vi imate potrebe da replicirate, da me „presijecate i to je vaše zakonsko pravo. Ja sam šutio dok ste vi iznosili svoje neistine, pa ćemo kasnije raspravljati o tome. Znači, šta je urađeno po pitanju toga, da li su pokrenuti određeni Zakonski procesi. Isto tako, spominjalo se ovdje održavanje protesta. I ja bih zaista volio da znam da li je neko najavio proteste koji su bili ispred zgrade Općine Ilijaš? Ako jeste, da li ima ta prijava u policijskoj stanici. Koliko sam ja shvatio, to su bili spontani protesti građana, a kroz replike i neke druge stvari ću vam reći šta je iniciralo te proteste. Ako su bili protesti, ja sam neko ko želi demokratski da učestvuje i da radi i želim da omogućim građanima da demokratski mogu iznijeti svoje stavove i svoje mišljenje, a jedan od demokratskih stavova i mišljenja jeste i protest građana. Ja sam vrlo često bio prisutan tu ispred zgrade Općine, pa gotovo svaki dan. Ako je bilo nekih nemilih scena ili događaja koji su se trebali evidentirati ili

prijava policijskoj stanici, volio bih da nam kažete.  
VERNESA BEŠLIJA –vijećnica NIP-a

Pitanje:

1. Koliko je izdato prekršajnih naloga za nenošenje maski prilikom obilježavanja 25. Novembra na centralnom spomen obilježnju u Ilijašu prilikom polaganja cvijeća? Prisutne kolege i kolegice u sali su svjedoci da je bilo osoba koje nisu nosile masku i kada je jedan kolega iz sale sugerisao svom kolegi da treba da nosi masku, on je rekao „ne treba nam maska“. I također kolege problematiziraju nošenje maski na tzv. protestima ispred zgrade Općine Ilijaš, a evo svjedoci smo da ih i sada u sali ne nose. Pratim vas od početka sjednice, ne nosite maske kolega Bektiću i kolega Dilberoviću.

ALEMA DŽAFO – vijećnica NIP-a

Postavljam pitanje, zapravo ono što su građani zahtijevali.

1. Koliko često se službeno policijsko vozilo nalazi na terenu u nekim sporednim ulicama s obzirom da se građani žale da recimo na Karašnici ili ulici iznad Vratuše kreću se vozila veoma velikim brzinama. Tim ulicama se kreće veliki broj djece i roditelji strahuju za sigurnost djece, pa ako je moguće da se poveća broj policijskih vozila u tim ulicama.

ADNAN ABADŽIJA – vijećnik NIP-a

Postavio bih pitanje što se tiče tačke 4. mirna okupljanja, sportske priredbe i drugi oblici okupljanja građana. Ovo što je evidentirano za 2020. godinu, ovdje piše 53 ukupan broj javnih skupova.

Da li su ti svi skupovi bili mirno okupljanje i da li su svi uredno prijavljeni Policijskoj upravi što kolege spominju ostala mirna okupljanja građana koji su bili na određenim udaljenostima i ponašali se onako kako su oni mislili i trebali da se ponašaju prilikom epidemioloških mjera?

ALMA OMEORVIĆ – predsjedavajuća

Postavljamo pitanja, komandir će odgovoriti, pa ću otvoriti diskusiju.

ALAN ŠERAK – vijećnik SDP-a

Možda će kroz diskusiju biti nekih nejasnoća, pa da i to definišemo.

ALMA OMEROVIĆ – predsjedavajuća

Slažem se. Neće biti problem da poslije odgovorite. Čisto sam ovo postavila ovako, da se pitanja postave, jer tako je komandir htio. Znači, otvorit ću diskusiju nakon odgovora, pa se onda možete javiti za diskusije, replike, ali samo da komandir odgovori.

MIRSAD KURSPAHIĆ – komandir Sedme PU Ilijaš

Najviše se pitanja odnosi na nošenje maski, sankcionisanje i ovi skupovi ovdje, hajde da kažem, koji su se spontano održali ispred zgrade Općine Ilijaš u vremenu od 15.11.-19.11.2020. godine.

Ovo okupljanje koje je održano ovdje, krenulo je od zatvaranja biračkih mjesta od 19:00h. Odmah su počela neka spontana okupljanja. Vi znata ovdje, većina vas je bila na području Općine Ilijaš, već su nakon sat vremena neki počeli proglašavati nekakve pobjednike i možda to nije moje da govorim i došlo je do spontanog sazivanja. Mi nemamo organizatora, nama niko nije prijavio mirno okupljanje ni to večer, ni sutradan, ni do 19.11.2020. godine. Znači, mi nismo imali zvaničnu prijavu u Policijskoj upravi. Znači, sve ovo što se dešavalo ovdje, to je bilo putem facebooka, te pristalice pojedinih stranaka se sazivale tu i vidjeli ste kakva su ta okupljanja bila. Ja sam cijelo vrijeme bio ovdje, u nedjelju cijeli dan, bio sam navečer, ponedjeljak cijeli dan, pratili smo tu situaciju. Uglavnom to je bilo uglavnom nekako podnošljivo dok nije došao gospodin Konaković ovdje i tada je došla jedna malo veća grupa građana i došlo je do prekoračenja tih, da kažem, broja lica na jednom mjestu i prešlo je tu brojku od 30. Kada smo vidjeli da je ta brojka počela rasti, (u Naredbi ste vidjeli kada je u pitanju fizička distanca ko provodi tu Naredbu, a to je u opisu posla inspekcija), mi smo pozvali inspekciju. Do mene je dolazio taj inspektor i ja sam ga uputio da vidi šta imamo ovdje i on je pokušavao da razgovara sa nekim licima i fotografisao je to. Mi smo sačinili službenu zabilješku i dostavili inspekciji, a šta je inspekcija uradila, ja stvarno ne znam.

Ta tri dana od 15.11.-19.11.2020. godine, mi smo uručili 19 prekršajnih naloga za nenošenje maski. Mislim da smo odgovorili portalu Ilijaš-net koliko je bilo prekršaja zbog nenošenja maski. Uglavnom, ja sam većinu vremena bio tu, ne mogu reći da nije bilo pojedinačnih slučajeva gdje je neko zapalio cigaretu, uzeo da jede i skinuo je masku, ali ja ne znam ko će biti dole, 10, 15 policajaca stoji ispred, da ne nosi masku, a zna da je to kažnjivo. Situacija je bila pod kontrolom, nije bilo narušavanja javnog reda i mira. Evo načelnika ovdje. Ja sam se s njim čuo i meni što je zaparalo uši da su pojedinci pokušavali da blokirali ulaz. Ja sam naredio da se oslobodi ulaz u zgradu općine. Načelnik je još bio u mandatu, mi smo se čuli telefonom i ja sam držao situaciju pod kontrolom. Jedino je došlo do prekoračenja kada je dolazio gospodin Konaković i mi smo tada zvali inspekciju što je njihova obaveza i to je definisano Naredbom kriznog štaba. Oni su došli, obavili razgovor sa tim tamo licima, fotografisali su, mi smo sačinili zabilješku i dostavili inspekciji. Ja ne znam šta je dalje inspekcija uradila.

Ovo što je gospodin govorio da sam ja naredio policiji, pa nisam ja takva osoba da sjedim u autu i govorim eno tamo neka osoba idi i napiši prekršajni nalog. To moj nivo ne dozvoljava da ja govorim eno onaj tamo je bez maske idi i kažnjavaj. Ako je mene neko vidio u autu sa patrolom, neka slobodno kaže da sam ja to rekao. Naša je obaveza i dužnost da u skladu sa svojim ovlaštenjima radimo gospodo. Znači da sprovodimo donesene Naredbe. Navest ću vam samo jedan podatak. Mene je neko odavde zvao prije na sedam dana održavanja izbora da pita koliko ima građana u samoizolaciji, vjerovatno vezano za one Covid timove. Tada smo imali oko 230 osoba u samoziloaciji. Brojka je izlazila i na 280 građana u samoizolaciji koji su se nalazili na spisku Ministarstva zdravstva. Ja sam imao 8 ljudi koji su samo obilazili adrese. Preko hiljadu obilaza smo imali na mjesečnom nivou. Znači samo smo radili te stvari i nismo mogli svoj posao da radimo. Taj broj je išao i kretao se od 150-200 ljudi i to se može provjeriti lako. Znači od 150-200 cijeli decembar se kretao. Kada imamo toliki broj zaraženih i mene iz MUP-a zovu i pitaju šta je to kod vas, radite li išta. Jedan Centar ima 70 lica, a mi imamo 150 lica na spisku za samoizolaciju. Mi sada imamo 5 ljudi na spisku za samoizolaciju. Ja ne znam šta je sada problem. Evo niti jedan građanin mi nije došao u kancelariju da mi kaže evo policajac mi je pisao kaznu što je imao masku preko usta, a niti je poslao dopis. Znači, naše je da poštujemo i ja ne gledam šta radi Iliđa ili ko već, ja sam ovdje. I ono što je gospodin rekao da sam ja ovdje poslat zbog činovanja. Meni ne treba činovanje, jer ja za par godina idem u penziju, ali gledam za dobrobit naroda. Vidjeli ste kakva je situacija

bila u gradu i Kantonu, da se umiralo, ko je prebolovao vidio je šta je pretrpio. Znači išao sam na dobrobit toga. A sada što neko misli da sam ja pod nekim pritiskom radio, da je mene neko zvao, nije. To je bila moja obaveza i obaveza policijskih službenika na terenu. Mislim da sam sve odgovorio, ne znam dali sam nekom ostao dužan odgovor.

Ovo što je gospodin rekao da ja pravim neke barijere, mene ne interesuje vaše privatne stvari. Dođite u moju kancelariju. Mi ovdje predstavljamo građane i iznosimo probleme građana, a ovo da li ga je policajac kaznio, ja naredio ili nije naredio, neka dođe. Svaki građanin, ako smatra da je policajac nije postupio u skladu sa Zakonom, ima pouku po pravnom lijeku. Znači ima pravo da traži sudsko odlučivanje.

Načelnik mene zna dobro i da sam uvijek bio za saradnju i dan danas sam za saradnju. U kojoj god sam lokalnoj zajednici bio imao sam rezultate i radio sam svoj posao. Sada ovdje izgleda ako radim svoj posao, ne valja. Ne znam šta je problem. Nađite jednog građanina da mu je policajac uručio prekršajni nalog, a da je imao masku i da je bio kod mene, a da ga ja nisam primio. Ja takvih nisam imao.

Ovo ovdje pred zgradom općine, ja sam bio, evo neka načelnik kaže, zvao me i pitao šta se to dešava. Maltene, pojedinci su počeli nas da linčuju dole da mi idemo, trčimo i nešto salijećemo. Gospodo draga, nije to moj posao. Moj posao je da zaštitim ove ljude ovdje što rade i da omogućim normalan rad i ja sam to radio. Sada, da li je šta inspekcija uradila, ne znam. Ovdje nije bilo organizatora, ovo je bilo samoorganizovano okupljanje i vidjeli ste kako je sve proteklo i kako je sve išlo. To je trajalo nekih 4-5 dana. Vjerujte da policajci nisu išli kući po 24 sata. Nemamo dovoljno policije da stojimo ovdje ispred zgrade općine i da neko nekome ne vjeruje i da čeka kad će neko ući i šta će ko uraditi.

Ovo pitanje gospodina Sinanovića vezano za slavlje u Crnoj Rijeci, vjerujte da ja to prvi put od vas čujem. Ja nemam te prijave da je nakon pobjede tamo neko pucao. Znači, ja nemam tu prijavu i ne znam o tome ništa.

Ovo vezano za bacanje flaša na kuću načelnika, ja to prvi put čujem ovdje. Bio je jedan incident vezan za gospodina Devića, da su neki naišli putem, da su vrijeđali njega i njegovu porodicu i mi smo pronašli ta lica i sankcionisali. Dakle, za bacanje flaša ne znam. Ako je bilo tih situacija trebali ste se obratiti nama pismeno, izašli bi smo na lice mjesta i ako je trebalo raditi uviđaj, uradili bi uviđaj. Vjerujte da ovo tek prvi put čujem.

Naveo sam koliko je uručeno prekršajnih naloga od 15.-19.11.2020. godine.

Pitanje vezano za policijsko odjeljenje u Srednjem, vidite i sami da se sve vrti oko para. Mi nemamo dovoljno ljudi da ovdje pokrijemo, a kamo li da u Srednjem otvorimo stanicu. Uglavnom, sve je gore spremno i pretpostavljam da se čeka prijem policijskih službenika. Meni bi bilo drago i olokšalao bi nam posao. Kada nam patrola treba otići prema Nišićima, treba sat vremena da ode prema Olovu, da proprati B materiju, ja imam dvije patrole i trojicu vođa sektora u toku smjene. Znači, kada patrola ode gore na neku intervenciju, nema je po sat, sat i pol. Ja bih iskreno volio da se to odjeljenje formira prije danas, nego sutra.

Ovo što je gospodin govorio da ja postavljam neke barijere, pa ja sam uvijek bio za saradnju. Gospodo, ja nikada nisam bježao od svoje odgovornosti da ja nešto pokušavam i da ću napustiti sjednicu. Vidjeli ste nastup gospodina. Maltene samo što nije došao da meni skoči za vrat zato što je njemu policajac uručio prekršajni nalog. Mi smo svi ovdje da predstavljamo ove građane ovdje, da im omogućimo normalno življenje, da ih zaštitimo, kako njihovu ličnu imovinsku sigurnost tako i njihovu imovinu. I ja sam prije par dana u Centru parkirao nepropisno, došao policajac i zakačio prekršajni nalogu koji sam platio. Vi tvrdite da ste izašli iz auta, ali je ne mogu to reći, jer nisam bio tu, a to što vam je neko rekao da sam ja bio tu i naredio, taj je to sigurno slagao. Slobodno dođite sa policijskim službenikom u moju kancelariju, moja vrata su vam 24 sata otvorena. Znači, slobodno dođite sa tim policijskim službenikom i neka on kaže da sam ja, ne samo tome, nego bilo

kome, naredio da piše prekršajne naloge.

Već sam rekao za broj naloga, iznio sam neke činjenice koje to potkrepljuju.

Ovo oko čina ne želim da komentarišem.

Treniranje strogoće – maloprije sam rekao da nisam niti jednog građanina primio da se žalio da je imao masku, a da mu je policajac napisao prekršajni nalog. Ne znam na što neko misli da je treniranje strogoće i po kom osnovu.

Ovo pitanje vezano za dan izbora – imali smo jednu prijavu za Stari Ilijaš da se jedna grupa lica na putu ka biračkim mjestima nalazi tu i da kao lobiraju građane koja idu na biračka mjesta. Mi smo izašli na lice mjesta, našli smo grupu lica i oni su rekli da čekaju nekoga. Znači nismo imali pravu informaciju, nismo imali dokaz za to i udaljili smo ta lica sa tog prostora. Bila je to neka grupa od 3-4 lica.

Za vozilo audi koje ste spominjali, ja prvi put čujem.

Pitanje vezano za 25.11.2020. godine, ne mogu vam sada tačno odgovoriti, jer nemam taj podatak, a ako bude trebalo, obratite se pismeno i provjerit ću da li je kome uručen nalog za Dan državnosti. Kod sebe ovdje nemam te evidencije da bih mogao provjeriti.

Ovo što je uvažena kolegica pitala zašto nema policije u tim sporednim ulicama, vjerujte da ja nastojim da pokrijemo sve te moguće ulice. Imamo dvije patrole i trojicu vođa sektora. I ja nekada uzmem auto i moji saradnici i obiđemo ova rubna područja da građani vide policijsko vozilo i ako ima kakvih informacija da prenesemo, a ja ću inače u daljem radu nastojati da policija što češće obilazi i ova područja. Imali smo jednu žalbu u Polomskoj ulici i mi planiramo na mjesečnom nivou jednom ili dva puta provoditi akcije pojačane kontrole saobraćaja gdje akcenat stavljamo na brzinu kretanja.

Neko je postavio pitanje broja prekršaja mirujućeg saobraćaja – nemam taj podatak. Ja sam iznio podatak za 2020. godinu. Kada sam došao ovdje 22.aprila, primili smo više tih žalbi od strane građana da se građani žale da ne mogu da priđu objektima, pogotovo imamo ovdje problem oko Doma zdravlja. Kada se građani žale, imaju pravo da traže povratnu informaciju šta smo po tom pitanju uradili. Evo vidite da je sada stanje prilično dobro. Znači čim se stanje sredilo, evo imali smo problem i kod Šipadovih zgrada isto. Mi smo izašli na lice mjesta, s svaki dan smo imali po 2-3 poziva da su auta nepropisno parkirana. Izašli smo na lice mjesta sa predstavnicima općine i regulisali smo taj prostor i sada nemamo nikakvih problema.

Pitanje da li je skup ispred zgrade općine najavljen – rekao sam da nije bio najavljen, da je samoorganizovan. Uvijek je brojka bila 20, 30, izuzev onog dana kada je bio prisutan gospodin Konaković.

Pitanje ko je u evidenciji PU registrovan kao organizator – odgovorio sam na ovo u prošlom pitanju. Znači nismo imali organizatora i da smo imali organizatora, ja bih to lako riješio. To je bilo sazivanje, da li telefonima, putem facebooka i ne znam ni ja na koji način više.

Pitanje Semira Dedića „Jesu li službenici Sedme PU, odnosno PS Ilijaš, po službenoj dužnosti, bili prisutni održavanju nezakonito organizovanog okupljanja pristalica tzv. „Četvorke“, te protivno naredbama i preporukama kriznog štaba Federalnog ministarstva, odnosno naredbama kriznog štaba Ministarstva Kantona Sarajevo?“ – to je to što sam maloprije odgovarao. Drugo pitanje „Jesu li službenici Sedme PU zaprimili poziv za pomoć u osiguravanju mirnih i dostojanstvenih uslova za rad uposlenika Općine Ilijaš u periodu od 15.11.-18.11.2020. godine? Je li uslijedila blagovremena nužna reakcija?“ – maloprije sam odgovorio. Jedan dan kada sam bio, bilo ih je na ulazu i naradio sam policijskim službenicima da se oslobodi ulaz i oni su prešli na donju stranu ulice i kasnije nije bilo nikakvih problema niti pozivanja. Kada me načelnik zvao, ja sam rekao da ću to omogućiti i da je to moj posao da s omogući normalan rad uposlenika općine i ja kasnije nisam više imao nikakvih prijava ni problema po pitanju toga.

Vijećnica Elma Masnopita je pitala „Koliko je konkretno učesnika spornog skupa (govorim o skupu ispred zgrade Općine Ilijaš između 15.11. i 18.11.2020. godine) kažnjeno zbog nepoštivanja propisanih higijensko-epidemioloških mjera, između ostalog, nepropisno nošenje zaštitnih maski, te neodržavanje preporučene fizičke distance od 2 metra?“ – to sam maloprije odgovorio. Drugo pitanje „Koliko je na području Općine Ilijaš, uz izuzetak odražavanja pomenutih masovnih okupljanja u postizbornom periodu, registrovano kršenja propisanih epidemioloških mjera ponašanja, te koliko je istih novčano sankcionisano“. Ovaj podatak nemam. Misli se na ova 53 okupljanja i to mogu provjeriti i pismeno odgovoriti.

Vijećnik Alen Arnautović je postavio pitanje “Je li Ministarstvo unutrašnjih poslova KS, odnosno Sedma PU blagovremeno obaviještena o naredbama Kriznog štaba Federalnog ministarstva zdravstva, odnosno Kriznog štaba kantonalnog ministarstva zdravstva u pogledu ograničenja okupljanja na otvorenom prostoru i je li determiniran način postupanja u slučaju kršenja istih?. – jednim dijelom sam odgovori na ovo pitanje. Mi smo imali nekih 30-40 građana tu, a drastično je porastao broj građana kada je došao gospodin Konaković, ne mogu se tačno sjetiti koji je to dan bio. Zvali smo inspekciju i mi kao i Krizni štab je dobijao pismene naredne i nama se redovno dostavljaju te pismene Naredbe po kojima mi postupamo, a u toj Naredbi – držanje distance, je u nadležnosti inspekcije, a ne policijskih organa.

Vijećnik Anel Bumbulović je postavio pitanje “Koliko je na području Općine Ilijaš tokom prethodne godine registrovano saobraćajnih prekršaja, uključujući one iz nepropisnog parkiranja i možete li uporediti taj podatak iz 2019. godine i obrazložiti razliku ukoliko ona postoji?“ – maloprije sam rekao cca 1219 ili 1215 u 2020. godini, ali nema podatak za 2019. godinu ovdje. Ako je potrebno provjerit ću i odgovoriti pismeno.

ANEL BUMBULOVIĆ – vijećnik SDA

Volio bih da mi se obrazloži ova razlika u prekršajima.

MIRSAD KURSPAHIĆ – komandir Sedme PU

Ja sam jednim dijelom i obrazložio, ali nije nikakav problem, odgovorit ćemo pismeno. Mi smo imali sigurno 10-15 žalbi građana kada je u pitanju mirujući saobraćaj i svaki dan imamo pozive za parkiranje ovdje ispred općine i Doma zdravlja. Znači svaki dan imamo pozive građana da su parkirana vozila, a rekao sam i za Šipadove zgrade. Nije problem, ja ću vama odgovoriti, samo recite vaše ime i prezime.

ALMA OMEROVIĆ – predsjedavajuća

Izvinjavam se što vas prekidam, ja ću zamoliti našu tehničku službu da vam sva pitanja pripremi pismeno da imate i ne morate sada pisati sva pitanja na koja možda i niste odgovorili

ANEL BUMBULOVIĆ – vijećnik SDA

Samo da pojasnim. Nije ovdje samo u pitanju saobraćaj u mirovanju, parkiranje, nego ukupan broj prekršaja gdje imamo porast od 110% u odnosu na 2019. godinu. Zašto se to desilo? To mene zanima, suština. Zašto je došlo do toga?

MIRSAD KURSPAHIĆ – komandir Sedme PU

Recite vi meni je li vam čudno što je povoljno stanje kriminaliteta?

ALMA OMEROVIĆ – predsjedavajuća

Komandire, Anel je iznio svoje pitanje i ako možete odgovoriti, samo molim vas da ne idemo ovako unakrsno, jer kolege čekaju na diskusije.

MIRSAD KURSPAHIĆ – komandir Sedme PU

Ja sam na jednom sastanku načelniku rekao da ću ja pojačati prisustvo policije na kontroli vozila i vozača. Šta hoću da kažem? Sav kriminal je u noćnim satima i na točkovima. Što mi radimo pojačane kontrole na ovoj glavnoj saobraćajnici ili negdje na sporetnim putevima? Znači, ujedno radimo saobraćajno, a i preventivno na vršenju krivičnih djela. Ja ne znam šta je sada sporno po pitanju toga. Niko nikoga nije kaznio ukoliko nije napravio prekršaj. Možda hoćete da kažete da ja radim mimo zakona ili da moji prethodnici nisu radili u skladu sa zakonom ili nešto drugo. Ne znam na šta aludirate. Ja tražim od svoje policije da radi na terenu, da zaradi svoju platu, a ne da hoda i tih dvanaest sati koristi službeno vozilo, a nije obišao neko naselje. Znači, tražim da se radi i da imaju rezultati rada. Ako niste zadovoljni odgovorom, ja vam mogu provjeriti u evidenciji u policijskoj stanici.

Zamolio bih predsjedavajuću OV-a da mi se ova pitanja na koja nisam odgovorio dostave pismeno.

Još jedno pitanje vijećnika "Jeste li na neki način participirali ili bili konsultovani u procesu kreiranja Zaključka Ministarstva unutrašnjih poslova KS u čijem meritumu je evidentan prijedlog da se problem preopterećenja prihvatnih kampova za migrante riješi na način premještanja određenog broja njih u kasarnu Bijambare, na području Nišićke visoravni, Općina Ilijaš?". Nas niko nije zvao kao Policijsku stanicu i Policijsku upravu, ni mene ni načelnika. Ja sam slušao našeg ministra koji je prisustvovao tom sastanku i njemu je obećano da nema otvaranja novih kampova, da nema prijema novih mognanata, tako da se nadam da neće biti ni na području ove lokalne zajednice.

Vjerujte, možda to malo zvuči čudno, ali dok sam bio komandir na Ilidži kada je došlo onih 17 autobusa iz Bihaća, ja nisam imao pojma vjerujte. Ali ja se držim da ministar stoji iza toga, bio je sa ministrom sigurnosti, da ima obećanje predstavnika IOM-a da neće doći do povećanja migranata, već da će se nastojati da se to smanji i da se migranti rasporede. Ja imam takvu informaciju, a napismeno nemamo ništa.

ALMA OMEROVIĆ – predsjedavajuća

Zahvaljujem se komandiru i nadam se da su vijećnici bar dijelom zadovoljni odgovorima, a svakako ćemo vam dostaviti i pismenoj formi, a i neke kolege su tražile da odgovore dostavite pismeno. Otvaram diskusiju po pitanju ove tačke dnevnog reda.

Neka kolege diskutuju, pa ako ima potrebe komandire vi odgovorite.

SEID BEKTIĆ – vijećnik SDA

Osvrnuo bih se na govor gospodina komandira. Reći ću mu jednu stvar. Nije na ličnoj osnovi, ali primjena policijske sile od strane policijskih službenika je bila na ličnoj i privatnoj



osnovi. Hoću vam reći jednu stvar. Dao sam vam slike, pogledali ste ih. Reći ću vam, imenom i prezimenom znate te momke sa tih slika. Znamo ih svi. Jedan je i vijećnik. Nosio je nepropisno masku. Da li je kažnjen pred Općinom Ilijaš? Ako sam ja kažnjen za 30 sekundi iz razmjene vozačevog i suvozačevog mjesta zato što je bebe neprekidno u autu plakala, pa sam morao zaustaviti automobil, upaliti sva četiri pokazivača smjera. Zašto gospoda koja je bila pred općinom nije kažnjena, evo sjede sa nama u sali. Vidi se na slikama, imate na slikama ispred sebe, imate kandidata za načelnika, imate kandidata za načelnika općine Ilidža koji je gostovao u Ilijašu tih dana i stoji na cvijetnjaku ispred općine na šetalištu. Je li gospodin Muzur kažnjen, je li Amar Dovadžija koji je bio kandidat za načelnika kažnjen, za nenošenje maske, za nepropisno korištenje maske u javnom prostoru, ako sam ja mogao biti kažnjen i bilo koji drugi građanin općine Ilijaš, pa vas molim da date neku informaciju po tome, a vjerujem da će i kolega da odgovori da nije kažnjen i da nisu kažnjeni.

Ono na što bih se htio osvrnuti je slijedeće: kažete da su okupljanja ispred općine bila spontana. Mi znamo ko ih je pravio, a i vi znate. To su simpatizeri „Četvorke“, a neki i sjede ovdje u općinskoj sali, ali hoću ovo da vam kažem – oni su se okupljali spontano, tri dana se ljudi okupljali spontano, a Policijska uprava ne djeluje ništa u smislu da organizuje i identifikuje ljude koji su zaduženi za to, ko to, mislim treba najaviti skupove, pogotovo u ovim situacijama Covida. Druga stvar, kada ste vi došli u PU Ilijaš, mi smo se okupljali u 4. i 5. mjesecu u Starom Ilijašu na benzinskoj pumpi „Tranzit“. Bio je povećan broj okupljanja građana što bi se pila kafa, malo pričalo, jer kafići nisu radili, došli bi policijski službenici PU Ilijaš gdje bi rekli „došao je komandir, moramo vas rastjerati, hajmo nema okupljanja“ itd. Znači, mogli ste rastjerivati građane Starog Ilijaša, odnosno Ilijaša koji su došli na benzinsku pumpu da kupe kafu, popiju, vide se malo sa prijateljima, a kafići nisu radili, mogli ste tada rastjerivati narod, a ispred općine gdje je bilo onemogućeno Seidu Bektiću, kao vijećniku danas, a građaninu 16.11.2020. godine, je onemogućen ulazak u zgradu općine da ovjeri dokumente. Rekao sam vam, nije ništa na privatnoj i ličnoj osnovi. Znači, samo tražim zato što su građani Ilijaša ogorčeni na ponašanje pojedinih kadrova Policijske uprave Ilijaš. Znači da se razumijemo, ne na sve, jer ima časnih, poštenih i vrijednih policajaca. Sektor kriminalistike vidjeli smo da radi dobro i to treba pohvaliti.

MUHAMED HANDŽIĆ – vijećnik SBB-a

Komandir je naglasio da je pojačan intenzitet kontrola saobraćaja. Međutim, iz ovog što smo dobili u izvještaju mi vidimo da je 714 vozila ili učesnika u saobraćaju manje kontrolisano 2020. godine nego 2019. godine, a da su rezultati znatno povećani u smislu prijava prekršajnih. Ja moram napraviti ovdje jednu opasku. Ne znam da li ćete se vi složiti sa mnom ili nećete, ali pretpostavka je moja, nemam činjenica, obzrom da su policijski službenici saobraćajan policije MUP-a KS već pohvatani, pohapšeni tamo u vezi primanja nekih darova itd. što još nije dokazano u vezi zaustavljanja saobraćaja, kontrolisanja itd., ovo je rezultat sigurno na našoj općini da je povećan broj kontrola vozila i napisan broj saobraćajnih prekršaja. Vjerujte, pooštrene su mjere i zato vam čestitam. Čestitam najprije ovoj službi koja se bavila kriminalitetom i ustanovila to i ovo je rezultat što imamo ovoliki broj prekršaja napisan za učesnike u saobraćaju koji su stvarno činili prekršaje. Dakle, to se ne može opravdavati. Na niz pitanja mi ovdje nismo dobili odgovore. Komandir kaže ili ne zna da se to desilo ili izbjegava odgovor na neki njegov način. Ja sam vama rekao da smo imali odličnu saradnju sa svim prethodnim komandirima, ali ne znam šta je problem pa nama nećete da odgovorite na postavljena pitanja. Ne mogu da vjerujem, ovdje predsjednik jednog političkog faktora kaže i poziva „pozvat ću deset hiljada sarajlija da zavodi red u Ilijašu“. Nama ne treba 10.000 sarajlija da zavode red u Ilijašu, mi ilijašani

znamo sebi uvesti red uz pomoć organa koji su za to nadležni. Vi znate ko je pozivao 10.000 sarajlija, vi znate ko je taj i ne vjerujem da ste i to procesuirali. U tom smislu, ja ću tražiti tematsku sjednicu sa ministrom sigurnosti, s komandirima naše policijske stanice i načelnikom Sedme PU i ako je potrebno i nadležnom inspekcijom koja se bavila tim problemom od 15.-19.11.2020. godine. Dakle, da u potpunosti raščistimo taj slučaj. Ne možemo mi ostati na „ja ne znam, ja se ne sjećam“. Mi znamo da je policija politizirana i da su oni instrumenti politike, ali mi ne želimo da se to dešava ovdje. Mi hoćemo da policija bude u službi građana i da bude partner građana, odnosno građani policiji kao što je to i do sada bilo.

MEHMED SINANOVIĆ – vijećnik SDA

Komandire postavio sam dva pitanja i odgovorili ste mi na jednom. Hajde, mogu razumjeti, ovo pitanje je bilo malo duže, ali kako reče predsjedavajuća, dobit ćete u pisanoj formi i to drugo pitanje od službe. Ovo vezano za skupove od 15.-18.11.2020. godine, nije spontano. Zašto se sinoć neko nije spontano sastao i organizovao skup. Imali smo dakle pozivanja po društvenim medijima od strane čak i vijećnika koji sjede ovdje, ali eto nismo imali odovornog za taj skup. Kad kažete i sam Konaković kada je došao, svjedoci ste da su sazivali skup. Ponavljam opet da to ni u kom slučaju nije bilo spontano. Ovo vezano za saobraćajne kazne, pojačali ste prisustvo patrola i kontrole u večernjim satima, pogotovo 2020. godina treba istaći da je većina godine zabranjena kretanja u noćnim satima većini građana, osim onih koji imaju dozvole od strane firmi ili neke druge. Dakle, u tom segmentu moramo znati, pogotovo u martu, gdje je bio strogi lock dawn, odnosno policijski sat od 19:00 do 05:00 ujutro gdje nije bilo velikih kretanja, a imamo opet porast za 110%.

ALMIR ŠPIODIĆ – vijećnik NIP-a (replika)

Kolega Sinanović, a isto i kolega Bektić (mogu i ja njega spomenuti ovako, kao što je i on mene spomenuo) cijelo vrijeme pokušavaju da problematiziraju spontane skupove koji su bili ispred zgrade općine. Niko ne govori o uzrocima spontanih skupova. Kada ste počeli govoriti o imenima, onda ću da vam kažem ime i ne znam zašto kolega Sinanović ode. Znači, na obilježavanju, gospodin Mahir Dević dođe bez maske među sve nas koji imamo maske. To niste primjetili, a primjetili ste Špiodića koji ne nosi masku što nije tačno i nije istina.

ALMA OMEROVIĆ – predsjedavajuća

Kolega, samo da se držimo dnevnog reda. Znači, replicirate na ono što su oni govorili i trudite se da ne pričamo o ljudima van ove sale i što nije argumentovano. Zaista se trudim da vodim sjednicu korektno prema svima.

ALMIR ŠPIODIĆ – vijećnik NIP-a (replika)

Hvala predsjedavajuća, ali niste upozorili gospodina Bektića kada je spominjao načelnika Muzura, Amara itd. Ja nisam čuo, ali možda jeste.

ALMA OMEROVIĆ – predsjedavajuća

Replika vam je neosnovana, pričamo o replikama, a on je samo diskutovao.

ALMIR ŠPIODIĆ – vijećnik NIP-a (replika)

Replikom moram odgovoriti kada me ljudi prozivaju imenom. Znači, kolega Sinanović iznosi neistine, a isto tako i kolega Bektić iznosi neistine konstantno i dezavuišu javnost Općine Ilijaš. Protesti nisu bili organizovani. Protesti su bili spontani i nastali su u izbornoj noći. Evo ako bude neke replika pošto mi treba malo više vremena obrazložiti ću zašto su nastala ta spontana okupljanja građana.

MEHMED SINANOVIĆ – vijećnik SDA (krivi navod)

Kolega Špiodiću rekli ste da sam direktno prozvao vas da ste vi nešto pozivali. Dakle, ni u jednom trenutku moje diskusije nisam spomenuo niti jedno ime.

MEHO HIDO – vijećnik NIP-a (replika)

Kolega Sinanoviću vi niste pominjali imena i ovdje nije problem baratati imenima. Mi imena nećemo spominjati kao što ih vi spominjete iz prostih, ljudskih i moralnih razloga. Komandir je dao odgovore koje je dao. Ja sam zadovoljan tim odgovorima i ne vidim svrhu ovih daljih diskusija i rasprava. Postoje organi zaduženi, znači istražni i vi ako mislite da treba nešto ispitivati, tražiti, to ste trebali pravovremeno raditi na adrese koje je trebalo. Općinsko vijeće i Općina Ilijaš je nas izdvojila da radimo i narod nas je izabrao da budemo konstruktivni. Ovo može otići u nedogled i samim boravkom komandira ovdje, mi utičemo na bezbjednost naših građana. Znači, odvlačimo ga od posla za koji je i zadužen da radi. Ovo što je dato u Informaciji i njegovo obrazloženje i odgovori koje će on dati naknadno, mislim da je sasvim dovoljno.

MEHMED SINANOVIĆ – vijećnik SDA (replika)

Ja nisam pitao Općinsko vijeće, niti općinsku službu, nego sam pitao komandira i mislim i smatram da je on prava adresa za moja postavljena pitanja i mjesto za moju vrstu pitanja.

SEID BEKTIĆ – vijećnik SDA (replika)

Gospodine, ja ću spominjati imena iz jednog razloga, zato što znam da gospoda koja je bila prisutna tu nije dobila kazne, a ja sam je dobio i ostali građani Ilijaša su dobili. Znači, oni nisu zato što su određena politička opcija, a drugi su dobili (ili nisu politička opcija, ili su politička opcija).

ADNAN ABADŽIJA – vijećnik NIP-a (replika)

Ja ne mogu nekome da objašnjavam šta treća radi po pitanju zakona, ali ja često kršim zakon kad sam sam u prirodi, a ne nosim masku. Znači, ako policijski službenik treba non stop da me prati i da me kažnjava, onda nama stvarno treba veliki broj policajaca. Ovo ko je kažnjen, ko je bio ispred zgrade općine, mislim da policija uopšte nije imala potrebe da reaguje, da zaštiti bilo kog uposlenika u općini i bilo kojeg građanina koji je bio tu. To su bili mirni protesti, ljudi su imali maske, a ovo objavljivanje tuđih fotografija bi moglo da se sankcioniše po drugom osnovu.

ALMIR ŠPIODIĆ - vijećnik NIP-a (replika)

Zaista ovo Vijeće ima smisla, vidim kako se kolege uključuju u diskusije i rasprave kada bi oni da dokažu neko pravo i sl. Gospodine Bektiću, ako smatrate da ste vi oštećeni zato što vam je neko napisao kaznu. Imate pravo, kao građanin, demokratskim pravom tužiti tog policajca i ne znam zašto to sada ovdje iznosite. Naime, vi ste došli ovdje i iznosite nama svoj lični problem što je vama neko napisao kaznu. Evo dobio sam i ja kaznu za parking i šta sada ja trebam? Trebali bi sada plakati i zvoniti na sva zvona ako je meni neko napisao kaznu. Napisao mi je kaznu zato što sam bio nepropisno parkiran. Vi dobili kaznu, bili ste van auta bez maske. Ja sam cijelo vrijeme nosio masku, nađite sliku gdje ja nemam masku.

SEID BEKTIĆ - vijećnik SDA

Ima slika.

ALMA OMEROVIĆ - predsjedavajuća

Seide, zamolit ću te da isključiš mikrofona i ovo ti je posljednja opomena da se ne javljaš bez moje dozvole. Posljednja opomena.

Zamoliti ću vas kolege da se ne prepucavate na ličnoj osnovi i da na osnovu pitanja i diskusija budemo konstruktivni i da pričamo. Prekidat ću sve one koji ne budu tako govorili. Evo pustila sam kolegu Špiodića da završi i molim vas nemojte to raditi. Niko ovo ne treba shvatiti po ličnoj osnovi, komandir je ovdje po službenoj dužnosti, mi smo predstavnici naših građana i imamo pravo da pitamo i diskutujemo. Vjerujem da svi u konačnici imamo najbolji cilj, ali za neke stvari koje nam nisu jasne imamo pravo da postavljamo pitanja. Replike su iscrpljene, kolega Alan Šerak se javio za diskusiju.

ALAN ŠERAK - vijećnik SDP-a

Prije svega, vama predsjedavajuća da skrenem pažnju za održavanje reda na sjednici. Ne možemo ovdje galamiti, voditi se nekim ličnim iskustvima, a pogotovo ne prijetiti drugim vijećnicima. To je neprihvatljivo u parlamentarnoj praksi i te stvari, evo apelujem na vas i šefa Kluba SDA da te stvari ubuduće eliminiše.

ALMA OMEROVIĆ - predsjedavajuća (krivi navod)

Kolega ja sam se zaista potrudila i opomenula sam i uradila sve što je po Poslovniku OV-a.

ALAN ŠERAK - vijećnik SDP-a

Jeste, ali skrećem pažnju predsjedniku KV SDA da povede računa o tome kako se vijećnici ponašaju. Pogotovo ne drskim tonom da neko nekome kaže "začepi" ili ne znam kako je to bilo, nije ni bitno.

SEID BEKTIĆ - vijećnik SDA (krivi navod)

ALAN ŠERAK - vijećnik SDP-a

Kad završim, dobit ćeš riječ naravno.

Cijenim komandire da niz nekih stvari evo potrudili ste se da obrazložite, pogotovo vezano za ovo što su kolege iz SDA ovdje pripremile. Ja vidim da ih najviše "žulja" upravo onaj skup podrške jednom od kandidata za načelnika općine, jer su ljudi očito imali sumnju da će doći do zloupotrebe pojedinih pozicija koje jesu ovdje, a isto tako je bilo i opravdano jer su u noći na izborima vidjeli neke stvari, ali da ne licitiramo imenima, to svakako neću. Rekli ste da niste imali koga kazniti iz razloga, jer isti skup nije bio najavljen. Bio je neformalno okupljanje, ljudi su sami od sebe došli dali jednu vrstu podrške. Ali, evo ja vas sada pitam šta ste vi uradili kada je bio završni predizborni skup SDA u Kulturno-sportskom centru Ilijaš, uredno najavljen, on-line prezentacija iz tog dijela, a na bini ste imali preko 40 ljudi.

ALMA OMEROVIĆ - predsjedavajuća (krivi navod)

Krivi navod, ali sačekat ću dok završite.

ALAN ŠERAK - vijećnik SDP-a

Dakle, šta ste po tom pitanju uradili? Da li je skup bio najavljen? Vjerovatno jeste, morao je biti najavljen, a ako nije, šta ste uradili protiv odgovornih lica iz te stranke? Druga stvar, upotreba pirotehničkih sredstava. Gospoda iz SDA vam fino najave PRESS konferenciju pobjedničku i fino vam najave da će biti nekakav pobjedonosni vatromet. Prema mojim informacijama kojima ja raspolazem, niko od vas zvanično nije tražio odobrenje da ispaljuje ta pirotehnička sredstva. Ovdje se sada postavlja pitanje šta ste vi u okviru svojih nadležnosti uradili da isto spriječite. Zvanično ću zatražiti informaciju u pisanoj formi da mi istu dostavite po tom pitanju, jer su vam ljudi fino najavili i fino rekli šta će uraditi, a nisu vam podnijeli zahtjev u Sedmu PU da žele da to rade, jer ako jesu, pa im vi dali neko fiktivno odobrenje, onda ćete mi fino obrazložiti zašto ste im to dali da neko nekoga uznemirava kada to nije javni interes. To nije javni interes i tako se ne možemo ponašati. Cijenim da ste doživjeli neku vrstu katarze, pa da želite disciplinirati sve nas ovdje vezano za nošenje maske. Cijenim da ste doživjeli neku vrstu katarze da nas želite disciplinirati kada je u pitanje vezanje sigurnosnog pojasa u saobraćaju. Ali, gospodo draga, desetina miliona maraka smo uložili u vaše odluke, u vašu opremu da imate s čime da radite i ovdje mi onda dođe podatak da ste imali samo dva puta intervenciju, a tiče se šumske krađe. Je li vaš posao jedino da vi nas kažnjavate ovdje?

ALMA OMEROVIĆ - predsjedavajuća

Kolega, vrijeme vam je istekl. U ime kluba imate pravo osam minuta.

ALAN ŠERAK - vijećnik SDP-a

Dakle, i onda nam se desi, a sad ćete vi to "gurnuti" je li na Upravu za šumarstvo, a ne mogu sami stići da sve pohvataju, a pitat ću gospodina iz Uprave za šumarstvo kolika je to načinjena šteta ovoj lokalnoj zajednici po pitanju nelegalne sječe. Vi samo dva puta intervenisali i to vjerovatno na njihov zahtjev. Da ne govorim o određenoj javnoj imovini u

smislu dječijih igrališta u koja uložimo preko 40.000,00 KM, a koja su 20 m vazdušne linije od vaše Policijske uprave, vandali isti za godinu dana unište. Šta ste uradili po tom pitanju? Ništa. Stvarno ništa, jer se vi previše bavite time da li je neko svezan i da li neko nosi masku. Poražavajući podaci, hiljadu i nešto. Pa ovo je sramota ljudi. Pa nismo mi to više devijantniji, nego što su to na Ilidži, u Centru, u Starom Gradu ili ne znam gdje već.

ALMA OMEROVIĆ - predsjedavajuća

Zamolit ću vas samo da ne povisujete ton.

ALAN ŠERAK - vijećnik SDP-a

Izvinjavam se. Malo me "ponese" ovo, pa moram. Vezano za nedozvoljena parkiranja. Vi ste to uradili u skladu sa Zakonom i cijenim to, ali isto tako bih više cijenio da ste prethodno otišli pa prvo upozorili, jer imate na to pravo, Zakon vam to dopušta, a pogotovo u ulici Hašima Spahića. Vi ste nama, kao lokalnoj zajednici, napravili problem. Jeste li svjesni toga? Mi nismo bili u stanju da izgradimo prostor vezano za saobraćaj u mirovanju u navedenom dijelu grada. Nemamo prostora da to riješimo. Ljudi se snalaze i niko nije ugrožavao odvijanje saobraćaja. Vi odete gore i pet dana zaredom pišete ljude. I ono što je još više poražavajuće, kada vam čovjek postavi pitanje "zašto to radite", drugi kada dođe neko ko je zapisan da se žali, e onda kažete "e taj te prijavo". Kakve su to metode, da bi tog nekog ocrnio u njegovom komšiluku. Je li vam to interes? Ja smatram da se vi morate dokazati malo više na nekom drugom polju, a vezano za šumske krađe pogotovo. Drvni sortimenti moraju određenim saobraćajnicama doći do kranje namjene. Imate gore punktove i rješavajte te stvari. Nemojte se samo baviti da li je neko svezan ili nije svezan. I ujedno da kažem i tebi kolega Handžiću, nisu ih oni našli, jer neće oni jedni na druge u Ilijašu i to treba da ti bude jasno. Radile su to druge agencije, pa smo vidjeli čime su se oni sve bavili i kako i šta rade. Vidjeli smo.

SEID BEKTIĆ - vijećnik SDA (replika)

Ja bih replicirao kolegi iz SDP-a. Slažem se sa jednim dijelom njegove konstatacije, ali samo ću mu reći da nisam niti prijetio, niti se ponašam neadekvatno. Vidim, iz priloženo, i vi povisite ton, tako da je to malo i uredu kada hoćete da naglasite nešto.

MUHAMED HANDŽIĆ - vijećnik SBB-a

Slušam kolege i svi koji smo diskutovali, uglavnom smo fokusirani na određene probleme koje je nužno riješiti. Ovo što je gospodin Šerak govorio, ja to sve potpisujem i mi se u principu slažemo sa našim diskusijama. Moram reći komandiru i vjerovatno se čovjek osjeća malo neprijatno u našem društvu ovdje, ali mi smo jedno od rijetkih Općinskih vijeća koje su birali građani, a ne politike i mi smo produžena ruka građana i iz tog razloga mi prenosimo ove sve informacije od građana na vas i nemojte ovo shvatiti kao neke kritike, nego jednostavno pomoć u rješavanju ovih svih problema koji su se u proteklom periodu dešavali na Općini Ilijaš. Obzirom da danas nismo dobili očekivane odgovore na postavljena pitanja, nismo zadovoljni ni ovim što nam je odgovoreno, predlažem da ovu Informaciju o stanju sigurnosti na području općine Ilijaš za 2020. godinu ne prihvatimo, da je odbijemo i da zakažemo tematsku sjednicu po pitanju sigurnosti na Općini Ilijaš gdje ćemo plasirati sva ova pitanja koja smo danas postavili komandiru i još niz pitanja koja imamo za ministra sigurnosti Kantona Sarajevo gdje bi trebao i on biti prisutan i nadležna

inspekcija Kantona Sarajevo također koja bi trebala biti ovdje. Dakle, ima niz problema koji su se dešavali, ali nisu konačno rasvjetljeni ili nemate dovoljno informacija da nas ubjedite u to da mi imamo adekvatan odgovor za građane. Uglavnom, suština moje diskusije se bazira na zakazivanju tematske sjednice po pitanju sigurnosti na području Općine Ilijaš, a mislim da je ona u velikoj mjeri "sazrela".

ELMA MASNOPITA - vijećnica SDA

Komandiru, vezano za okupljanje za koje uporno tvrdite da taj skup nije prijavljen i da je spontan - možda bi ta informacija i mogla proći da ne govorimo o jednom vremenskom periodu u jeku pandemije. Znači, moje pitanje, ukoliko taj skup nije prijavljen, a vi tvrdite da je spontan, je li to znači da je taj skup nelegalan? Omogućili ste povoljne uslove za širenje zaraze dopuštajući ovo okupljanje i direktno ste odgovorni za narušavanje zdravlja, a pored toga i reda i mira. U svom izlaganju uporno ste govorili da ne znate, ponavljali ste da niste sigurni ko je organizator, te ste nagađali brojke 20, 30. Za mene nije korektan odgovor da nagađate o tim brojkama i da govorite da nemate informaciju. Znači, ukoliko niste imali informaciju, vaše izlaganje mi govori da niste smatrali ni shodnim da ustanovite i zapravo dobijete takve informacije.

DINO ČUSTOVIĆ - vijećnik NIP-a (replika)

Kolegice Elma, građani su se spontano okupili, to je istina, onog momenta kada je član izvršnog odbora SDA ušao u prostorije OIK-a, a nije imao odgovarajuću akreditaciju. To je istina.

ELMA MASNOPITA - vijećnica SDA

I to može biti korektno da je 15.11.2020. godine bilo spontanog okupljanja, ali hoćete li reći da je ta spontanost nastavljena i naredna 3-4 dana?

ALMA OMEROVIĆ - predsjedavajuća

Zamolit ću vas da ne dobacujete. Kolega je napravio malu iznimku, replika se daje kada se završi diskusija i molim vas da diskusije ne prekidate.

ELMA MASNOPITA - vijećnica SDA

To mi zaista nema smisla. Za prvi dan, uredu, spontano se građani okupili, ali naredna tri, to već nije spontano. Moje pitanje jeste za izlaganje komandira gdje je kalkulisao brojkama 20, 30 prisutnih ispred zgrade općine i onda ste rekli da je do porasta, drastičnog porasta broja okupljenih građana ispred zgrade općine došlo u momentu kada je Dino Konaković došao ispred općine. Molim vas, možete li mi reći šta ste tada uradili kada ste vidjeli da je došlo do drastičnog porasta broja okupljenih građana i da zapravo gospodin Konaković nije došao tu tek tako? Sigurno nije došao spontano. Je li i on došao spontano? Da li se gospodin Konaković spontano obraćao, da li se gospodin Muzur spontano obraćao?

ALMIR ŠPIODIĆ - vijećnik NIP-a (replika)

Ovo što kolegica Elma iznosi, maloprije smo se dogovorili da ne spominjemo imena, ali izgleda da isti aršini ne važe za sve. Kada diskutuju vijećnici iz SDA oni barataju imenima i

ponavljaju. Ja spomenem jedno ime i vi me odmah "presiječete". Mislim da to nije korektan odnos prema nama ostalim vijećnicima. Ne gledate korektno na sve. Ja ne znam, ove vaše diskusije i replike, konstantno vi hoćete da natjerate nekoga da kaže da je tamo neki skup organizovao neko. Ako su bili protesti spontani i ako ste primjetili proteste, vi kao savjesni građani zašto niste intervenisali isti taj dan? Zašto niste treći dan otišli u policiju i rekli "ljudi tamo se okuplja neka grupa ljudi, ko je organizator, šta je"? Međutim, vi nakon dva mjeseca tražite šta bi bilo kad bi bilo.

ELMA MASNOPITA - vijećnica SDA (replika)

Kolega Špiodiću, ukoliko smatrate da je to bilo spontano, u momentu kada ste sazivale građane da vam se pridruže na tom spontanom okupljanju.

ALMA OMEOVIĆ - predsjedavajuća

Elma izvinite, moram vas prekinuti. Ovdje postavljate pitanja komandiru i diskutujete, a ne da jedni drugima postavljamo pitanja, pa ni kolega Špiodić da nekome ovdje postavlja pitanje. Nisu ovdje vijećnici dužni nikome ništa odgovarati. Molim vas držite se toga. Konstruktivne diskusije kolege Šeraka i pojedinih vijećnika i zaista su bili korektni.

HALID DIZDAREVIĆ - vijećnik SDA (replika)

Replika se odnosi na diskusiju. Znamo da je na dnevnom redu Informacija i mi postavljamo pitanja komandiru policije i neće nama niko govoriti kada ćemo i kome postavljati pitanja. Vaše je pravo gospodine Špiodiću da postavite pitanje komandiru ili kome god želite i nemamo problem s tim. Mi odgovor ne tražimo od vas, nego od komandira i nemojte da vam to smeta. Dakle, naše je pravo da mi na ovoj sjednici Vijeća diskutujemo, da tražimo odgovarajuće odgovore spram građana Općine Ilijaša. Ja mogu slobodno reći da je vršena određena tortura, ali to ću sigurno u diskusiji reći, ali neću na ovoj replici.

ALMIR ŠPIODIĆ - vijećnik NIP-a (replika)

Ja se izvinjavam, ali ja moram replicirati kada me ljudi prozovu i kada vi prozovete i iznesti neistine. Moram replicirati kolega Dizdareviću, ja sam postavio pitanje komandiru. Naravno da vi imate pravo postavljati pitanja inicijative po pitanju ove tačke dnevnog reda i biti nezadovoljni sa odgovorom, ali moramo li svi mi to sada trpjeti ovdje. Je li treba da izmisli odgovore, je li vama to odgovara.

ALEMA DŽAFO - vijećnica NIP-a

Većina pitanja su vezano za održane mirne skupove ispred zgrade općine, a mi ovdje najviše razgovaramo i sigurnosti građana. Svi građani koji su tu došli znali su šta rade, došli su na svoj rizik, ako ga je uopće bilo. Ako mogu dodati, i u poziciji sjede ljudi koji su prisustvovali jednom tom mirnom skupu, da li iz radoznalosti ili čega već, neću ulaziti u to. Ono što naše građane zanima jeste koliko policijskih službenika štiti njihove mahale u kojoj žive, koliko su njihova djeca sigurna i koliko su oni sigurni. Ono što smo ovdje mogli čuti jeste da ova Policijska uprava ima manjak kadra i samim nedostatkom kadra koliko god se ovi policijski službenici trudili, naša općina nije u potpunosti sigurna, a imamo općinu koja je toliko teritorijalno široka da mali broj ljudi ne može pokriti jednu toliku teritoriju. Ono što



nas čeka jeste težak period, kako zbog migrantske krize, tako i zbog ekonomske situacije koja će biti ove godine teška. U skladu s tim, vjerovatno će ove godine doći do povećanja broja krađa i povećavanja broja prosjačenja i drugih posljedica koje imamo u skladu sa teškom ekonomskom situacijom koja nas čeka. Ono što je takođe men osjetljiva tema jeste nasilje u porodici, a evo vidjeli smo da je povećan broj nasilja u porodici čak za 33% u odnosu na prethodnu godinu, pa bi se trebalo poraditi i na tome, preduzeti neke mjere.

MEHMED SINANOVIĆ - vijećnik SDA (replika)

Kolegice, želim da vam čestitam na ovom izlaganju. Dodao bih, vezano za prosjačenje, pogotovo subotom kada je pazarni dan u Ilijašu, treba malo više računa povesti kada je u pitanju sankcionisanje samog prosjačenja što uveliko daje lošu sliku i narušava naš ugled tokom subotnje pijace.

AKIF BEŠLIJA - zamjenik predsjedavajuće

Ono što me u samom startu interesovalo, a nisam postavljao pitanja, ali evo kroz diskusiju, stvarno me interesuje čime objašnjavate da je u Općini Ilijaš najveći broj izdatih prekršajni naloga kada su u pitanju zaštitne maske. Jesmo li mi neko ko nije disciplinovan po tom pitanju ili se vi baš toliko brinete o našem zdravlju i hoćete da ga sačuvate. To pokazuje i statistika kada je u pitanju Kanton Sarajevo. Možda bi bio manji broj prekršajnih naloga vezano za maske gdje najviše boli, to najviše narod boli, da je bilo bar dodatnih upozorenja građanima koji recimo ne nose propisno masku ili nikako i možda bi bilo manje izdatih tih prekršajnih naloga. Možda sam kroz ovo pitanje Mehe Hide mogao zaključiti zašto ste odmah pristupili pisanju naloga, ali mislio sam da ste na taj način htjeli da obezbjedite finansijska sredstva za uspostavu Odjeljenja policije u Srednjem i koliko ste napisali naloga, mogli ste sigurno otvoriti ovo Odjeljenje.

ALMIR ŠPIODIĆ - vijećnik NIP-a

Dosta su kolege iznijele činjenica i iznijeli nezadovoljstvo po pitanju sigurnosti na području Općine Ilijaš. Čini mi se da je najveći problem i najveći stepen nesigurnosti bio taj 15., 16., eventualno 17., pa i 18.11.2020. godine kada su se održavali, ja ih ne bi nazvao protesti, spontani mirni skupovi, ili kako već, građana ispred zgrade Općine Ilijaš. Koliko sam shvatio iz odgovora uvaženog komandira, on je odgovorio na sva ova pitanja i ne znam zašto u toku tog dana i htio bih da ga pitam da li je u periodu od 15.-18.11.2020. godine bilo nekih specijalnih prijava o kršenju javnog reda i mira konkretno na lokaciji ispred zgrade općine. Volio bih da mi odgovorite svakako. Nisam kroz pitanja htio da postavljam, ali kroz diskusiju želim da postavim pitanje komandiru: Da li ste i da li imaju službene zabilješke, dolaskom policije na dan izbora, na više poziva građana (ovo mi je važno da mi odgovorite) u Mjesnu zajednicu Ljubniće, tačnije u Dom MZ Ljubniće koji je korišten, a i prijava je bila da je korišten kao Krizni štab SDA, a takođe isti slučaj je bio i u Lješevu gdje je po nezvaničnoj informaciji su bili tamo neki ljudi koji su vodili birače, lobirali i čak plaćali glasove". Isti scenarij je bio i u Mjesnoj zajednici Misoča. Da li imate, a bile su prijave građana, službene zabilješke i šta ste zabilježili u tom dijelu. Što se tiče same noći izbora, da li ima službena zabilješka iz Lješeva sa biračkog mjesta u periodu od 9-10 h. Ako ima volio bih da nam dostavite to pismeno ili da na neki način odgovorite.

HALID DIZDAREVIĆ - vijećnik SDA-a

Moje kolege su diskutovali o jako puno činjenica o kojima sam i ja htio da govorim. Postavili su vam gospodine komandire dosta pitanja na koja ste vi dali ili niste dali odgovore, odnosno više niste nego jeste, jer otprilike odgovori su bili u pravcu "pa eto nije to baš naša nadležnost", nepotpune informacije, neka pitanja ste zabilježili pa ćete nam vjerovatno pismeno odgovoriti na nekoj od narednih sjednica. Međutim, ono što me posebno dojmilo jeste kada ste rekli da vi policiju šalžete da zarade svoju platu. Vi treba tako da radite, i kada su u pitanju saobraćajne kazne kada se tiču vožnje u alkoholiziranom stanju, vožnje maloljetnih lica bez vozačke dozvole ili punoljetnih lica bez vozačke dozvole, prekoračanje brzine i svih ostalih tako drastičnih kazni, mi se ovdje apsolutno slažemo i kao Vijeće niko ne osporava tu vrstu kazni niti mi tražimo da vi amnestirate takve učesnike u saobraćaju koji zaista ugrožavaju sigurnost i živote građana Općine Ilijaš. Međutim, indikativno je gospodine komandire ovo što je kolega Šerak govorio da vi u jednoj ulici pet dana za redom pišete neke kazne za parking - saobraćaj u stanju mirovanja. Građani se snalaze na način na koji se moraju snalaziti. Općina Ilijaš je poznata po velikim parkinzima i otprilike smo zaista disciplinovani kada su u pitanju te stvari. Apsolutno se slažem da i tu vrstu kažnjavanja vršite i radite, ali nekako mi je to ogromna razlika u odnosu na prethodnu godinu. S tim u vezi, mi smo, kao Općinsko vijeće, u prethodnim mandatima veliki doprinos dali kroz određene projekte kao što su video nadzori, kao što su pomoć policijama, takođe inicijativama da se postave video nadzori na igrališta. Evo danas je kolegica Vernesa pokrenula tu inicijativu, a i mi smo je postavljali u prethodnim mandatima. Sve radimo, kao vijećnici, da pomognemo, da sarađujemo i da budemo u uskoj vezi sa policijom. Međutim, nenošenje maski - nije mi jasno da treba da kažnjavamo ljude koji ne nose maske i ne pridržavaju se i s tim ugrožavaju druge, njihove živote. Ja ću u ulozi svjedoka ići na sudsko odlučivanje svom prijatelju koji je uložio žalbu. Međutim, treba da znate da naši građani nisu svi upoznati s takvim načinom i da ne mogu baš svi da dolaze vama da se žale zašto im je pisana kazna, da li je ona ispravna ili nije. Dakle, mom prijatelju je pisana kazna, parkirao je ispred kafića i izašao, sedam metara je prešao ulicu, rotacija je došla za njim i pisali su mu kaznu. Po mom ljudskom mišljenju, zašto tu nije išlo upozorenje. Gospodine nemojte prelaziti ulicu sedam metara do ulaza kafića, gdje je ušao, gdje ima 50 ljudi u zatvorenom prostoru. O tome se radi. Radi se o tome da su građani jednostavno izgubili povjerenje u ovu vrstu priče. Vi treba nas da štitite i tako i radite. Kriminalistička služba je to pokazala. Mi sve napore ulažemo, kao Općineko vijeće, da pomognemo i vama kroz projekte koje sam navodio. Nemoguće je da 1000 kazni građani Općine Ilijaš dobiju za period, dok u Novom Gradu deset puta ljudi dobiju kazni, a imaju 300 ili 400% više stanovnika. Kažete da vas ne zanim šta drugi komandiri rade u drugim općinama. Uredu, ne zanima vas, ali bi trebalo na neki način imati i tu vrstu komunikacije, da uporedimo ta ponašanja. Nemoguće je da su građani Općine Ilijaš toliko devijantni i da se ne pridržavaju određenih epidemioloških mjera, dok se drugi ljudi u Kantonu pridržavaju. Ovdje se radi samo o načinu provođenja tih mjera od strane policijskih uposlenika. Druga stvar, moram se osvrnuti na ova javna okupljanja. Zakon o javnim okupljanjima, koliko znam, decidno govori kako i na koji način se može vršiti javno okupljanje. Okupljanje ispred zgrade Općine Ilijaš, kada ste diskutovali spomenuli ste da nema organizatora, da je bilo spontano. Ukoliko nema organizatora i ukoliko je spontano, zašto nije spriječeno? Dakle, da li je to poruka građanima Općine Ilijaš da svako može sada vršiti bilo kakva spontana okupljanja bilo gdje? Na koji način? I ovdje ste spomenuli da su neka lica pokušala blokirati ulaz u zgradu općine - na spontanim okupljanjima. Gospodo, na spontanim okupljanjima se ne blokira ulaz u zgradu Općine Ilijaš. Koja su to lica koja su blokirala ulaz? Jeste li ih evidentirali i jeste li ih kaznili? To je moje pitanje. Rekli ste da također niste u situaciji da "ganjate" ljude ispred zgrad općine na tim

spontanim okupljanjima. Razumijem i to, nemate dovoljno uposlenika. Međutim, način na koji se provodi red i mir, mi u vas gledamo. Ne možemo tražiti od nekog drugog da provodi red i mir kada su u pitanju javna okupljanja.

SEMIR DEDIĆ - vijećnik SDA (replika)

Halid Dizdarević je u svojoj diskusiji iznio kako ne može da shvati ovoliki broj kazni. Ja jedino što mi ovako pada na pamet - ako su ti ljudi normirani po tom broju kazni, policijski službenici ako su nagrađeni za taj broj kazni, nek je išlo tako. Ali, ako nisu. onda to graniči, da ne budem grub, na izživljavanju građana.

DENIS DILBEROVIĆ - vijećnik SDA

Postavio bih jedno konkretno pitanje komandiru policije na fonu izlaganja Elme i Halida. Da li spontano masovno okupljanje treba ili mora biti spriječeno? Evo ja ne poznajem dovoljno materiju, ali se pitam da li je vama normalno da u uslovima epidemije, kako vi kažete 20, 30 ljudi četiri ili pet dana stoje ispred zgrade općine, a vi ne poduzimate ništa?

ALEN HASKOVIĆ - vijećnik SDA

Osvrnut ću se kratko na izlaganje komandira i prezentovanje izvještaja o radu Sedme PU Ilijaš. Zaista komandir nam je puno govorio, međutim, odgovora suštinskih smo dobili jako malo. Čak neki odgovori su paušalno rečeni i ne vidim u komandiru određenu vrstu inicijative da u narednom periodu riješi određene stvari. Kada smo pominjali neformalno okupljanje građana ispred zgrade općine, evo i moje kolege su to konstatovale prije mene, ja sam čekao da se iscrpe diskusija, vi kažete da ste pratili situaciju i pozvali ste inspekciju. Međutim, u svom izlaganju ste rekli da ste portalu Ilijaš-net dali odgovor da je od 15.-30.11.2020. godine bilo izdato ukupno 19 prekršajnih naloga za nenošenje maski. Ja se pitam koliko ste prekršajnih naloga izdati na tom neformalnom okupljanju građana ispred zgrade Općine Ilijaš i da li je ono, po vama, bio način da s ne poduzme ništa i da se pri tome poštuju mjere Federalnog i kantonalnog kriznog štaba koje su bile na snazi. Drugo pitanje što sam vas ja pitao, a tiče se bacanja flaša u izbornoj noći na kuću načelnika gospodina Akifa Fazlića - vaš odgovor je da prvi put čujete za to i meni je to donekle prihvatljivo. Međutim, od vas sam očekivao da kažete da će Sedma PU poduzeti određene aktivnosti da istraži taj slučaj, da ispita je li postojao taj slučaj, je li se desio. Nemojmo da se dovodimo u situaciju da ja moram da govorim kako će se istražiti neke stvari. Hvala Bogu naš grad je pokriven video nadzorom, u izbornoj noći su se organizovale neke kolone, vratite snimke, istražite malo, ispitajte je li se to desilo ili se nije desilo. Naš gospodin načelnik Akif je živ i zdrav, popričajte sa njim, provjerite ove navode i ja zaista očekujem da nas izvjestite o tome šta ste poduzeli.

ALMIR ŠPIODIĆ - vijećnik NIP-a (replika)

Cijeneci kolegu Haskovića, sve ovo što je iznosio u proteklom periodu, imate pravo svakako da tražite. Interesantno je da se kolega Hasković koristi nekim medijskim spinom i kaže da se istraži bacanje flaša na kuću načelnika. Je li načelnik gospodin Akif Fazlić prijavio napad na privatnu imovinu, vlastitu imovinu, na svoju kuću, ne znam šta već? Ima li prijava? Čovjek je rekao da nema prijava. E sada bi mi kao trebali uraditi nešto sada da se ljudi bave tim da li je neko bacio negdje flašu ili nije, ako čovjek nije prijavio. Vi konstantno pokušavate i spinujete nam medijsku priču koja je nastala na osnovu jednog

medijskog naslova, neću spominjati ime, da je bacanje flaše i vi ste to čuli. I ja sam svašta nešto čuo, pa ne mogu na osnovu toga tražiti sada od komandira da to on istraži. Ako mislite da ima sumnji, načelnik ima pravo da tuži, privatnu parnicu. Isto tako, barem vi bi to trebali znati da imate pravo za bilo koju sumnju, da sada ne ponavlja, i sada ovdje nas držite dva sata sa jednim te istim pitanjem zato što niste zadovoljni sa odgovorom. Nekorektno je kolega da iznosite paušalne informacije. I ja sam čuo da je neko bacao flaše, ali ako je čovjek sada govorio da nije bilo prijave i valjda gospodin Akif Fazlić zna najbolje da li je to bilo. Da li ima neko od komšija da je prijavio? Uredu, ako ima. Ja sam prvi da se to sankcioniše i da se kazni.

Isto, način kao što Bektić se dere i kaže, šuti, ja govorim itd. Mislim, to je nekorektno.

MUHAMED HANDŽIĆ - vijećnik SBB-a (replika)

Ja ću replicirati kolegi Špiodiću, ali povod je i kolega Hasković

Nemojte sada da mi ovdje raspravljamo "čula-kazala" ili pretpostavkama. Mi ovdje treba da baratamo sa činjenicama i da čovjeku postavljamo pitanja na osnovu činjenica. Dakle, Hasković brani tezu da je bacana flaša, a Špiodić tvrdi da nije. Po čemu ti tvrdiš da nije, a po čemu ti tvrdiš da jeste, a nisam čuo ni od načelnika Fazlića da je rekao da nije. Ako jeste, vjerovatno je to neko prijavio i to oni imaju u svojoj arhivi i čovjek će namo dati odgovor, ako ne sada, onda vjerovatno na jednom od naših slijedećih sastanaka. Dakle, nemojte sada da mi gubimo ovdje vrijeme oko toga "jest bacana flaša, nije bacana flaša". Prijavljeno jest ili nije, o tome ćemo dobiti izvještaj od komandira ili načelnika ili nekada u perspektivi kada budemo organizovali tematsku sjednicu.

SEID BEKTIĆ - vijećnik SDA (replika)

Almire, ja se ne derem i ne prijetim. Maloprije sam rekao da sam povisio ton da bih naglasio. Druga stvar, ako nije prijavljen slučaj u Lješevu, postoje organi, pa neka provedu istragu po tom pitanju i da zaključimo ovo.

ALMIR ŠPIODIĆ - vijećnik NIP-a (replika)

Kolega Handžiću ja se slažem sa vama, ja upravo to i govorim Haskoviću. Hasković je čuo negdje, da je negdje bacana flaša. Ja kažem, ako je bacana flaša, zašto načelnik nije prijavio? Načelnik se uopšte nije oglasio po tom pitanju. Znači, ja sam prvi za to da se osudi, da se kazni taj počinilac ko je bacio tu flašu.

Vi hoćete to sada, kao što su bili neki statusi "dole su huligani, narkoman itd.", nemojte se s tim igrati. Ljudi su došli sa svojim nekim pravom. Jesu li prekršili Zakon o okupljanju ne ulazim u to. Da li je bilo kršenja javnog reda i mira, ne ulazim u to. Postoje ljudi koji su nam odgovorili. Komandir je rekao da to prvi put čuje. Mislim da, baciti flašu na jednog načelnika, na njegovu imovinu, a da to ne zna komandir policije, je nelogično. To je samo spin koji vi pokušavate danas ovdje i da kažete kako smo mi to nešto pogrešno radili. Pa dobro, ako smo pogrešno radili, ja sam uvijek spreman kad pogriješim da ispaštam i da odgovaram. Nemate ni vi činjenice da kažete da su bacane flaše. To što potencira kolega Hasković, čovjek mu je odgovori na to pitanje.

ALEN HASKOVIĆ - vijećnik SDA (replika)

Zaista kolega Almire ne vidim razloga da vi na neki način zastupate i branite ovdje

komandira. Ne treba njemu pravni zastupnik, mi čovjeka samo pitamo. Dakle, ovdje on podnosi izvještaj za Sedmu PU, a vi se ponašate kao neki advokat. Meni je poznato da ljudi po anonimnoj prijavi provedu određenu vrstu istrage, da li je ona osnovana, da li nije osnovana. Mnogi ilijaški portali su objavili da se to desilo. To je prva persona, prvi čovjek Ilijaša.

ALMA OMEROVIĆ - predsjedavajuća

Alene, ja se izvinjavam, ali moram vas stvarno prekinuti. Replicirajte u skladu sa diskusijama koje ste imali, a ne ovdje da vi prosuđujete. Zato je tu danas komandir. Nastavljamo sa diskusijama, nisu vam replike baš na mjestu, ali dozvolila sam da jedni drugima kažete šta imate.

Niko se više nije prijavio za diskusiju. U većini slučajeva su one iscrpljene, nekoliko kolega vijećnika nije uzela učešće u diskusijama, a i replike su takođe ispoštovane.

Možda da dam sebi za pravo da kažem komandiru da ste u većini slučajeva odgovarali, ali vjerujem da će ovo biti produktivna ova tačka dnevnog reda i prema vama i da ćete imati taj materijal i da ćete razmotriti sve. Bilo je prijedloga da se ide i sa tematskom sjednicom, ali to ćemo u predstojećem periodu odlučiti ako bude baš takva potreba.

Na zahtjev šefova klubova vijećnika dajem pauzu od pet minuta kako bi se sačinio jedan zaključak.

Pauza 13:35-13:45h.

ALMA OMEROVIĆ - predsjedavajuća

Pročitala je zaključak, a zatim je Općinsko vijeće većinom glasova donijelo

## ZAKLJUČAK

Općinsko vijeće Ilijaš, nakon detaljne analize sadržaja Informacije o stanju sigurnosti na području općine Ilijaš za 2020. godinu, uz izuzeće zavidnih rezultata rada Odjeljenja kriminalističke policije Ilijaš, istu ocjenjuje nepotpunom, te je kao takvu, odbacuje.

U skladu s navedenim tražimo, da se u roku od 30 (trideset) dana, Informacija o stanju sigurnosti na području općine Ilijaš za 2020. godinu, dopuni podacima koji odražavaju realno stanje na terenu, te odgovorima na postavljena pitanja vijećnika, postavljena tokom sjednice održane 04.02.2021. godine.

Općinsko vijeće Ilijaš, smatra da je nerealna ukupna količina sankcionisanja građana u vezi s epidemiološkim mjerama za razliku od drugih općina u Kantonu Sarajevo.

## AD-4

Prijedlog Odluke o davanju mišljenja na Godišnji plan realizacije šumskoprivredne osnove

DENIS KAHRIMAN - predstavnik Uprave za šumarstvo

Na području Kantona Sarejevo, šumama i šumskim zemljištima gazduje se na osnovu Kantonalnog Zakona o šumama obzirom da već dugi vremenski period, deset godina, nemamo Zakon o šumama na nivou Federacije BiH. Šume i šumska zemljišta, kao dobro od općeg interesa, treba da uživaju posebnu zaštitu Kantona i općina. Šume i šumska zemljišta su osnovni privredni i temeljni resurs čije se funkcije manifestuju kroz ekonomske, ekološke i socijalne funkcije. U cilju obezbjeđenja i racionalnog gazdovanja

šumama i šumskim zemljištem, formiraju se šumskoprivredna područja, a gazdovanje šumama na jednom šumskoprivrednom području se gazduje na osnovu šumskoprivredne osnove, godišnjeg Plana i projekata izvođenja. Šumskoprivredna osnova je desetogodišnji plan gazdovanja šumama i šumskim zemljištem jednog šumskoprivrednog područja. Odredbe šumskoprivredne osnove su obavezne. Godišnji plan predstavlja 1/10 svih radova predviđenih šumskoprivrednom osnovom, kao desetogodišnjim planom. Šumskoprivredna osnova za Gornjebosansko koje pokriva veći dio teritorije Općine Ilijaš je usvojena prije osam godina, tako da godišnji Plan za 2021. godinu predstavlja devetu godinu realizacije šumskoprivredne osnove. Znači, šumskoprivredna osnova je usvojena po Zakonu o šumama Kantona Sarajevo, nosilac izrade šumskoprivredne osnove je Ministarstvo privrede i šumarstva koje finansira izradu koja je odgovorna za pravovremenu izradu šumskoprivredne osnove, a što se tiče godišnjeg plana, korisnik šuma tj. Sarajevo-šume dostavljaju godišnji Plan Upravi za šumarstvo na koji ona daje saglasnost, uz prethodno pribavljeno mišljenje općine na čijem se području gospodari. Uprava za šumarstvo je blagovremeno dostavila Općini Ilijaš prijedlog Godišnjeg plana, 14. decembra je stigla dostavnica, tako da je bio zakonski rok od mjesec dana se općina očituje, da svoje mišljenje i ovih par dana nije stiglo nikakvo mišljenje općine, što znači da nemamo povratnih informacija.

ALAN ŠERAK - vijećnik SDA

Denis je profesionalni uposlenik Uprave za šumarstvo i do sada je saradnja sa njim zaista bila na zavidnom nivou. Imam jedno pitanje koje se tiče ove tačke dnevnog reda, a i one prethodne. Da li "ugrubo" imaš informaciju koliko je ova lokalna zajednica oštećena zbog nelegalne sječe koja se desila u protekloj godini?

DENIS KAHRIMAN - predstavnik Uprave za šumarstvo

Ja imam neke podatke ovdje. Konkretno što se tiče Općine Ilijaš, jer ja pokrивam više općina u Kantonu Sarajevo, ali radimo one statističke pokazatelje. Na području Općine Ilijaš u toku prošle godine ukupno je evidentirano cca 1800 m<sup>3</sup> bespravne sječe. To su i državne i privatne šume. Znači, negdje cca 800 m<sup>3</sup> je bilo u državnim šumama registrovano bespravne sječe i cca 960 m<sup>3</sup> u privatnim šumama. Znači, ukupno cca 1800 m<sup>3</sup> šume. To sada, što se tiče ekonomskih pokazatelja, novčane vrijednosti, može se reći, ako uzmemo prosječnu vrijednost 100,00 KM, to je cca 180.000,00 KM (državne, plus privatne).

ALMR ŠPIODIĆ - vijećnik NIP-a

Ovo je praksa da svake godine imamo na dnevnom redu Prijedlog Odluke o davanju mišljenja na Godišnji plan realizacije šumskoprivredne osnove. Ono što mene interesuje jeste: je li dovoljno ovo pošumljavanje što ste nam predložili i što je u Planu tj. da li je dovoljno sadnica za ovaj prostor? Da li je veći procenat isječene šume i koliko vremena treba da nadoknadimo, u proteklom periodu što smo odsjekli šume i koliko nam vremena treba da nadoknadimo ove sadnice koje planiramo raditi ove godine? Ono što me još interesuje jeste, da li je Općina Ilijaš racionalno dobijala sredstva na osnovu onog koliko je eksploatisano šume sa područja Općine Ilijaš?

DENIS KAHRIMAN - predstavnik Uprave za šumarstvo

Otprilike su bila tri pitanja. Prvo je bilo, je li dovoljno pošumljavanje u odnosu na posječenu drvenu masu? Kao što sam već rekao, godišnji Plan je 1/10 šumskoprivredne osnove. Godišnjim Planom su planirani svi radovi: od iskorištavanja do pošumljavanja s tim da kod pošumljavanja imamo dvije vrste, odnosno, pošumljavanje koje izvode Sarajevo-šume iz vlastitih sredstava u toku godine i postoje namjenska sredstva iz opšte korisnih funkcija šuma Ministarstva privrede kojim se finansiraju ili sufinansiraju projekti Sarajevo-šuma. Što se tiče pošumljavanja to bi trebalo da Sarajevo-šume ispunjavaju svake godine što je predviđeno Godišnjim planom kao 1/10 šumskoprivredne osnove. Što se tiče pitanja koliko nam treba vremena da nadoknadimo? Znači, sve te novonastale površine koje su pošumljene zahtijevaju mjere njege dugi niz godina, a to su čišćenje i skidanje nadržasta, zaštita od požara, zaštita od oštećenja od strane stoke itd. Znači, treba dugi niz godina da se te novonastale kulture održavaju, njeguju, da bi na kraju neke buduće generacije imale koristi od tih kultura. Treće pitanje da li Općine Ilijaš dobija racionalno povrat sredstava, to može odgovoriti neko iz Sarajevo-šuma, jer ja nemam taj podatak. Znači, na to pitanje može odgovoriti predstavnik Sarajevo-šuma.

AKIF FAZLIĆ - općinski načelnik

Obzirom da sam ja oficijelni predlagač ove Odluke, u tom smislu sam imao potrebu da se javim. Naravno da mi prijedlog Plana dobivamo od Uprave za šumarstvo. Također, moram biti iskren i kazati da ove tabele, sa Denisom razmotrimo, i ako nam Denis sugerise da ovo nije uredu, mi to i ne prihvatamo, a nismo toliko ni stručni da razrađujemo sve ove tabele, ali u osnovi ih kontrolišemo vezano za šumskoprivrednu osnovu. Dakle, ja ovdje želim da potenciram ulogu Vijeća koju ono ima kada je u pitanju davanje ovih saglasnosti. Kantonalnim Zakonom o šumama je eksplicitno kazano da Općinska vijeća daju saglasnost na Godišnje planove. To je jako bitno i ovo je instrument kontrole, a naravno i instrument naše odgovornosti, jer kroz davanje ove Odluke omogućavamo Sarajevo-šumama da na jedan regularan način vrše eksploataciju šume u toku kalendarske godine za koju dajemo ovu vrstu saglasnosti. Ja predlažem Općinskom vijeću da donesemo ovu Odluku, a ja ću pokušati dati odgovor uvaženom vijećniku Špiodiću kada su u pitanju naknade. Zakonom o šumama ima više vrsta naknada, a jedna se praktično eksplicite odnosi na Općinu Ilijaš, a to je da Sarajevo-šume plaćaju 5,00 KM po 1m<sup>3</sup> isječene ili realizovane mase, da ne budem baš potpuno precizan, ali zna se, eksploatisana količina drveta. Već godinama su Sarajevo-šume uspjele kroz Sporazume koje smo pravili da zaostatak koji je bio 2010. godine i koji je došao na tri godine zakašnjenja, da sustižu i da realiziraju. U prošlu godinu smo ušli sa gotovo izravnatim odnosom. Međutim, u 2020. godini ponovo je došlo, zbog stanja, COVID 19 i svega, do zaostatka plaćanja i mi ćemo to definisati vjerovatno potpisom novih Sporazuma i ako bude problema u realizaciji naplate tih naknada, onda ćemo u idućoj godini usloviti da se te sve naknade izmire kako bi donijeli i dali im novu saglasnost za implementaciju za 2022. godinu. Ova druga sredstva, a prije svega, sredstva OKFŠ-a, bila su interesantna, jer je bilo raznih ideja i od raznih političkih grupacija oko ukidanja te vrste prihoda, odnosno kao parafiskalnog nameta. Dakle, on se ne odnosi na Sarajevo-šume, ne odnosi se na eksploataciju i to je namet koji se daje svim pravnim licima na njihov ukupan prihod i dakle, plaća ga i naš "Standard", "Željezara" ili bilo neko, kao nešto što je slično vodnim naknadama ili nekoj drugoj vrsti naknada za korištenje prirodnih resursa. Konkretno, mi smo zadovoljni onim kako je tekla realizacija naplate ovih prihoda od strane Sarajevo-šuma i nadamo se da ovaj neki zaostatak koji je nastao u prošloj godini da ćemo zajedno na pravi i korektan način regulisati.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o davanju mišljenja na Godišnji plan realizacije šumskoprivredne osnove

#### AD-5

Prijedlog Zaključka kojim se usvaja Izvještaj o rješavanju upravnih predmeta u Jedinственном općinskom organu uprave općine Ilijaš za 2020. godinu

NIJAZ SPAHIĆ - pomoćnik načelnika

Zakon o upravnom postupku je predvidio, odnosno obavezu da Izvještaj o rješavanju upravnih predmeta za prošlu godinu ide na sjednicu OV-a i da se usvaja i na Ministarstvu pravde i uprave KS koji sačinjava zbirni Izvještaj, te dostavlja na Vladu Skupštine Kantona Sarajevo. S tim u vezi, u Programu rada OV-a, svake godine na januarskoj sjednici, a ovaj put iz opravdanih razloga je sada, se razmatra ovaj Izvještaj. U Izvještaju imate prve tri tabele koje govore o prvostepenom i drugostepenom upravnom rješavanju i kretanju predmeta. Radi se o predmetima, odnosno postupcima po zahtjevu stranke i po službenoj dužnosti i drugostepenim postupcima koji prolaze kroz pisarnicu i u sistemu su Docunova. Na tabeli broj 4., obzirom da katastar ima poseban program gdje se zavode ti predmeti informatički, isto ti predmeti se zaprimaju u pisarnici tako da se i oni dodaju na ovo što je urađeno u ove prve tri tabele tako da imate cjelokupan Izvještaj onoga što je predato na protokol naše općine. Vezano za prvostepene upravne postupke, ukupno je u radu bilo 3199 predmeta po zahtjevu stranaka, da je riješeno 93,6% i da je uloženo 10 žalbi koje su sve odbijene i što iznosi 0,3% gdje imamo jedan zavidan, odnosno visok stepen riješenosti predmeta koji su bili u prošloj godini u radu. Po službenoj dužnosti je također ostvaren stepen riješenih predmeta u iznosu od 93,9%, žalbi nije bilo, tako da i ovdje imamo, gledajući na nivo organa, sve što je rađeno u prošloj godini kao Jedinstveni organ uprave, riješeno je u procentu cca 93%. Drugostepeni predmeti su jedna malo specifičnija kategorija i tu imamo malo niži procenat. Znači, od ukupno 9 predmeta, riješeno je 7 koji su se mogli riješiti i 2 predmeta koji se nisu mogli riješiti zbog prethodnih postupaka. Tabela 4. vam govori o katastru, stanju riješenosti predmeta i tu vidite da je po zahtjevu stranaka riješeno 96,03% predmeta i po službenoj dužnosti 92,93% riješenih predmeta, što takođe ukazuje da je na nivou čitavog organa, što se tiče ove oblasti, stepen riješenosti predmeta na jednom jako dobrom nivou, a to je isto tako potvrdio skorašnji ISO audit koji je bio u našem organu uprave gdje je iskazao jedno jako pozitivno mišljenje vezano za postupke koji se vode na nivou ovog organa uprave. Obrazloženje neriješenih predmeta imate u prilogu dokumenta. Znači, ti predmeti koji nisu riješeni, uglavnom se odnose na period u decembru mjesecu gdje nisu istekli rokovi, gdje realno zbog proceduralnih i drugih razloga se nisu mogli riješiti. Ušli su u ovaj Izvještaj kao zaprimljeni, ali se nisu mogli riješiti u, Zakonom predviđenom roku, odnosno nije, Zakonom predviđen rok istekao. Što se tiče predmeta koji nisu riješeni u roku, ja ću samo kratko.

Kada je u pitanju Služba za opću upravu, boračko-invalidsku i socijalnu zaštitu, u pitanju su medicinska vještačenja i revizija, odnosno nadovjera, koju rade kantonalni i federalni organi, tako da što se tiče medicinskog vještačenja znamo čekati po 4-5 mjeseci nalaz i mišljenja i tek po dobijanju tog nalaza i mišljenja mi radimo rješenja i normalno je da se ne može uraditi u roku.

Što se tiče privrede, vidjeli ste da su u pitanju podsticaji, jer dok je Komisija uradila terenski posao, realno se nije moglo uraditi u roku od 30 dana kako je ZUP predvidio rok za rješavanje predmeta.

Što se tiče urbanizma, tamo su građevinske i urbanističke saglasnosti, traži se



mišljenje-odobrenje nadležnog organa kantona, tako da i tu imamo određeni problema, ne u komunikaciji, nego u vremenu za koja oni nama dostavljaju ova pitanja za koja su sastavni dio postupka koja su prethodna pitanja za donošenje konačnog rješenja.

Što se tiče imovinsko-pravne službe, oni izlaze na teren, to su vještačenja, takođe imaju stranke, tako da, uglavnom, iz objektivnih razloga dolaze u poziciju da ne mogu zatvoriti predmet, odnosno u roku koji je propisao ZUP.

Diskutanata po ovoj tački dnevnog reda više nije bilo, pa je OV-e jednoglasno donijelo

Zaključak kojim se usvaja Izvještaj o rješavanju upravnih predmeta u Jedinstvenom  
općinskom organu uprave općine Ilijaš za 2020. godinu

#### AD-6

Prijedlog Programa rada Općinskog vijeća Ilijaš za 2021. godinu

ALMA OMEROVIĆ – predsjedavajuća

Primjetila sam da na strani 7. Plan rada Općinskog vijeća nemamo uvrštenu sjednicu povodom obilježavanja Dana reintegracije općine Ilijaš i Dana nezavisnosti BiH. Imamo navedene dvije svečane sjednice i možda da ovo navedemo, da imamo u Planu.

ALMIR ŠPIODIĆ – vijećnik NIP-a

U potpunosti se slažem sa Vama predsjedavajuća da se dopuni ova tačka dnevnog reda. Ono što bih ja predložio jeste da Stručna služba Općinskog vijeća Ilijaš, prilikom sačinjavanja zapisnika vodi, kao što to vode neke druge općine u Kantonu Sarajevo, a većina njih to radi, evidenciju o aktivnosti vijećnika u smislu vijećničkih inicijativa, pitanja, replika, diskusija, predloženih zaključaka i amandmana. To je moj prijedlog, ako može negdje da se dopuni. Da vidimo šta misle i ostali vijećnici.

ALMA OMEROVIĆ – predsjedavajuća

Mislim da to nije pitanje za Plan rada, to je na zapisniku. Služba je to čula, a to svakako na slijedećoj sjednici možemo ponoviti, pa da uvrste i taj dio.

AKIF FAZLIĆ - možda taj prijedlog da se uvrsti kao Informacija.

ALEN HASKOVIĆ – vijećnik SDA

Ovo je više kao određena vrsta replike. Ne znam koji bi to bili parametri, na koji način bi ocjenjivali aktivnost vijećnike? Da li je to broj podnesenih inicijativa i ako je to to, onda je suludo.

ALMA OMEROVIĆ – predsjedavajuća

Kolega Haskoviću, moram Vas prekinuti, to je pitanje za Službu i to ćemo na zapisniku, na slijedećoj sjednici, možda inicijativa da to bude ili šta već kolega hoće.

Ovdje raspravljamo o prijedlogu Programa rada Općinskog vijeća Ilijaš za 2021. godinu i molim vas da raspravljamo o ovom dokumentu i ako imate nešto konkretno da predložite, recite.

ALMIR ŠPIODIĆ – vijećnik NIP-a

Obzirom da je replika, može ovo što je načelnik predložio, a to je da u Planu rada bude kao Informacija o aktivnostima vijećnika.

ALMA OMEROVIĆ – predsjedavajuća

Uvrstit ćemo i ovaj prijedlog u Program rada.

ALAN ŠERAK – vijećnik SDP-a

U Programu smo stavili u mjesecu aprilu Izvještaj JKP "Vodostan" i Izvještaj JU "KSC i Radio Ilijaš". Nekada je praksa bila da prvo u martu imamo Izvještaj JU "KSC i Radio Ilijaš", a u aprilu JKP "Vodostan". Ne znam zašto smo sada objedinila ta dva izvještaja da budu na aprilskoj sjednici ili ćemo se sada pozvati na ono zakonsko objavljivanje Izvještaja ili šta već.

AKIF FAZLIĆ – općinski načelnik

Sa aspekta rokova nema nikakvih problema, a ovo čisto iz operativnih stvari smo u ovoj godini predložili ovako obzirom da je prijedlog Budžeta za ovu godinu na martovskoj sjednici i pošto je to najvažniji politički dokument koji donosi Vijeće u toku jedne godine i da ta sjednica bude "oslobođena" za Budžet. Osnivači smo jedne javne ustanove i jednog preduzeća i mislim da na aprilskoj sjednici mogu biti težišne te dvije tačke u raspravi ovog Vijeća.

Diskutanata po ovoj tački dnevnog reda više nije bilo, pa je OV-e, uz prijedlog da se u Programu rada OV-a uvrsti Informacija o aktivnostima vijećnika i svečana sjednicu povodom Dana reintegracije i Dana nezavisnosti BiH, jednoglasno donijelo

Program rada Općinsko vijeća za 2021. godinu

AD-7

Prijedlog Odluke o izmjenama i dopunama Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademskoj 2020./2021. godini

SANJA ZAGORAC-JOZIĆ – pomoćnica načelnika

Prije svega, želim da vam se zahvalim što je ova tačka uopšte uvrštena u dnevni red, jer je vanredno uvrštena, a nama puno znači ovaj period od dvadeset dana za njenu objavu. Naime, OV-e je 29.09.2020. godine donijelo Plan stipendiranja izuzetno nadarenih učenika i studenata prema kojem je bilo planirano stipendiranje 80 učenika i 127 studenata. Na osnovu objavljenog Plana je provedena konkursna procedura i nakon provedene procedure ustanovljeno je da 115 učenika i 172 studenta ispunjavaju uslove konkursa. Vodeći se jednom dugogodišnjom lijepom praksom koja je možda jedina i u regionu da svi učenici i student koji ispune uslove dobiju stipendiju Općine Ilijaš. Obzirom da ovdje imamo znatno proširenje plana, nekih 55.000,00 KM, mi smo se odlučili da predložimo ovu Odluku o izmjenama i dopunama Plana stipendiranja kojom, ustvari, stvaramo

pretpostavke da se u Budžetu Općine Ilijaš za 2021. godinu obezbijede ova dodatna sredstva za dodjelu stipendija. Komisija za statut i propise nije imala primjedbi na pravni osnov i pravno-tehničku usklađenost ove Odluke, pa ja predlažem OV-u da ovu Odluku usvoji u predloženom tekstu.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o izmjenama I dopunama Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademskoj 2020./2021. godini

AD-8

Nacrt Odluka o

- a) usvajanju Regulacionog plana "Apartmansko naselje Doci"
- b) provođenju Regulacionog plana "Apartmansko naselje Doci"

ALMA OMEROVIĆ – predsjedavajuća

Da li se slažete da diskutujemo zajedno i po tački a) i b), a glasat ćemo svakako odvojeno.

MUAMER MEŠETOVIC – šef odsjeka za dozvole

Ovdje je u pitanju Zaključak o usvajanju i provođenju Regulacionog plana apartmansko naselje "Doci". Radi se o investitoru "BAYTOK" d.o.o. Sarajevo koja je kupila te katastarske parcele površine 1,14 ha. Lokalitet je na području Podlugova "Doci" Ilijaš. Oni su pismom namjere izrazili potrebu za građenjem apartmanskih stambenih objekata. Shodno propisanoj proceduri, pribavljeno je mišljenje Zavoda za planiranje razvoja Kantona Sarajevo prema koje, toj izgradnji, treba da prethodi izrada Regulacionog plana. Investitor je pristao da vlastitim sredstvima finansira izradu Plana, geodetskih geoloških podloga, te po izradi Plana, finansira projektovanje, izgradnju infrastrukture koja će biti javna infrastruktura i ista će, kao i ranije, biti data na upravljanje lokalnoj zajednici. U daljem postupku, Služba je pribavila mišljenje Ministarstva prostornog uređenja, građenja i zaštite okoliša KS o potrebi izrade Elaborata o strategijskoj procjeni uticaja gradnje ovog naselja na okoliš. Ministarstvo je ocijenilo da nema negativan uticaj, ali da su uslovi zaštite okoliša ugrađeni u Odluku, znači, u pristupanju izradi Plana. Tu se znači radi o načinu zagrijavanja objekata, odvodnje otpadnih voda i sl. Dalje, metodologijom o izradi planske dokumentacije, nadležno je Vijeće kada smatra opravdanim izradu Plana, usvaja Odluku o pristupanju izradi Plana što je u ovom slučaju urađeno 2018. godine. Potom investitor angažuje firme za izradu geodeskih i geoloških podloga, radi se potpisivanje ugovora i finansiranje Plana, potom se analizira, planira i radi se koncept Plana na koji općina i investitor daju sugestije. Zatim se radi Nacrt Plana koji se Zaključkom Općinskog vijeća stavlja na javni uvid i raspravu u kojem periodu sva zainteresovana lica mogu izvršiti uvid i dati primjedbe. Nakon toga, primjedbe se dostavljaju nosiocu izrade Plana, a to je Zavod za planiranje razvoja KS. Ako su opravdane, one se ugrađuju u Plan, a neopravdane se ne stavljaju u Plan i donese se obrazloženje zašto te primjedbe nisu ugrađene u Plan. Nakon toga, Odluka se objavljuje u Službenim novinama i postupak se okončava. Na ovoj lokaciji planirano je 12 stambenih objekata. Nakon javnog uvida definisat će se konačan broj objekata što znači da on ne mora biti ovakav kako je sada predloženo. Takođe, infrastruktura obrađuje širi lokalitet, ne samo taj uži nivo i radi se u skladu sa drugom prostorno planskom dokumentacijom i ona

treba da zadovolji sve te planirane buduće objekte na terenu i sve to finansira investitor. Služba predlaže da OV-e usvoji prijedlog Zaključka da se Plan stavi na javni uvid.

## ALMIR ŠPIODIĆ - vijećnik NIP-a

Kolege koje su bile sa mnom u prošlom sazivu Vijeća znaju moj stav po pitanju apartmanskih naselja i taj stav i dalje neću mijenjati. Spreman sam dati obrazloženje i speman sam svakako upozoriti i ukazati kolegama vijećnicima koji nisu informisani vezano za ovo apartmansko naselje koje se nalazi na jednom vidikovcu između Mrakova i Podlugova. Ovdje je navedeno da će investitor uraditi komunalnu infrastrukturu, puteve, kanalizaciju, priključke vode itd. Međutim, da li organ općine zna, načelnik to zna, a mislim da znaju da kanalizaciju koju su obećali da će uraditi u Podlugovima, nastavak kanalizacije između Doca, Vratuše i Sovrla gdje bi se uključilo i apartmansko naselje, tako ste rekli, sa Sovrla, uključuje se i ovo u kanalizaciju. Da li znate da je ta kanalizacija rađena prije rata i ko zna na koliko mjesta je probušena majzlom i čekićem i da fekalije izlaze zagađuju našu okolinu. Ja ne vidim više nikakvu opravdanost izgradnje apartmanskih naselja iz više razloga. Evo, ako kažemo da apartmansko naselje gradi neka firma i izdaje apartmane i evo pitanje konkretno za načelnika i općinu "Koliko imamo izgrađenih apartmanskih naselja, opremljenih, useljivih, koliko je bilo noćenja u proteklim godinama, prijavljeno u Općini Ilijaš, u tim apartmanskim naseljima? Koliko je općina prihodovala po osnovu boravka stranih državljana, turista itd. u Općini Ilijaš? Vi ćete reći "ma oni plate Regulacione planove", ali to su jednokratna sredstva koja vi dobijate, odnosno koja dobije Općina Ilijaš i jednokratno građani Općine Ilijaš imaju mogućnost da na ovim apartmanskim naseljima nešto zarade prilikom izgradnje. Svakako ti ljudi koji rade gore su otprilike neosigurani u ovim firmama i koji rade za ove firme. Znači, mi bi već do sada, evo 5-6 godina kako se usvajaju ovi Regulacioni planovi za apartmanska naselja, trebali imati prihode, jer su neka apartmanska naselja već funkcionalna, a kao primjer imate naselje u Popovićima. Mislim da građani, sa ovim apartmanskim naseljima, osim što pojedinci to dobro "hajruju" finansijski i svakako, nemaju neke specijalne benefite od ovoga i samo imaju problem. Ponovo ću vam nabrojati sve probleme koje su prouzrokovala apartmanska naselja, a i ovo apartmansko naselje. U Službi za saobraćaj ima i zahtjev koji je prije par dana upućen, kada su bile velike kiše. Naime, ljudi koji su pripremali ovaj teren gdje treba da se gradi ovo apartmansko naselje su radili tako bahato, skinuli humus i kada je kiša pala nije imalo šta da upija tu vodi i oborinske vode su se slijevale ljudima u kuće. Imam snimak posljednje kiše i kako ta voda teče sa vrha tog brda do glavne ceste za Mrakovo. Imam sliku puta u kakvom je stanju sada. Taj put će biti uništen prilikom izgradnje ovog apartmanskog naselja u potpunosti, isto kao što su uništeni putevi na Sovrlama i to je jedan od puteva čiju su izgradnju finansirali građani. Sa druge strane, evo pokrenuo sam inicijativu da se hitno riješi sanacija puta, jer ljudi "bukvalno" ne mogu da priđu svojim kućama. Ono što me iritira, a pretpostavljam da i svaki normalan razum iritira, jeste da imate naselja u našoj općini koja nemaju vode i ne radi se nikakav plan, ne vidim strategiju plana razvoja i napajanja vodom tih naselja, ali se ovdje radi. Ovdje se sistemski radi, pa se u Regulacionom planu navodi sekundarno snadbijevanje vodom. Volio bih da mi neko objasni šta to znači. Dakle, imate naselje Bioče, naselja Sovrla gdje nemaju vode, Kadarića i da ne nabrajam dalje, a doskora i Ljubnića gornjih prema mezarju. I mi se na to oglušimo. Imamo naselja, a evo Hido je pokretao inicijativu, gdje nemaju struje Podlipnik itd., ali se za apartmanska naselja odmah obezbijedi trafostanica i odmah se prave projekti. Dvije godine pokrećem inicijativu da se na Vratuši pojača napon zato što struja u vremenu kada je jeftina 180-200 volti, što je nemoguće da rade kućanski aparati. Ja ne znam da li je općina ikada pokušala uraditi neki projekat sa Elektrodistribucijom da se

pojača napon našim građanima. Međutim, kada je za Arape, ponovit ću, kad se sve to dobro plati, onda sve može. Da budemo načisto, ja nemam ništa protiv investitora, ali ja ne znam da li nam ovakvi investitori trebaju koji jednokratno nam nešto daju, a na kraju nam uzmu puno više. Sve ove puteve koji su oštetili mikseri, teretne mašine, bageri, mi ćemo finansirati od naših registracija, od naših građana.

#### ALEMA DŽAFO - vijećnica NIP-a

Mi već imamo apartmanska naselja i zanima me koliko su ta apartmanska naselja doprinijela razvoju turizma na području Općine Ilijaš? Ovdje vidimo da piše da će se graditi na nestabilnom terenu i samim tim "sutra" možemo prouzročiti klizišta i mnogo veći broj negativnih pojava, nego što je pozitivno. Takođe, ovdje se navodi da područja na kojima će se graditi ta apartmanska naselja nemaju razvijenu ni vodovodnu mrežu, električnu energiju, rasvjetu, odlaganje otpada itd. Mene sada zanima ko će baš sve to finansirati? Da li to sve finansira onaj ko ulaže ili će dio morati finansirati i općina?

#### ADNAN ABADŽIJA - vijećnik NIP-a

Ne znam da li je u suštini shvaćena izgradnja apartmanskih naselja na području Općine Ilijaš, da li je to shvaćeno kao neki trenutni profit gdje ljudi ulažu, kupuju građevinski materijal i to investitor potroši, donese određenu svotu novca našoj općini. Ne znam da li je kontaktirana struka što se tiče arhitekonsko urbanističke analize na tom području, da li je to prihvatljivo, da li je to rješenje za gradnju novih stambenih objekata uopšte potrebno? Evo u protekloj godini je bila Korona, pa je spriječen dolazak ovih turista koji bi trebali tu da dolaze. Međutim, bilo bi dobro da oni tu dolaze i da potroše nešto novca. Mi bi trebali na novou općine da imamo jednu turističku zajednicu ili neki ogranak, pa da ubiremo takse, jer ja znam kada odem na more, noćim i plaćam boravišnu taksu za svaki provedeni dan, a ne znam da li se na nivou općine bilo šta prihodovalo po ovom pitanju. Još bih dodao i ne znam ko će mi odgovoriti, a to je da li je izvršeno anketiranje građana na tom području gdje se gradi apartmansko naselje i da li, ovo što je Almir spomenuo, uništavanje postojeće infrastrukture, priključivanje na kanalizacionu mrežu koja je imala Q 200 da sada ide priključenje još jednog naselja gdje be se iziskivala nova sredstva proširivanjem tih kanalizacionih odvoda na Q 300 i ne znam dalje kako to struka kaže i da li ćemo mi i naselje Popovići odmah osjetiti pritisak vode i gubitak ili pad električnog napona zbog tih naselja?

#### ALAN ŠERAK - vijećnik SDP-a

U prethodnom periodu ja sam se uvijek zalagao za to da mi ne trebamo ovdje baš "slijepo" pratiti Općinu Ilijaš i davati bezrezervnu podršku ovim naseljima iz razloga jer mi u ovom momentu sada imamo nekih 15-ak donesenih Regulacionih planova. Na našu sreću, izgrađeno je samo jedno apartmansko naselje, zvanično, za koje ja znam, a ova ostala nisu, u fazi su čekanja iz razloga opterećenja mreže komunalne infrastrukture na području Općine Ilijaš koja, nažalost, nije dovoljno razvijena da bi mogla da prihvati sve ovo što smo mi ovdje donijeli. Ja razumijem da Općina Ilijaš od gradnje ovih apartmanskih naselja ima određenu ekonomsku korist, ali isto tako moramo biti svjesni činjenice, dugoročno gledajući, da ćemo mi biti na gubitku, a posebno naša djeca. Zna i sami da je vodni resurs ove općine na krajnjoj granici i malo me to na neki način zabrinjava da naše preduzeće da bjanko potpis kada se traži saglasnost vezano za ova naselja, a onda nam u aprilu dođu ovdje i govore kako nema vode, kako je slab pritisak, kako su ovi kapaciteti

istrošeni do te mjere itd. Dakle, u ovom trenutku kada bi "sutra" ljudi krenuli da realizuju sve ove Planove koje ste vi (namjerno kažem vi, jer ja za njih nisam glasao), donijeli u prethodnom periodu. Tu se radi o 500 stambenih objekata. To su vam dvije velike mjesne zajednice, a Zavod za planiranje "bajni" samo uradi copy paste i tamo navede da će se vodom snadbijevati naselje da će se priključiti na gradski vodovod, a naravno, sve to radi uz saglasnost prethodno dobivenu od našeg javnog preduzeća. Tako da smatram da ovaj način, ovaj rad, a razumijem sve i bojim se da ćemo u nekoj skorijoj budućnosti, a hoćemo sigurno, dovesti u pitanje redovno snadbijevanje vodom ove općine. Znate i sami da smo jedne godine u Ilijašu gradu imali redukcije. Lješevo je stalno bilo pod redukcijama, pa smo dali vodu u Vratnicu, ali to će biti tema rasprave u aprilu. Radili smo određene bušotine, uložili 200-300.000,00 KM ne bi li našli alternativne izvore, ali nažalost, nismo ih našli, a to smo radili sve s ciljem jer nemamo vode. Ovdje moramo biti odgovorniji u budućnosti uistinu. Ja neću ni za ovo glasati, ne pada mi na pamet, jer to je neka moja lična odgovornost naspram budućih generacija ove općine, ali isto tako, ja ću vas zamoliti da ubuduće ipak malo budete iole realniji po ovom pitanju, jer vjerujte mi doći će u pitanje vodosnadbijevanje Općine Ilijaš.

ALMIR ŠPIODIĆ – vijećnik NIP-a (replika)

Potpuno se slažem sa vašom diskusijom. Iznijeli ste činjenicu da bi se moglo izgraditi preko 500 stambenih jedinica kroz ova apartmanska naselja. Istina, ja nisam razmišljao na takav način, ali ako je zaista, a vjerujem da je istina ovo što govorite, mislim da mi imamo jedan ogroman problem, upravo s ovim što ste govorili. Nije u pitanju samo vodosnadbijevanje. U pitanju su i kanalizacija, odvoz smeća i u pitanju je na kraju krajeva zaštita tih objekata i te imovine. Evo imali smo izvještaj Sedme PU, a i ja sam čuo za više provala u te kuće, odnosno apartmane gdje mora intervenisati naša policija i gdje mi opet, na neki način, ugrožavamo naše građane. Naime, dok naša policija bude čuvala te stambene jedinice, objekte i njihovu imovinu, nećemo imati dovoljno policije na terenu da se brine o zaštiti naših građana kao što imamo problem, konkretno, sa gornjim krajem općine. Zaista, ako je samo jedno legalno naselje, onda je opravdana bila izjava, a možda bi nam načelnik mogao nešto više o tome reći, CCI gdje kažu da ljudi uplate građevinsku za tri kuće, a onda naprave 27, a to naš građevinski inspektor pravda da se to uradilo dok je on bio, kao, na godišnjem odmoru. Sada se ja pitam koliki je godišnji odmor našeg građevinskog inspektora, ako se napravi jedno naselje od 27 kuća dok je on na godišnjem odmoru. Naravno, načelnik koji gleda u to naselje sa svog prozora, kaže da ne zna ništa o tome.

ALMA OMEROVIĆ – predsjedavajuća

Kolega molim Vas da pričamo o ovoj tački dnevnog reda.

ALEN HASKOVIĆ – vijećnik SDA

Zaista moram da se uključim u diskusiju. Kao tačku dnevnog reda imamo Nacrt Odluka o usvajanju i provođenju RP "Apartmanska naselja Doci". Ja ne vidim razlog da mi bilo koga osporavamo u njegovoj namjeri da on na svom zemljištu gradi bilo što, ako je to nešto u skladu sa Zakonom. Dakle, ovdje se radi o određenom investitoru koji je kupio privatno zemljište i ima čovjek namjeru da pravi apartmansko naselje, pokrenuo je zakonsku procedure i ako u toj zakonskoj procedure sve ispoštuje, ja ne vidim razloga da se nešto tako čovjeku osporava. Isto kada bi ste vi krenuli praviti sebi vlastitu kuću, pa onda neko

da dovodi u pitanje imaju li građani koristi od toga što vi gradite sebi kuću. Naravno da nemaju. Čovjek ima potrebu da gradi apartmansko naselje, pokrenuo je zakonsku procedure i to mu Zakon omogućava. Ja mislim da je ovo najrigorozniji put do samog dobijanja dozvole za gradnju kada se upustite u procedure izrade regulacionog plana. Ovaj Nacrt RP izradio je Zavod za planiranje razvoja KS i to je u uvodnim napomenama rekao Muamer. Dakle, jedna ozbiljna institucija u KS je napravila Nacrt RP, mišljenje je dalo Ministarstvo za okoliš KS i reklo je da nema negativnog uticaja na okoliš. Kada je u pitanju vodosnadbijevanje ovih naselja, između ostalog i apartmanskog naselja Doci, jedina mjerodavna institucija koja će dati mišljenje, da li je ono moguće ili nije, je naše JKP "Vodostan" Ilijaš. Podsjetit ću sve vas vijećnike, a i javnost, da politika koja vodi ovu općinu, vodu stavlja u nulti prioritet. Svjedoci smo brojnih kapitalnih projekata koje je ova općina provela u smislu izgradnje rezervoara za vodu, pumpnih stanica, prečišćivača itd. Dakle, kapacitet snadbijevanja vodom ovog apartmanskog naselja i svakog drugog, odredit će jedina validna institucija, a to je JKP "Vodostan" Ilijaš, da li ima kapaciteta ili nema kapaciteta. Ako oni daju pozitivno mišljenje na to, ko smo mi da kažemo da nema kapaciteta. Dakle, u konačnici, nema razloga da osporavamo bilo kakvu vrstu investicije i izvođenja radova koji se izvode u skladu sa Zakonom. Ako neko počne nešto nelegalno raditi, bez dozvola i sl., ja sam u svakom slučaju protiv toga, ali neko ko poštuje procedure i sve te procedure "debelo" plati i one nisu nimalo bezazlene, jako je teško doći i provesti sve te procedure. U konačnici, ovo je Nacrt RP na koji će javnost moći da daje mišljenje. Dakle, imate rok za javnu raspravu i sva vaša mišljenja možete tu dostaviti i ona će se, naravno razmotriti, održat će se javna rasprava i u konačnici donijeti RP za mjesec, dva, nakon što se to provede.

#### ALMIR ŠPIODIĆ – vijećnik NIP-a

Gospotine Haskoviću, slažem se sa Vašom diskusijom u jednom dijelu kada kažete, kao ljudi su kupili zemlju i imaju pravo da grade itd. Imaju pravo oni da grade, pravim paralelu te vase diskusije. Izgradili su ljudi naselje i na Marićima gdje ne mogu dobiti građevinsku dozvolu i sada ne mogu da priključe struju. Općina se tako indolentno ponaša prema tim ljudima. Pravim paralelu na tvoju "ulizivačku" diskusiju kao "nema to veze, možete usvojiti". Ne može se ovo usvojiti. Mi smo ovdje da predstavljamo građane i ja dolazim tačno iz Doca i niko u Docima nije za izgradnju ovog apartmanskog naselja. U Docima još uvijek ima sedam kuća koje nemaju građevinsku dozvolu iz razloga što su blizu rudnog pojasa, a nisu u rudonom polju. To općina i općinske službe ne tretiraju kao prioritet rješavanja, ali tretiraju prioritet rješavanja regulacionih planova zato što im neko plati. Svi smo mi, ako gledamo ovo što Vi govorite, apartmansko naselje kompletni su Podlugovi, ljudi su tu došli, napravili kuće na identičan način kako to rade Arapa. Općina se nije postarala, a trebala je, da uradi plansko pravljenje objekata, komunalne infrastrukture itd., pa imate puteve koji se još uvijek vode kao općinski putevi, pristupni itd. Znači, poenta je sljedeća na ovu Vašu diskusiju, ako je mogu tako nazvati, znači, Arapima se može udovoljiti sve, dok naši građani ispaštaju. Ja sam ovdje da predstavljam građane i niti jedan Arap nije glasao za mene, već građani Općine Ilijaš. Cijeneći te ljude, cijeneći investitore, mislim da se oni trebaju usloviti na drugačiji način, a ne ovako za jeftino, ne znam već koliko košta izrada jednog RP, da se to radi. Rekli ste da ste protiv nelegalne gradnje, pa evo imate nelegalnu gradnju na Sovrlama, gdje čovjek kaže da je tamo napravljeno 27 objekata. Građevinski inspektor kaže da su nelegalno izgrađene kuće. To vama nije mjerodavna informacija. Ne znam šta pokušavate sada da kažete, kao trebamo to, nije važno. Nije važno apartmansko naselje, važno je pojedincima, čestitam i drago mi je da pojedini ljudi zarade koji rade sa tim ljudima. Drago mi je da ima naših ljudi da se finansijski izgrađuju, ali ovo

nije rješenje za građane gdje vi pokušavate da kažete da kao činite dobro građanima Općine Ilijaš što nam dovodite potrošače vode, konzumente drugih komunalnih usluga itd. Zašto je onda Općina Ilijaš i JKP "Vodostan" Ilijaš vršio ispitivanje u Misoči i, čini mi se, ako griješim neka me neko ispravi, da je dato 300.000,00 KM za bušotine za ispitivanje za novim vodosnadbijevanjem. Znači, nema dovoljno vode, a ako ima dovoljno vode, nisu to trebali raditi.

ALEN HASKOVIĆ – vijećnik SDA (replika)

Kolega Almir, ako Vi moju diskusiju nazivate "ulizivačkom", onda je vasa definitivno "populistička", jer Vi svojom diskusijom obmanjujete javnost i predstavljate ovo kao neki nelegalan čin radnje u Općinskom vijeću. Apartmanska naselja, RP koji se donose nisu nelegalan čin. Ovo je legalan put donošenja RP. Ispitivanja da li ma dodatnih izvorišta vode za vodosnadbijevanje je samo još jedan pokazatelj koliko mi ulažemo i brinemo se za vodosnadbijevanje naših građana.

ALMIR ŠPIODIĆ – vijećnik NIP-a (replika)

Naravno da stojim pri tom stavu koji ste Vi rekli i prihvatam da ja, kao govorim populistički. Ide regulano procedura u smislu usvanja RP, slažem se s tim, ali nije opravdana gradnja apartmanskih naselja u Općini Ilijaš. Nije ekonomski opravdana i ono što vi potencirate da građani Općine Ilijaš imaju koristi kao benefite neke. Imamo pravo da osporimo. Ako već tražimo investiture i ljudi dolaze, ovo rade firme, ovo ne rade ljudi. Zna se gdje je Industrijska zona, dovedite investiture u Industrijsku zonu i izvolite raditi, ja ću tada sa obje ruke podržati svaki RP. Napravite Industrijsku zonu, dovedite investitore, ja ću sa obje ruke podržati, aplaudirat ću vam cijelo vrijeme za takav potez.

ALAN ŠERAK – vijećnik SDP-a (replika)

Populističko ulizivačka politika, drago mi je da sam nešto novo naučio u ovom Općinskom vijeću. Replika se odnosi na diskusiju kolege Alena Haskovića. Cijeni, simpatičan je to dečko i ide u pravom pravcu kada želi da opravda određene poteze. Da li smo mi za proširenje grada na ovaj način ili nismo? To je izražavanje naših političkih stavova i imamo pravo da kažemo jesmo ili nismo. Je li zakonski sve ispoštovano? Naravno. Je li mjerodavno jedino naše JKP "Vodostan"? Naravno da jeste. Znate kako te stvari Haskoviću inače funkcionišu u praksi? Zovne se telefonom, bjanko se potpiše. Znate vi to isto tako kao i ja. Niste jednom usvajali Izvještaj o radu JKP "Vodostan" Ilijaš. Bili ste u proteklom mandate vijećnik. Je li treba da citiram šta je nama direktorica ovdje svima govorila. Pa u Misoči odakle crpimo vodu, Misoča je bila pod redukcijom. Je li tako? Svjedoci mi svi. Sva ostala naselja oko grada Ilijaša su bila pod redukcijom. Vode nema ljudi. To je činjenica i mi imamo problem da nađemo alternativni izvor. Imamo tamo nakakav plan za izvorište Vrutak, pa kažu ima gore kapaciteta da bi iz tog izvorišta mogli snadbijevati donji kraj vodom. I ima vjerovatno, ali to je ogromna investicija. Ja mislim da je ovdje Vodostan trebao da se ugradi, da je uvaženi Zavod koji je renomirano naše tijelo, nažalost, i imam itekako primjedbe na njegov rad, trebao da nađe način kako će se ovo apartmansko naselje snadbijevati vodom, ali da to ne bude gradski vodovod. I onda bih ja to podržao. Međutim, kad god vidim ovako kako jeste, vjerujte mi da neću, a obrazložio sam zašto. Naš gradski sistem vodosnadbijevanja je preopterećen i to je činjenica.



ALEMA DŽAFO - vijećnica NIP-a (replika)

Kolega Haskoviću, naravno da ću osporiti ovo, zato što ne samo da ćemo imati problema sa vodosnadbijevanjem, ovdje se govori o zaštiti okoliša, o kakvoj zaštiti okoliša pričamo ako će stambene zone zauzeti 0,602 ha, a zelene površine ostaju samo na 0,166 h. O kakvoj zaštiti okoline uopšte pričamo? Znači, stabilnost terena, kada vidimo osnovni urbanistički pokazatelji, navedeno da je uslovno stabilan teren. "Sutra" ćemo imati klizišta, ljudi će nam ovdje dolaziti i ja ću "hladne" glave reći da nisam za ovo glasala, a vi kako želite.

ADNAN ABADŽIJA - vijećnik NIP-a (replika)

Replika i Almiru Špiodiću i Alenu Haskoviću.

Kolega Haskoviću, ja sam odrastao i znam teren Misoče. U toku toplih ljeta, vjerujte, ne znam da li ste doživjeli u zadnjem periodu, zadnjih 10-ak godina jedna do dvije suše kada rijeka Misoča potpuno nestane na 3 km uzvodno od Misoče. Reći ću vam da je bilo mnoštvo ljeta dok sam bio mlađi i dosta toga sam zapamtio i da rijeka Misoča nestane ili je kao potok na području Mahmutović Rijeke koja je 30 km od izvora rijeke Misoče. Reći ću vam da je u Mahmutović Rijeci gdje je 17-ti kilometar rijeka nestane u toku ljeta. To da znate i kolega Bešlija to dobro zna. Replika je na priključak na vodovodnu mrežu.

ALMA OMEROVIĆ - predsjedavajuća

Kolega samo sekundu, molim Vas, spomenuli ste priključak i to je uredu, ali nemojte da analiziramo vodotok rijeke Misoče, odnosno rad Vodostana Ilijaš. Dajte da se vratimo na tačku dnevnog reda. Pričamo o RP "Doci", razumijem da se spominje i vodosnadbijevanje, ali ne da analiziramo vodotok rijeke Misoče. Znači, da diskusije usmjerimo na temu.

ADNAN ABADŽIJA - vijećnik NIP-a (replika)

Upravo ta rijeka je vodosnadbijevanje Općine Ilijaš.

ALMA OMEROVIĆ - predsjedavajuća

Kolega, nije nam to tačka dnevnog reda.

ADNAN ABADŽIJA - vijećnik NIP-a (replika)

Upravo je ta rijeka odakle ide vodosnadbijevanje Općine Ilijaš, odakle bi se i naselje Doci napajalo iz gradske mreže. Građani u tom slučaju neće imati dovoljnu količinu vode kada se sva ova naselja priključe na gradsku mrežu. Međutim, JKP "Vodostan", naša instanca koja će reći da li, ne znam da li imamo tamo struke da kaže, možemo naći nove izvore vode, a doći će "sutra" i reći možemo priključiti sva ta naselja na tu mrežu. Međutim, čisto sumnjam da možemo i prva suša koja se pojavi, mislim da ćemo u Ilijašu sa ovim brojem priključaka na vodovodnu mrežu imati problema.

HALID DIZDAREVIĆ - vijećnik SDA (replika)

Kratko ću se referirati po pitanju ove tačke dnevnog reda. Dakle, zakonski uslovi su ispoštovani, mišljenja Prostornog plana, izrada RP, finansiranje javne infrastrukture i

davanje te infrastrukture u posjed općine, mišljenje Pravobranilaštva KS na, mišljenje na uticaj na okoliš, angažovanje geološko geodetskih usluga, što podrazumijeva ova klizišta o čemu je kolegica govorila. Almir Špiodić je ovdje rekao da u naselju Marići imamo 7 kuća koje nemaju građevinsku dozvolu, dakle to je neuporedivo. Apsolutno sam mišljenja da tih 7 kuća treba da dobiju građevinsku dozvolu, trebamo pomoći tim ljudima, iako oni nisu glasali za mene i to nema veze, koji su u blizini Rudnika. Vjerovatno Rudnik nije dao saglasnost, pa da se može dobiti građevinska dozvola. Međutim, mi sve moramo učiniti da i ti građani dobiju građevinsku dozvolu. Međutim, kada imate investitora koji kupi privatnu zemlju, pa hoće nešto da investira, ne mislite li da možda, kao što ste nazvali te ljude Arapi, evo Arapi su kupili u Mančesteru, Mančestersyiti, kompletan klub, vrše tolike investicije po svijetu, kupuju. Znači, svojim novcem investiraju svugdje u svijetu, nije to samo u Ilijašu. Što se tiče ovoga što je kolega Adnan rekao, upravu si Adnane, Misoča nestane sa ovim apartmanskim naseljem ili bez njega. Ona kada presuši, presušit će upravo zato i trebamo vršiti analize za novim izvorima vode.

MEHMED SINANOVIĆ - vijećnik SDA (replika)

Vi ste kolega Abadžija odlično odgovorili kolegi Špiodiću na njegovo pitanje zašto su vršena dodatna istraživanja pitke vode. Dakle, upravo iz bojazni da će nestati i presušiti rijeka Misoča i time da se obezbijede novi izvori i količina pitke vode.

ALMA OMEROVIĆ - predsjedavajuća

Kolega Špiodiću, javili ste se se za sve moguće replike. Hajde replicirajte kolegi Abadžiji. Stvarno Vas je nemoguće upratiti kome sada trebate replicirati.

ALMIR ŠPIODIĆ - vijećnik NIP-a (replika)

Mogu vam pomoći, jesam se javio. Raspravljamo o ozbiljnoj stvari. Abadžiji neću replicirati, repliciram kolegi Sinanoviću ili Halidu, kome mi vi dozvolite.

ALMA OMEROVIĆ - predsjedavajuća

Imate pravo da replicirate i jednom i drugom, samo ste rukom pokazali, pa sam mislila da se preskočili ovo za šta ste se javili.

ALMIR ŠPIODIĆ - vijećnik NIP-a (replika)

Gospodin Sinanović kaže kako je meni kolega Abadžija kao odgovorio na neka moja pitanja i iz tog razloga su oni upravo vršili bušotine da pojačaju kapacitet vode. Pa o čemu mi cijelo vrijeme gospodine Sinanoviću govorimo ovdje? O čemu mi pričamo? Pričamo da ako obezbjedimo ljudima kroz ove RP, kao što piše da će se obezbijediti snadbijevanje vodom itd. Kako ćemo obezbijediti nešto što nemamo, što nećemo u budućnosti imati. Danas imamo, kao što kolega Šerak reče, šta ostavljamo našoj djeci. Nemam ja ništa protiv investitora, ali znate šta kažu ti investitori? Kažu da smo mi previše jeftini ovdje. Sad ja ne znam ko je jeftin. Ja ne želim da budem jeftin i ne želim da svoju zemlju rasprodajem na način na koji se to radi kroz ove RP. Imate očite primjere u praksi.

ALMA OMEROVIĆ - predsjedavajuća (krivi navod)

Pričamo o nečemu, a maloprije sam opomenula kolegicu, u pitanju je RP Apartmansko naselje Doci. Ne prodajemo mi zemlju. Čuli ste da se prodaje privatna zemlja. Nemojte da sada ide u eter kako mi prodajemo zemlju.

ALMIR ŠPIODIĆ - vijećnik NIP-a (replika)

Mi stvaramo uslove za prodavanje zemlje. Izvinjavam se, upravu ste predsjedavajuća. Kolega Sinanović je spominjao kao da sam ja odgovorio. Upravo i jeste taj odgovor moj ako razumno shvatimo da nema dovoljno vode, da ne možemo napojiti sva ta naselja i još pogotovo što se traži da se prave novi vodovi vode prema tim RP. Interesantno je da nigdje ne piše u ovim Planovima kolega Sinanoviću, a evo ovdje ima i ekonomista, da li će se ta voda naplaćivati kao industrijska voda, jer ovo je voda za firme. Da li se struja naplaćuje kao industrijska za ova apartmanska naselja koja će se dovesti? Ne. Ja nisam vidio nigdje da ste to naveli. I vi isporučujete vodu firmi po cijeni koja ide za domaćinstva. Niste vodili o tome računa.

AKIF FAZLIĆ - općinski načelnik

Ovo su dva RP manjeg obuhvata, ali izazvala su puno diskusije vezano generalno za naše stavove, za sve ono što se dešavalo i u prethodnim godinama i što će se dešavati i u narednim godinama. Ja sam spreman da po pitanju apartmanskih naselja, sličnih naselja i svega onoga, napravimo i tematsku sjednicu, da pričamo o tome, da ova dva plana, ove dvije tačke nam nisu povod da na osnovu njih evo razmotrimo tu problematiku i da definišemo ono što hoće Općina Ilijaš reći. Ovaj jedan plan, čini mi se, ima 12 kuća. To nećete niti u jednoj općini u KS naći da se radi RP. Otiđeš u urbanizam, isparceliše se i daju se pojedinačne dozvole. Dakle, time hoću da kažem koja je vrsta odgovornosti i ovog organa uprave, Službe za urbanizam, koja za 12 kuća traži RP. Zašto? Zato što se RP mora sve izdefinisati, i pristupni putevi i vodovod i kanalizacija i struja i sve moguće. To je jedan aspekt i to je planska gradnja. Dakle, mi smo općina prepoznatljiva po donošenju RP. Znači, definišemo planski razvoj, i onaj mikro i makro. Problema u realizaciji tih planova ima. Imamo mi tu incidenata, ljudi "iskoče" i ovo ili ono, ali postavljamo korištenja prostora na prostorno planskoj dokumentaciji koja je, prije svega, zakonom definisana, a onda kada su u pitanju i konkretne lokacije na bazi struke koja definše šta, gdje može. Slijedeće što je jako važno kod oba ova Plana, sve to snosi investitor. Ona mora, ako trebadne još jedan vod kanalizacije, raditi taj vod kanalizacije, ako se ne može priključiti na ovaj, neće se priključiti. To će se morati sve izdefinisati. Ako se mora raditi, morat će se izdefinisati trasa i rješenje javnog interesa za taj prostor kuda će se trasa postaviti. I neću više o tome. Ja zaista predlažem da ova dva Plana podržite. Generalno, kada su u pitanju apartmanska naselja, ona znače definisanje našeg stava prema razvoju ove općine. Biće vam malo smiješno kada vam ja sada kažem kada sam studirao, išao vozom, Sarajevo je bilo do Čengić Vile. Davno sam ja studirao, ali nije puno godina prošlo da se od Čengić Vile dođe do Ilidže i praktično napravi jedan grad. Dakle, ako mi nćemo razvoj, ako mi želimo neki svoj komfor i svoje nešto čuvati samo za sebe, onda ovdje razvoja nema. Općina Ilijaš još uvijek ima značajno manje stanovnika u odnosu što ih je imala po popisu iz 1991. Godine. Tada smo imali cca 25.600 stanovnika, a sada imamo po statistici, zadnji popis je bio 2019. godine i bilo je 19.600, ali prošla godina možda 20400 ili 20500 stanovnika. Dakle, mi još uvijek imamo 5000 stanovnika manje na prostoru Općine Ilijaš, nego prije 30 godina. Slijedeće što je jako važno, dakle prostor Sarajevsko-Zeničke kotline je prostor koji će se

naseljavati, u koji će dolaziti investitori, praviti se objekti raznih vrsta. To Sarajevo od Čengić Vile do Ilidže nije izgradio samo neki javni sektor, dakle razni privatni investitori i strani i domaći. Dakle, sve su to pravili. Mi moramo otvoriti prostor da se prave objekti. Razvoja Ilijaša nema ako u narednih pet godina ne omogućimo da se izgradi 2-3 hiljade novih objekata podrazumijevajući i stanove. Tamo gdje nema dolaska ljudi, gdje se populacija ne povećava, mi nemamo ni potrošnje ni novog zamajca u ekonomskom razvoju. Dakle, moramo sve to obezbijediti. Ja sam uvijek govorio, bez obzira što ima problema, ali nama, pitanje napajanja električnom energijom, pitanje vodosnadbjevanja, pitanje ne znam koje druge vrste usluge, ne smije biti limit za razvoj. Ako ćemo mi reći "danas" da nemamo vode i zaustaviti razvoj narednih pet godina, onda mi trebamo ljudi ići iz ove sale. Mi moramo svakom investitoru obezbijediti tu vodu. Kako ćemo obezbijediti, to je naš problem. Hoćemo li je donositi u "kantama" ili ćemo naći pravi način kako se to radi. U ovoj godini će se ići intenzivno sa donošenjem novog Urbanističkog plana, kao ključnog plana koji regulira čitavo urbano područje i kroz taj Plan će se rješavati i pitanje vodosnadbjevanja i svega drugog. Mi smo postavili to na nivou Kantona da želimo obezbjeđenje dodatnih količina vode. Hoće li to biti iz Vogošće sa gradskog vodovoda, odnosno Peračkog vrela njihovog izvorišta ili ćemo neke druge sisteme, ali će se sigurno tim definisati i vodosnadbjevanje, pitanje struje i sve drugo. Mi trenutno imamo problem gdje Elektrodistribucija ne može obezbijediti 2 megavata za ozbiljnijeg investitora, ali imamo provedene postupke, javni tender za izgradnju trafo stanice 110 koja će to riješiti i imat ćemo dugoročno riješeno pitanje struje. Dakle, ovo je pitanje razvoja. Kada su u pitanju ti benefiti, nemojte da ih tako pojedinačno sužavamo. Kanton Sarajevo je najbolji primjer šta znači turizam, šta znače arapski investitori. Godina u kojoj je stalo, evo privreda je ostala, ilijaška privreda je ostala. Imamo negdje ispod 200 radnih mjesta koja smo izgubili, a većina privrednih subjekata je održalo i svoju proizvodnju i svoj izvoz i ja sam zaista pozitivno iznenađen da su ostvareni ti rezultati. Generalno i druga, međutim, turizam u Sarajevu je pao. Pao je hotelijerstvo, aerodrom, taxi usluge i pale su sve usluge ljudi. Kada mi je iz Superior grupe došao čovjek (to je fabrika u našoj industrijskoj zoni koja se bavi hranom, rekao je imamo problem načelnice. Kakav vi imate problem, vi hranu proizvodite, ne može za vas biti problem. Kaže "manje je usta". Morao sam vam ovo ispričati, jer je meni otvorilo svu priču. Manje "usta" u prošloj godini, million turista manje, nema ljudi iz dijaspe, nema onih koji će to kupiti. Dakle, nema dovoljno broja ljudi da mogu raditi naše slastičarne da ne bude kolač star tri dana, nego da se ti kolači za dan potroše ili mesnice ili nešto tog tipa. Mi moramo privlačiti ljude i obezbjeđivati uslove s aspekta demografije da ova općina ima stalni rast. Jesu li to sada i ovi investitori? Sugurno da u jednom dijelu, sigurno jesu. Ima li problema, ima, ali moramo ih rješavati. Ko misli da treba zaustaviti ovo, mislim da ne možemo zajedno. Ako ima neki drugi način da se može ova općina razvijati, evo bujrum, ali teško je naći te druge načine, jako teško. Niz općina hvata priliku da se uključi i gdje god je šansa da se uključi nešto što smo uspjeli, vodi se još, nije se privelo kraju, ovo kroz harmonizaciju i kroz katastar da se rješavaju imovinski odnosi na gornjem kraju općine, je već promijenilo sliku. Već imamo zahtjeva koliko hoćete na Crnoriječkoj visoravni, pa i na Gajevima. To je perspektiva tih krajeva, gradnja tih objekata koji znače vikendicu, odmor za kuću, koji će biti potrošači nekoj poljoprivrednoj proizvodnji i gdje će neki turistički objekti razvijati. To je jedan širok spektar aktivnosti, evo privrednih aktivnosti. Iz ovih aktivnosti mi imamo samo poreza na promet nepokretnosti koji je mene i ove godine iznenadio, prešao je million KM, uglavnom, promet tih vrsta lokacija i plaća se porez. Imamo rente i uređenje koje se plaća. Ovo nisu oni objekti koji se izdaju, ovo je gdje ljudi prodaju objekat, gdje čovjek ima svoju kuću za odmor. Dakle, uz sve neke negativne stvari koje to zaista i donese, međutim, ljudi ovo znači razvoj. Ja bih vas molio da s tog aspekta to gledate i ako treba da napravimo i tematsku sjednicu i da

pričamo o tome, da zaokružimo to pitanje, da zaokružimo kako ćemo to voditi. Mi smo otvoreni za to. Almir nećete se ti ljutiti, ali ova nekako često upotrebljavana rečenica "neko je dao pare, ne znam kome", gdje misliš da je dao pare, u Budžet ili nekome u džep. Mislim da tu trebamo upotpunosti korektni biti, pa kazati ako nešto neko misli. Želim potpuno jasno kazati da naš razvoj mora se temeljiti, prije svega, na donošenju ovih provedbenih prostorno planskih planova, a naravno biće prilika da sada i u Urbanističkom planu za Općinu Ilijaš dajemo svoja mišljenja. Taj plan usvaja Skupština KS, a mi se trebamo pripremiti i dati sve svoje primjedbe, zahtjeve, želje, Skupštini KS da se usvoji Plan onakav kakav je potreban ovoj općini.

ALMA OMEROVIĆ – predsjedavajuća

Kolege, prethodno sam zaključila diskusiju, ali možemo i pod tačkom 9 diskutovati obzirom da će biti ista tematika. Međutim, ako baš imate potrebu da još nešto kažete, evo kolega Šerak Vi ste se prvi javili, pa kolega Špirođić. Evo iskoristite priliku, napraviti ću "neki" izuzetak, postavite pitanja načelniku, ali ne da repliciramo jedni drugima.

ALAN ŠERAK – vijećnik SDP-a

Vezano za snošenje troškova što ste rekli investitori i ostali, ja nemam ništa protiv da mi snosimo tu vrstu troškova da je ta investicija opravdana. Ako smatramo da je ovo strateški razvoj ove lokalne zajednice, onda se ja bojim da se nećemo nikada složiti oko tih pitanja. Dio nekoga razvoja da, dugoročno gledajući, više šteti, nego što donosi koristi i to treba da nam bude jasno. Ali da nam je to nekakva grana sada, da će pozlatiti ovu našu lokalnu zajednicu, bojim se načelnice da nije. Vezano za pristupanje izradi RP, da naravno, zahvaljujući hadžinici Melihi Avdibegović i njenom radu, jer da ste se Vi pitali, Vi bi ste to, kao nekada, rješavali korekcijom, kao što se radili svojevremeno i šta je sve bilo.

AKIF FAZLIĆ – općinski načelnik

Ja sam predlažao akata.

ALAN ŠERAK – vijećnik SDP-a

Nije ni bitno. Dakle, kažete da imamo 5000 stanovnika manje. Tačno, u odnosu na popis iz 1991. godine. Međutim, nemojmo da zamjenjujemo sada ovdje teze. Hajde da vidimo koliko stanovnika je bilo 1991. godine na gradskom vodovodu, a koliko sada. Hajde da vidimo, hoćemo li?

ALMA OMEROVIĆ – predsjedavajuća

Molim Vas kolega da se držimo dnevnog reda, a ne da pričamo o popisu stanovništva iz 1991. godine.

ALAN ŠERAK – vijećnik SDP-a

Pričamo o dnevnom redu. Ovo je replika na njegovo izlaganje.

ALMA OMEROVIĆ – predsjedavajuća

Zaključila sam bila diskusiju, ali sam omogućila da postavite pitanja, ako imate nešto direktno da pitate i molim vas da to poštujete, jer ću inače zatvoriti diskusiju i dati tačku dnevnog reda na glasanje.

ALAN ŠERAK – vijećnik SDP-a

U konačnici, slažem se da mi trebamo imati tematsku sjednicu po ovom pitanju. Vjerujte ja ću biti za izgradnju objekata za kolektivno stanovanja na Banovcu sve do stadiona, nego da imam 30 nekakvih apartmanskih naselja, jer u objektima kolektivnog stanovanja će ljudi da žive i oni će biti naši potrošači.

Ne znam načelnice kako tako da promjeniš kurs, jer prošli put sam vam čestitao na diskusiji u prošlom mandatu.

ALMA OMEROVIĆ – predsjedavajuća

Kolega Šerak morat ću Vas prekinuti, mislim da smo iscrpli raspravu po pitanju ove tačke dnevnog reda i sve kolege koje imaju nešto neka ostave za slijedeću tačku dnevnog reda. Omogućila sam da diskutujete, mislila sam da će biti nešto konstruktivnije prema načelniku.

Diskutanata po ovoj tački dnevnog reda više nije bilo, pa je OV-e većinom glasova usvojilo Nacrt Odluke o usvajanju Regulaciono plana "Apartmansko naselje Doci"

ADNAN ABADŽIJA – vijećnik NIP-a

Izrazio je sumnju u glasanje i zatražio pojedinačno glasanje.

ZA su glasali vijećnici: Alma Omerović, Anel Bumbulović, Mehmed Sinanović, Elma Masnopita, Alen Hasković, Adem Alić, Halid Dizdarević, Seid Bektić, Kenan Hasić, Semir Dedić, Denis Dilberović, Akif Bešlija i Muhamed Handžić

PROTIV su glasali vijećnici: Almir Špiodić, Dino Čustović, Adnan Abadžija, Alema Džafo, Alan Šerak, Anela Subašić

UZDRŽANI su bili vijećnici: Vernesa Bešlija, Kenan Buza i Meho Hido

ODSUTNI vijećnici: Amina Ramić i Selma Barić

Konstatovano je da je Nacrt Odluke o usvajanju Regulaciono plana "Apartmansko naselje Doci" usvojen većinom glasova.

Predsjedavajuća je potom dala na glasanje Nacrt Odluke o provođenju Regulaciono plana "Apartmansko naselje Doci".

OV-e je većinom glasova usvojilo Nacrt Odluke o provođenju Regulaciono plana "Apartmansko naselje Doci".

Zatim je OV-e većinom glasova donijelo

## ZAKLJUČAK

1. Utvrđuje se Nacrt Odluke o usvajanju Regulacionog plana "Apartmansko naselje Doci" i Nacrt Odluke o provođenju Regulacionog plana "Apartmansko naselje Doci".
2. Javni uvid na Nacrt Odluke o usvajanju Regulacionog plana "Apartmansko naselje Doci" i Nacrt Odluke o provođenju Regulacionog plana "Apartmansko naselje Doci" će biti u periodu od 05.02.2012. do 19.02.2021. godine u maloj sali Općine Ilijaš II sprat, a Javna rasprava na Nacrt Odluke o usvajanju Regulacionog plana "Apartmansko naselje Doci" i Nacrt Odluke o provođenju Regulacionog plana "Apartmansko naselje Doci" održat će se 22. februara 2012. godine u maloj sali Općine Ilijaš/II sprat/ sa početkom u 14 sati i 30 minuta.
3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš dostavljaju se Općini Ilijaš, Službi za prostorno uređenje i zaštitu okoliša, koja organizuje i sprovodi Javnu raspravu.
4. Služba za prostorno uređenje i zaštitu okoliša dužna je nako sprovedene javne rasprave da podnese izvještaj Općinskom vijeću Ilijaš, o rezultatima Javne rasprave koji sadrži primjedbe, prijedloge i mišljenja kao i da obrazloži razloge zbog kojih pojedine primjedbe, prijedlozi i mišljenja nisu prihvaćeni.

### AD-9

#### Prijedlog Odluke o priistunju izradi Regulacionog plana "Apartmansko naselje Mrakovo II" Ilijaš

Pauza 10 minuta (od 16:25-16:40h)

MUAMER MEŠETOVIĆ – šef odsjeka za dozvole

Ovdje je kao i u prethodnom slučaju firma "O.M.A. Real Estate" d.o.o. Sarajevo kupila je katastarske parcele površine 1ha u Mrakovu i obratila se zahtjevom za izgradnju 4 objekta apartmanskog tipa. U tim postupcima smo pribavili mišljenje Zavoda za planiranje razvoja KS I Zavod je rekao da se taj lokalitet treba da razmatra kroz izradu RP, a da se ta 4 objekta može izdati urbanistička saglasnost. Firma je napravila pismo namjere i izrazila da finansira sve te troškove, isto kao i u prethodnoj tački. Pribavljeno je mišljenje Ministarstva prostornog uređenja, građenja i zaštite okoliša KS vezano za Elaborat o procjeni uticaja gradnje na okoliš gdje je konstatovano da nema negativan uticaj ta planirana gradnja. Shodno metodologiji o izradi planske dokumentacije, Općinsko vijeće je nadležno da usvoji ovu Odluku, s tim da se za ova 4 objekta za koja se investitor obratio zahtjevima, izuzme, da se unaprijed mogu izdati urbanističke saglasnosti obzirom da je Zavod dao pozitivno mišljenje. U daljoj procedure, investitor će angažovati firme za izradu geodetskih geoloških podloga, potpisat će se ugovor o finansiranju, o izradi Plana, dalje ide koncept, nacrt i javni uvid. Znači, isto kao i u prethodnoj tački. Primjedbe koje su opravdane ugrađuju se u Plan, a neopravdane se ne ugrađuju uz obrazloženje Zavoda. Služba predlaže OV-u da usvoji ovu Odluku o pristupanju izradi RP.

## ALMIR ŠPIODIĆ – vijećnik NIP-a

Dozvolit ćete, nadam se, da se osvrnem i na diskusiju načelnika po prethodnoj tački i da me nećete prekinuti. Vrlo ću kratko. Kolega je pročitao da nema gradnja nema štetan uticaj na okoliš. Imate u jednom dijelu ovog prijedloga gdje piše “i kanalizaciona mreža je urađena sa Q 200 cijevi i kada se krene gradnja ta će se cijev mijenjati”. Cijev od Q 200 se uključuje u cijev od Q 300 kanalizacionu mrežu koja ide pored rijeke gnionice i pazite ovo “ispušta se u rijeku Gnionicu” Da li ovakav postupak ima uticaj na okoliš i volio bih da mi bilo ko dadne neki odgovor u ovoj sali. Pretpostavljam da će se usvojiti kao i prethodni RP. Znači, kanalizaciona mreža mijenja se, kao oni će to riješiti, staviti će novu cijev nekih 200-300 m koliko treba i tu cijev će uključiti u kanalizacionu mrežu koja ide pored potoka Gnionice i onda se ispušta u Gnionicu. A onda, kada nam dolaze ti naši turisti i ljeti preko mosta kada prođete ne zna se šta više smrdi. Da li štale gospodina koji tamo preko puta drži stoku ili smrdi kanalizacija kada potok presuši. Da ste ih uslovili izgradnjom nekih kolektora ili nešto slično, ovo bi bilo i prihvatljivo, pa bih mogao reći da nema uticaj na okoliš. Međutim, ovo ima direktnog uticaja na okoliš i to štetni uticaj na okoliš. Ljudi iz Zavoda koji to urade, znamo kako to već ide. Teoretski je to vrlo jednostavno napisano i obrazloženo i teoretski je ovo potkrijepljeno dokazima da se može dati saglasnost na prijedlog ove Odluke. Međutim, u praksi je to provođenje vrlo specifično. Evo samo jedan od primjera, da ne navodim sada tamo, gdje kaže da teren gdje će se graditi nije stabilan. Možda je to manje važno, Ako mi usvojimo prijedlog Odluke o pristupanju izradi RP Mrakovo II Ilijaš gdje su nam ljudi napisali da će se ispuštati kanalizacija u rijeku Gnionicu, kakvu poruku mi šaljemo građanima. Poruku o razvitku Općine Ilijaš, kao mi u tom pravcu treba da se razvijamo. Drago mi je da je načelnik u prethodnoj diskusiji spomenuo “primjetio problem nedostatka građanstva i ljudi”. Ja mislim da u proteklom godinama, u posljednjih pet godina, najmanje 1000 ljudi je otišlo sa područja Općine Ilijaš načelnicu. Ali ne zato što nisu imali apartmanska naselja, nego su otišli zbog nepravde i nekih drugih stvari i da me predsjedavajuća ne bi upozoravala znam da sam otišao sa tačke dnevnog reda, ponovo se vraćam. Ovdje pričamo o mojim komšijama iz Mrakova, Alića Bare, koji godinama imaju problem sa širenjem neprijatnog mirisa iz potoka Gnionica koji je već postao kanalizacija, isto kao što su postale sve pritoke rijeke Bosne, pokretne kanalizacije. Ja predlažem kolegama da ovo ne usvojimo. Ne zato što ja imam nešto protiv, da sam protiv ovo što načelnik kaže da je ovo jedna grana koja se treba razvijati kao alternative Ilijaša i da mi trebamo dovoditi ovdje ljude. Nama ljudi trebaju ovdje, kao što kolega Šerak reče, 24 h i svih 365 dana u godini, a ne samo 2-3 mjeseca u ljetnom period. Imamo mi našu dijasporu koja takođe pojača fondove naših privrednika i ugostitelja kada dođu. Puno više oni potroše nego potencijalni Arapi, ako već pričamo i trudimo se da usvojimo RP da udovoljimo investitorima i tim firmama koje prave. Vi se sjećate da imamo jednu Odluku iz 2017. godine gdje smo donijeli Odluku o numerizaciji stambenih jedinica. Ta Odluka sada skuplja prašinu u nekim ladicama, ne znam dokle se došlo sa tom Odlukom. Još 30-40% Općine Ilijaš se vodi kao bb, ali je važno da napravimo i u prioritet stavimo izradu RP za apartmanska naselja. Mislim da mi ne vodimo dovoljno računa o našim građanima i ne zastupamo ih na pravi način ovdje kako bi trebalo.

## ADNAN ABADŽIJA – vijećnik NIP-a

Nadovezao bih se na diskusiju kolege Špiodića, ukoliko je moguće, da mi u ovoj Odluci skrenemo pažnju da se dopuni ovaj detalj odvodnja oborinskih voda, jer kanalizaciona mreža koja prolazi kroz Mrakovo često ima problem sa plavljenjem površinskih voda sa



Savića Brda gdje je jedan krak regulisan odmah na oštroj krivini, prije prvog mosta, a da ovdje idemo sa nekom dopunom ukoliko možemo mi to uraditi ili ako može nadležna Služba da se na ovo skrene pažnje. Jer, površinske vode koje ispod džamije prelaze, provedene su samo tada kada se put radio, stavljene su cijevi i prevedene su u baru tzv. dio naselja u Mrakovu koje se zove Bara, gdje prilikom svake kiše dolazi do plavljenja nekoliko kuća. Reći ću vam da je to cca 15-ak kuća gdje je i moja kuća lično. Ta površinska voda bi prelazila tu i kanalizacija kroz naselje Mrakovo je tu provedena pored samog asfaltnog puta, pa da vidimo da li možemo šta uraditi po tom pitanju i nikada ta kanalizacija nije odvedena dalje od, da kažemo, jednog dijela Gnionice, dalje ide dakle tim potokom. Znači, trebalo bi nešto uraditi po tom pitanju, da se uradi neki kolektor na krajnjem toku rijeke, odnosno rječice Gnionice gdje bi se to pročistilo da ne ide sve u rijeku Bosnu od Sarajevo do Doboja. Moje mišljenje, ne znam da li će mi neko moći odgovoriti po tom pitanju, da se to uvrsti ovdje da ne bi dolazilo do još višeg zagađenja naše okoline. Rekli ste da će se u tom apartmanskome naselju graditi četiri objekta, u suštini ne znam da li je tu bilo ikakvih kuća i upravo zbog toga predlažem da neko predloži da se to zemljište ispita po pitanju stabilnosti. Ako je struka rekla da može, onda neka se pravi. Još jedanput naglašavam, a to ću i u jednoj inicijativi dok se konsultujem sa komšijama u vezi tih površinskih voda koje su se usmjerile na određeni broj kuća i to nikada nije regulisano poslije rata, evo i načelniku sugerišem da nadležna Služba izađe na teren i razmotri šta se može uraditi, pročišćavanje tog kanala, a gospodin Bešlija poznaje taj dio, ispod džamije 100-ak m površinske vode, potok koji non stop teče preveden je samo u livade ljudima koji i dalje plavi nekoliko kuća.

HALID DIZDAREVIĆ – vijećnik SDA

Kratko ću se osvrnuti na diskusiju kolege Špiodića, a radi se o slijedećem: istina da ima potrebe za, kao što kaže i Adnan, za nekim rješenjima što se tiče odvodnih voda. Međutim, cijenim da i mi imamo na granici Vogošće i Ilijaša otpadne vode koje nama idu u Bosnu. Također, sve rijeke otprilike tako se rješavaju. Imamo kolektore jedino u Butilima i ne znam je li moguće da samo četiri kuće naprave kolektore za sebe, je li bi to trebalo da se obuhvati za čitavu Općinu Ilijaš i korektno je da svi imaju iste uslove, jer otprilike kompletna sva naselja, znamo svi gdje završavaju.

ALMIR ŠPIODIĆ – vijećnik NIP-a (replika)

Cijenim ovo informisanje od kolege Halida vezano za kolektore. Ja, koliko imam informaciju, na području Općine Ilijaš su se trebala graditi četiri kolektora. Mislim da su prije rata i postojali kolektori koji su se s vremena na vrijeme čistili. Četiri po četiri, sto četiri, pa izađemo na ovih 500 kuća koje prave generalno problem svima nama. Nisu to jedini problemi. Načelnik maloprije govori kako je važno usvajati RP i sistemski donositi rješenja. Potpuno se slažem s tim. Zašto se sistemski ne pravi rješenje načelniče evo konkretno za ova problem. Ovdje ste ovo naveli, ovo je neko greškom napisao pretpostavljam ili je neko bio previše iskren pa je stavio onako kako jeste.

MUHAMED HANDŽIĆ – vijećnik SBB-a (replika)

Zaista se nisam imao namjeru uključivati po pitanju ovih apartmanskih naselja, ali ne mogu da shvatim da načelnik šuti i ništa ne priča, a znate da je prije 7-8 godina usvojen Plan kanalizacione mreže za Općinu Ilijaš, Slušam kolege koje govore o kolektirima, ovo su sekundarni vodovi, a primarni je planiran duž rijeke Bosne i planirano je nekoliko kolektora

od Melešića pa dole do granice sa Općinom Visoko da se uradi. Sada, nisu to kolektori kao u Butilima. Vi mislite da su to kolektori ne znam koliko gabarita. To su mali kolektori za pročišćavanje ove naše mreže koja ide iz Općine Ilijaš. Kaže, imamo samo kolektore u Butilima, čuj kolektor u Butilima. To zadovoljava pola miliona ljudi.

ALMA OMEROVIĆ – predsjedavajuća

Zamolit ću Vas da se vratimo na temu. Rekli ste dovoljno i nemojte da sada obrazložimo kolektore i ostalo.

MUHAMED HANDŽIĆ – vijećnik SBB-a (replika)

Nemojte me molim vas prekidati. Moram ja, kada načelnik neće da obrazloži da smo mi taj Plan kanalizacije, a ljudi se “uhvatili” Plana, ide u Stavnju, ide ondje, pa gdje više ide, daj neka ide meni kući.

ADNAN ABADŽIJA – vijećnik NIP-a (replika)

Kolega, kada su tako mali, onda nisu ni skupi. Ako je prije osam godina donesena Odluka, zašto se nije bar jedan postavio kolektor? Osam godina prošlo i niti jedan kolektor nije postavljen. Za dvadeset godina možda će se jedan postaviti.

ALMIR ŠPIODIĆ – vijećnik NIP-a (replika)

Ja zaista cijenim diskusiju kolege Handžića, detaljnije nas je informisao. Ja sam čuo, imao sam informaciju, a nisam znao kada je tačno donesen Plan vezano za kanalizaciju da će se praviti kolektori. Sve ovo što pričamo ima veze sa ovom tačkom dnevnog reda. Ja, kao legalista, ne mogu da prihvatim da se kanalizacija ispušta u potok.

ALMA OMEROVIĆ - predsjedavajuća

Zamolit ću vas da replike i diskusije budu u ovom smjeru i na ovu temu.

ALMIR ŠPIODIĆ – vijećnik NIP-a (replika)

Znači, otišli smo daleko od teme, ja sam pročitao ovo što piše u ovom prijedlogu Odluke da će se kanalizaciona mreža koja ide iz apartmanskog naselja, nije bitno što su to četiri kuće, izljevati u rijeku Stavnju. Za mene je to neprihvatljivo. Ako već osam godina mi imamo problem i pitanje šta smo uradili po tom pitanju da se to riješi? Svi mi osjetimo taj neugodni miris kada prelazimo preko mosta na Stavnji ili Gnionici. Sada upravo dolazimo do ovoga što upravo načelnik govori, do usvanja novih RP. Mi prvo moramo urediti postojeće stanje koje imamo, pa tek onda davati saglasnosti za neke RP i dovoditi neke investiture.

ALEN HASKOVIĆ – vijećnik SDA (replika)

Kolega Špiodić je u svojoj diskusiji rekao i istakao važnost donošenja RP i rekao da se slaže s time, sa našim načelnikom. Ako se on slaže s time, ja ga pozivam da glasa za ovaj prijedlog Odluke o pristupanju izradi RP Apartmansko naselje Mrakovo II Ilijaš, jer mi danas donosimo Odluku o pristupanju izradi RP. I jedno onako generalno pitanje, gdje

ostale otpadne vode odlaze, mene baš zanima.

ALMA OMEROVIĆ – predsjedavajuća

Molim kolege da ne dobacuju. Niste vi odgovorni da odgovarate gdje otpadne vode odlaze.

ALMIR ŠPIODIĆ – vijećnik NIP-a (replika)

Kolega Haskoviću, hvala vama na pozivu, ali ja sam i dalje pri stavu i neko ko je otprilike principijelan, ne želim da glasam za RP, za prijedlog izrade RP u koje nije definisana odvodnja kanizacionih voda i gdje se kaže da se kanalizacija ispušta u potok Gnionica paralelno. Pored te Gnionice žive naši građani, stanuju naša djeca, pored te Gnionice su putevi i djeca tim putevima idu u školu itd. Ja na takav način ugrožavam sigurnost naših sugrađana ako prihvatim ovako kako piše. Ja ne tražim ništa drugo. Tako piše u ovoj Odluci i zbog toga ja to ne želim podržati, a vi bujrum, ako ste već negdje dogovorili da trebate podržati, vi podržite. Moje mišljenje i stav, neću ga podržati.

ALAN ŠERAK – vijećnik SDP-a

Čitajući ovaj Prijedlog Odluke o pristupanju izradi RP nisam saznao ništa novo što nisam pretpostavljao, naravno da će biti. I dalje se ovdje predlaže da će se i ovo naselje snadbijevati vodom sa gradskog vodovoda. I pazite sada našeg Zavoda za planiranje – ovo o čemu mi pričamo svo vrijeme, poziva se na nekakvu zaštitu okoliša, a ovim RP želi da kanizacionu vodu spusti u potok Gnionicu. Vama za informaciju, obzirom da se pozivaju na nekakve komišije moji roditelji žive u Gnionici i ja ću ovo shvatiti Akife Fazliću, kao neka vrsta revanšizma, ali o tom po tom naravno. Znate i sami koje smo problema imali sa mještanima naselja Alića Bara koji su ovdje dolazili, demonstrirali, najavljivali se upravo jer se iz istog potoka širio nesnosan smrad. A pazite sada apsurd – trenutno smo u izgradnji šetališta, rekreacionog parka na potezu Kadarički most-ušće na rijeci Bosni u koji se ulijeva taj nekakav potok Gnionica. Pa je li to stvarno normalno rješenje? Vezano za kolektore. O kolektorima se nakon rata pričalo, to ovi stariji znaju koji su pratili rad Općinskog vijeća. Nikada se ni jedan nije izgradio, Ja sam, ako ništa, očekivao od ovog bujnog našeg Zavoda da će nam predložiti da mi napravimo jedan kolektor u toj Gnionici, jer tu se sada slijeva i Sovrle i dio Podlugova, Popovići, Mrakavo, Salanov Han i sva ta naselja koja gravitiraju uz potok Gnionicu. I to sve završi u Alića Bari da ljudima smrdi onako kako smrdi. Po meni, ovo je stvarno neprihvatljivo. Ja za ovo neću glasati, ali evo opet uputit ću neku vrstu molbe da ovo stvarno doradite i nađite neko bolje rješenje. Ovo nije rješenje, ovo sve, samo ne sistemsko rješenje. Ili ćemo onda u suprotnom kada bude sušni period, ja ću lično tražiti od svih nas da odemo dole i vidimo kako to izgleda. Stvarno da vidite.

ADNAN ABADŽIJA – vijećnik NIP-a (replika)

Samo da repliciram što kaže kolega (ovdje sam tražio da se uvrsti ugradnja kolektora), prije osam godina planirano, dajte da vidimo šta se tu može uraditi, jer je tu najveći sliv otpadnih voda. Nije malo naselje Popovići, Mrakovo, samo da njih uzmemo, i gore apartmansko naselje Popovići, Salkanov Han i sve se to svodi u Gnionicu. Možda vi ne znate to, trebali bi malo prošetati i vidjeti, ali uglavnom, našu rijeku Bosnu da bar malo mi sačuvamo što se tiče tog jednog kolektora ako je to planirano prije osam godina, pa da tu u Gnionici odradimo bar jedan dio. Ne znam da li struka može da kaže koliko košta taj

jedan kolektor, ali vrijeme je da se jedan ugradi na Općini Ilijaš.

SEID BEKTIĆ – vijećnik SDA

Ja bih replicirao svim kolegama. Ovo je prijedlog da se ide u izradu RP. Kada ide prijedlog RP, ide na javnu raspravu gdje mi možemo ove sve vase prijedloge da unesemo, prihvatimo ili ne prihvatimo. Mislim da ovo ne treba da bude toliko sporno koliko ja vidim. Znači ima javna rasprava gdje će ljudi, stanovnici tih naselja, doći da se očituju po tom pitanju.

ALAN ŠERAK – vijećnik SDP-a (replika)

Kolega Bektiću, Vi ste novi vijećnik pa ne znate kako stvari funkcionišu i ne uzimam vam to za zlo naravno. Ovo ti je 98% RP koji će ti biti u Nacrtu i to neka ti bude jasno. Ništa se ovdje epohalno neće promijeniti, jer tako stvari, nažalost, funkcionišu ovdje. Sve ti je ovdje napisano. Oni hoće da pristupe izradi RP pod ovim okolnostima, jer su nam rekli šta i kako će se izvršavati. Evo živi bili, pa vidjeli, imam iskustva i zato vam ovo i kažem. Ovo vam je 90 i nešto procenata budućeg RP.

SEID BEKTIĆ – vijećnik SDA (replika)

Ja se zahvaljujem kolegi Šeraku, ali ja ipak mislim da građani kada dođu i vi kao vijećnici kolege, možete uticati na donošenje Odluka i ne mora da znači, jer sam i sam sudionik da se neke Odluke mogu promijeniti koje su RP predviđene, tako da Vaša konstatacija ne stoji.

ALAN ŠERAK – vijećnik SDP-a (replika)

Da li stoji ili ne stoji, ja ću ti opet reći, iz iskustva, da stoji itekako, jer sam prošao million puta kroz ove stvari. Znam o čemu pričam. Ti pričaš paušalno. Pričaš na bazi nekih pretpostavki. Trebalo bi idealno biti tako. Vidi prijatelju moj, neće biti tako, jer znam da neće. Ovo, jel misliš da će ti Akif napraviti kolektor dole? Neće. Akif ti neće napraviti kolektor, jer da ga je htio napraviti, napravio bi ga davno. Onog momenta kada je uveo kanalizacionu mrežu u Mrakovo, sjećate se to je bilo mislim 2008. godine, tada bi ga pravio. Neće ga praviti i znam šta pričam.

SEID BEKTIĆ – vijećnik SDA (replika)

Ja mislim ipak da trebamo zajedno svi imati stavove po tom pitanju i kada dođe Nacrt RP na javni uvid, da izađemo i ja i ti i da budemo na toj javnoj raspravi i da utičemo na to da se neke stvari donesu u korist građana.

ALMIR ŠPIODIĆ – vijećnik NIP-a (replika)

Kolega Seid Bektić kaže da je ovo prijedlog Odluke o pristupanju izradi RP i da ćemo mi na javnoj raspravi davati svoje prijedloge. Pa evo mi predlažemo zadnje tri sjednice ovdje i ne znam šta je prošlo, osim ono što je zacrtano tamo negdje gdje je politika zacrtala da se mora usvojiti. Isto tako će se desiti i sa usvajanjem RP. Znači, ta neka priča zaista kod mene ne prolazi da ono "hajde izglasajte ovo, pa ćemo vidjeti kasnije".

ALMA OMEROVIĆ – predsjedavajuća

Kolege, molim vas, Evo vidite, pustila sam da diskutujete, razumijem sve, ali nemojte da pričamo šta će se desiti, kako će ko glasati. Pričamo o tački dnevnog reda prijedlog Odluke o pristupanju izradi RP Apartmansko naselje Mrakovo II Ilijaš.

ALMIR ŠPIODIĆ – vijećnik NIP-a (replika)

Pričamo o tački dnevnog reda gdje me prekidate.

ALMA OMEROVIĆ – predsjedavajuća

Hajde molim Vas, ako mogu reći da malo skratimo, imamo sve vrijeme za ovu tačku dnevnog reda. Nemojmo da pričamo šta će se desiti, kako će ko glasati. Glasat ćemo na kraju, a sada pričamo o tački dnevnog reda.

Načelnik čeka, odgovorit će na postavljena pitanja i mislim da ste htjeli kolegi Abadžiji odgovoriti, ali evo kada isrcpimo raspravu, načelnik će na kraju.

ALMIR ŠPIODIĆ – vijećnik NIP-a (replika)

Upravo sam to i govorio, a zaista je tema takva, pa se malo ode od dnevnog reda. Znači o prijedlogu Odluke i ne znam s kojim pravom nas Bektić poziva da glasamo za ovu Odluku za koju mi smatramo da je u startu napravljena neispravno i ako sada nećete da prihvatite i povučete tačku sa dnevnog reda na dorado, to može predlagač, smatram da nema potrebe dolaziti ni na javnu raspravu, jer svakako naši prijedlozi neće biti prihvaćeni.

ALAN ŠERAK – vijećnik SDP-a

Ovo što kolega Špiodić govori, apsolutno se slažem. Sve ono što mi budemo u toku javne rasprave donijeli u Službu i predložili, naravno biće “glat” odbijeno iz razloga što ne postoje ni finansijska sredstva, nit postoji zakonski okvir i ne znam nija šta već, i naći će se milijardu razloga kao što je to bilo u prošlosti. Dakle, ako se usvoji ovakav dokument kakav jeste, to vam je biti RP. Ako želite i ako mislite da ja dezavuišem Vijeće, svakao uzmite iz prethodnih saziva Vijeća sve ove naše Odluke koje smo donosili, samo uporedite, pa ćete vidjeti kako stvari funkcionišu. To vam je jednostavno tako.

ALMIR ŠPIODIĆ – vijećnik NP-a (replika)

Kolega Šerak je spomenuo, a evo pričamo o problemu odvodne kanalizacije iz ovog Apartmanskog naselja Mrakovo II i pričamo da imamo nedostatak kolektora itd., da se ta kanalizacija, po meni, ne treba i ne može ulijevati u potok Gnionicu, a onda kaže reći će da nemamo dovoljno sredstava da se prave kolektori itd. Evo sad ću vam reći jedan podataka i neću više ništa diskutovati po pitanju ove tačke dnevnog reda. Na stotine kuća su napravili Bošnjaci, Bosanci i ostali na području Mrakova i Podlugova i svi uredno platili građevinske dozvole, napunili podobro finansijski ovaj Budžet Općine iz svojih džepova, upravo da se riješe ova pitanja i evo nisu riješena. Ne želim više ništa komentarisati po ovom pitanju.

Želim odgovoriti na pitanje uvaženog zastupnika Adnana Abadžije i čestitati mu na pristupu kada je u pitanju ova tačka dnevnog reda, a to je realnost ljudi u kojoj mi živimo. Dakle, jedna vrsta prijedloga da se izađe s nekim alternativnim rješenjem u smislu da se riješi pitanje kanalizacionih vodova na tom potezu, ima potpunog smisla. Sve drugo što smo pričali u okviru ove tačke dnevnog reda, ljudi, potpuno je nerealno. Prvo, iznenađuju me neki vijećnici koji još uvijek ne znaju šta su kolektori. U Butilima nije kolektor, nego prečistaći. Dakle, mi imamo već kolektore. Tretman kolektora može imati kanalizacioni sistem u Misoči koji ide ovdje do željezničke pruge i može imati ovaj Popovići-Han-Mrakovo koji ide gotovo opet ovdje do pruge. Dakle, ovo priključenje neće imati u smislu direktnog uključenja u potok, uključit će se u taj sistem kolektora. Nažalost, naši kolektori, nažalost, ni jedan ne završava sa prečistaćem i neće sigurno još dugo završiti s prečistaćem, jer Kanton Sarajevo, kao najbogatiji kanton u Federaciji BiH, itekako ima problema sa upravljanjem prečistača u Butilima. Dakle, o izgradnji neću da pričam i koje su to milionske cifre, ali o održavanju godišnjem koje je na nivou nekih 6 miliona su cifre koje ni jedna lokalna zajednica ne može podnijeti. Zbog toga još uvijek živimo u vrijeme i uslovima kada imamo samo Butila koja rješavaju 60% grada Sarajeva i ništa više. Pitanje rješavanja tretmana otpadnih voda za Ilijaš se tretiralo jednom donacijom Republike Slovenije koja je obezbijedila 200.000,00 eura za izradu projektne dokumentacije za rješavanje tretmana otpadnih voda za tri općine: Vogošća, Ilijaš i Breza koje je u predračunu, dakle projektantskom predračunu, izgradnja njegova koštala blizu 70 miliona eura. Imala je dvije varijante: da se pravi samo jedan prečistač na granici prema Općini Visoko, odnosno ZD-Kantonu i druga varijanta je bila da se naprave 3 ili 4 prečistača – jedan u Semizovcu koji bi tretirao otpadne vode iz Vogošće, dva na području Općine Ilijaš i jedan tamo negdje u Vrboviku gdje završava granica Općine Breza. Takav projekat, nažalost, ni jedna vlast u Federaciji BiH (ni kantonalna ni federalna), nije podržala, jer je taj projekat podrazumijevao izdavanje urbanističkih, okolišnih, građevinskih dozvola na nivou Federacije, jer je tretirao dva Kantona i tri općine. To je jedan aspekt. Drugi aspekt je pitanje cijene vode, jer kroz obračun vode dodaju se usluge kanalizacije. Dakle, tu su propočuni bili da bi možda za dva puta u odnosu na cijenu vode bio sistem održavanja tog sistema. Ekologija ljudi nije jeftina. Ekologija je nama potrebna i mi se moramo okretati projektima iz ekologije. Pitanje prečistača se može finansirati isključivo kroz Budžete Kantona, Federacije i međunarodnih sredstava. Niko, ni jedna općina ili razvijeniji grad nije u poziciji da to sam uradi. Mi imamo dozvolu, mislim do 2025. godine od agencije za vode da Bosna bude recipient toj svojoj otpadnoj vodi. Dakle, mogu oni pisati šta god hoće kada vi to ne možete napraviti. Vjerovatno ćemo kao i štošta drugo, produžiti tu Odluku, jer se ozbiljnije kada su u pitanju ti projekti još niko neće da se uključi i da se bavimo tim projektima. Da zaključim. Ako smo spremni da kažemo da se može više niti jedna kuća priključiti, bila iz naselja apartmanskog arapskog, ovog ili onog, treba da imaju status svi, da više ni jedna kuća koja treba da se priključi, osim onih koji žele praviti septičke jame, ne bi onda mogla dobiti dozvolu. Dakle, ja neću tu vrstu ograničenja, prije svega, našim građanima, a i ovim drugim investitorima. Šta to znači za fabriku u Luci i svaki drugi projekat? Svi bi mi željeli da je ovo super riješeno, da imamo taj razvijen sistem. Dakle, mi smo još uvijek u nekoj siromašnoj državi gdje se borimo za neki razvoj i, nažalost, taj razvoj plaćamo kroz nizak nivo ekoloških projekata. To su prošle sve države u Evropi, samo prije 100 godina. I mi prolazimo to. Svoj razvoj plaćamo time da zagađujemo svoju okolinu. Koliko možemo sada dinamički popravljati smanjenje zagađenja sigurno će zavistiti i od nekog razvoja koji treba da obezbijedi više novaca za ekološke projekte, ali to je dug period i to je zaista lančani, vezani sistem koga moramo samo tako promatrati, a ne

sad ono "evo pravimo 15 kuća i njihove opadne vode će završiti na kraju potoka Gnionica". Završit će, uz svu problematiku onoga, što se kaže, nas koji živimo nizvodo, doći će meni u Lješevu, doći će Almi u Ljubniće, doći će nekome u Balibegoviće, doći će nekome u Podlugovi, doći će Alanu Šeraku u Gnionicu. Još će to potrajati, ali ja zaista apelujem na jednu realnost i da napravimo neka najbolja moguća rješenja koja su sada provodiva i moguća. I u tom smislu pozivam vas za podršku.

Diskutanata po ovoj tački dnevnog reda više nije bilo, pa je OV-e većinom glasova donijelo

Odluku o pristupu izradi Regulacionog plana  
"Apartmansko naselje Mrakovo II" Ilijaš

AD-10

Prijedlog Odluke o visini bazne cijene za određivanje naknade za uređenje građevinskog zemljišta na području općine Ilijaš za 2021. godinu

MUAMER MEŠETović - šef odsjeka za dozvole

U postupku pripremanja ove Odluke Služba je prikupila određene podatke o koštanju infrastrukture kada je u pitanju izvođenja radova u prošloj godini po 1m<sup>2</sup> odnosno po metru dužnom od izvođača radova tako da smo utvrdili da putna mreža u prosjeku košta 70 KM/m<sup>2</sup>, kanalizacija 150 KM i voda 142 KM. To je minimum uređenja što je potrebno da se izda dozvola za građenje i utvrdili smo da je cijena prosječna po m<sup>2</sup> 362,5 KM. Međutim, prilikom obračuna naknade za uređenje koju plaćaju investitori objekata, ukoliko bi to bila osnovica, troškovi bi bili stvarno visoki, pa smo predložili da se zadrži na iznosu od prošle godine, a što je bilo 200,00 KM. Predlažemo OV-u da ovakvu Odluku usvoji.

AKIF FAZLIĆ - općinski načelnik

Muamer je rekao ovaj tehnički aspekt, a ja želim samo da dopunim nešto što je, po meni, važno. Dakle, kroz prijedlog ove Odluke utvrdili smo da se za IV, V i VI zonu za stambene objekte ova bazna cijena smanji za 50%. Dakle, umjesto što je 200, za 100, i time se troškovi uređenja smanjuju za 50%. Za apartmanska naselja i vikend objekte, obračunava se cijena u ukupnom iznosu i nema oslobađanja. I broj tri, dakle, komercijalni objekti, a misli se na stambeno-poslovne objekte koji se grade radi prodaje, dakle prije svega u zonama RP Banovac i Centar, utvrđena je jedinstvena cijena u iznosu od 90,00 KM, jer je to praktično jedan lokalitet koji je gotovo identično uređen s aspekta uređenja. Evo u tom smislu kroz ovu Odluku imamo jednu vrstu povoljnosti za stambenu gradnju naših građana izvan ova dva RP. Dakle, ove tri zone niže u odnosu na našu III zonu, kao I zonu u Ilijašu. Ostalo ostaje isto. Zaokružili smo uređenje u gradu Ilijaš na 90,00 KM, a raspon je bio između 85,00 KM i 90,00 KM i koju KM, shodno obračunu kako ste vidjeli ovom metodologijom.

ALMA OMEROVIĆ - predsjedavajuća

Komisija za statut i propise je dala mišljenje da baznu cijenu treba odrediti u iznosu od 94,70 KM/m<sup>2</sup>, da se ne mijenja taj iznos na 90,00 KM. Da li vi ostajete pri tome?

AKIF FAZLIĆ - općinski načelnik

Ja ostajem pri ovom prijedlogu od 90,00 KM.

ALAN ŠERAK - vijećnik SDP-a

Vezano za mišljenje Komisije za statut i propise - i prije sam govorio da oni treba da budu stručno radno tijelo, da nam daju stručna mišljenja na bazi zakonitosti Odluka i akata koje mi ovdje usvajamo. Oni su opet izašli iz svojih okvira i počeli se baviti politikom što ne treba da bude slučaj. Politikom se bave vijećnici Općinskog vijeća Ilijaš zajedno sa izvršnom vlasti. Akif Fazlić načelnik je nešto predložio i mi ćemo zauzeti stav po tom pitanju. Zamolit ću vas predsjedavajuća, vi vjerovatno sjedite na tim komisijama.

ALMA OMEROVIĆ - predsjedavajuća

Nisam bila na ovoj sjednici Komisije, moram priznati.

ALAN ŠERAK - vijećnik SDP-a

Zamoliti ću vas predsjedavajuća, ubuduće, skrenite im pažnju neka se bave strukom, a malo manje politikom, jer oni nisu obrazovni, imenovani u to radno tijelo da bi se bavili politikom.

ADNAN ABADŽIJA - vijećnik NIP-a

Član 3. kaže da se u ovim zonama, IV, V i VI građevinskog zemljišta umanjuje za 50% za stambene objekte. Postavio bih pitanje načelniku, zašto samo u ove tri zone se umanjuje 50% za izgradnju individualnih stambenih objekata, a u zonama gdje naši građani grade, I, II i III, šta je sa tom cijenom, koliki je iznos tu i zašto su samo ove tri obuhvaćene?

ALEN HASKOVIĆ - vijećnik SDA-a

Ja zaista imam potrebu da istaknem činjenicu da izgradnja apartmanskih naselja i vikend objekata nije tretirana ovim umanjnjem od 50%. Znači, bazna cijena uređenja građevinskog zemljišta ostaje početna i ne umanjuje se dok naši građani prilikom izgradnje individualnih stambenih objekata kreću sa umanjnjem baznom cijenom za 50% u IV, V i VI zoni građevinskog zemljišta

ALMIR ŠPIODIĆ - vijećnik NIP-a (replika)

Zaista je za pohvaliti ovu Odluku i kažem mudra politička odluka i potpuno bih se složio sa konstatacijom kolege Haskovića. Pohvalo je to da za apartmanska naselja ostaje ista građevinska dozvola, ali isto tako vodeći se činjenicom da su dosadašnje građevinske dozvole bile previše skupe za naše građane. Ja sam imao dosta primjedbi građana, s tim da se u tom kontekstu koliko se plati građevinska dozvola, ne dobije se potrebna infrastruktura tipa vode, struje, puta itd. Mislim da je ovo realno i da možda u nekom periodu vidjeti, građenja će biti sve manje i manje, da se ova cijena još smanji.

AKIF FAZLIĆ - općinski načelnik

Vi znate da smo mi jedno vrijeme bili u sistemu od I do VI zone i uveli ovdje sebi I zonu, a onda je nastao problem kod rješavanja pitanja legalizacije, jer legalizacija i donošenje



naknadnih urbanističkih i građevinskih, dodatno se plaća, pa u I zoni to su ogromne cifre i znale su biti po 15.000,00 do 20.000,00 KM. Tako da smo riješili taj problem da smo mi sad opet od III do VI zone i time napravili puno povoljniji položaj i tim ljudima koji su u nekom procesu legalizacije ili će biti u okviru legalizacije. Ove tri zone, a imamo četiri zone na području Općine Ilijaš smo izdvojili i dali im taj popust 50% što oni jesu na periferiji. Dakle, uređenje građevinskog zemljišta se ne tretira u ovim zonama kao što je to renta, nego stepenom opremljenosti tog prostora i zbog toga da bi dali povoljnost ljudima gdje ipak zona IV, V i VI je manje atraktivna i da bi, evo neko je spominjao, podržali, pospješili i omogućili neke povoljnije cijene našim građanima, investitorima, ovdje je zadržan taj prijedlog. Ovdje, strogi centar grada koji tretira ovu I zonu, zaista je najatraktivniji i to se treba platiti i zbog toga je izašla ova vrsta prijedloga.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o visini bazne cijene za određivanje naknade za uređenje građevinskog zemljišta na području općine Ilijaš za 2021. godinu

#### AD-11

Prijedlog Odluke o utvrđivanju prosječne konačne građevinske cijene 1 m<sup>2</sup> korisne stambene površine u stambenoj izgradnji na području općine Ilijaš za 2021. godinu

AKIF FAZLIĆ - općinski načelnik

Obzirom da ima dosta novih vijećnika, pa možda nisu ili jesu upratili naše prethodne Odluke. Dakle, u ovoj Odluci smo išli na nekih 10% sniženja ove osnovne cijene za obračun. Prošle godine je bila 1100,00 KM, a sada smo predložili 1000,00 KM što znači 10% niže cijene za rentu. Dakle, evo još jedna povoljnost u ovoj godini kada je u pitanju plaćanje građevinskih dozvola.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o utvrđivanju prosječne konačne građevinske cijene 1 m<sup>2</sup> korisne stambene površine u stambenoj izgradnji na području općine Ilijaš za 2021. godinu

#### AD-12

Prijedlog Odluke o izmjeni i dopuni Odluke o potvrđivanju rezultata izbora za predsjednika i članove Savjeta mjesnih zajednica na području Općine Ilijaš

ADNAN ABADŽIJA - vijećnik NIP-a

Predložio je pauzu od pet minuta.

ALMA OMEROVIĆ - predsjedavajuća

Prije nego što počnemo sa uvodnim izlaganjem pauzu od deset minuta (od 17:30-17:40h).

SANJA ZAGORAC-JOZIĆ - pomoćnica načelnika

Razmatramo Prijedlog Odluke o izmjeni i dopuni Odluke o potvrđivanju rezultata izbora za predsjednika i članove Savjeta mjesnih zajednica na području Općine Ilijaš. Izbori za

predsjednike i članove Savjeta mjesnih zajednica na području Općine Ilijaš provedeni su 2019. godine. Prije provođenja procedure izbora koju je radila Općinska izborna komisija Ilijaš, Općinsko vijeće Ilijaš je usvojilo Odluku o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova savjeta mjesnih zajednica. Članom 10. stav 2. i 3. te Odluke definisano je da je nespojiva funkcija Općinskog vijećnika i uposlenika Općine Ilijaš sa funkcijom predsjednika, odnosno člana savjeta mjesne zajednice. Također istom Odlukom članom 15. definisan je način popunjavanja tih mjesta u slučaju prijevremenog isteka mandata tako da je definisano da u slučaju prijevremenog isteka mandata predsjednika savjeta mjesne zajednice, njegovu poziciju popunjava slijedeći kandidat, odnosno sa kandidacijske liste kandidat na rednom mjestu broj dva, a mjesto upražnjeno za člana savjeta mjesne zajednice popunjava se na način da aktuelni savjeti mjesnih zajednica dostavljaju prijedlog za novog člana uvažavajući teritorijalnu, spolnu i nacionalnu zastupljenost, ukoliko je to moguće. Znači, princip bi trebao biti takav da, ako je neko sa jedne podružnice, prijevremeni istek mandata, izašao iz jedne podružnice, da se sa te podružnice da prijedlog za novog člana savjeta. Mi smo nakon završenih lokalnih izbora i objave zvaničnih rezultata 15. decembra u Službi za društvene djelatnosti i poslove mjesnih zajednica, zaprimili ostavke tri vijećnika koji su dobili mandat u Općinskom vijeću Ilijaš i to iz Savjeta MZ Ilijaš Grad na mjesto predsjednika i člana savjeta i na mjestu predsjednika Savjeta MZ Dragoradi, a isto tako dobili smo ostavku člana Savjeta MZ Misoča koji je dobio posao u organu uprave u državnoj službi. Zbog nespojivosti funkcija, mi smo dobili prijedlog aktuelnih savjeta za nove članove savjeta koji su vama dati u prijedlogu Odluke o izmjeni i dopuni Odluke o potvrđivanju rezultata izbora za predsjednika i članove Savjeta mjesnih zajednica na području Općine Ilijaš. Prijedlog ovog akta je razmatrala Komisija za statut i propise i nije imala primjedbi na pravni osnov i pravno-tehničku usklađenost akta, Također pozitivno mišljenje na prijedlog ovog akta dala je i Komisija za poslove mjesnih zajednica i saradnju sa drugim općinama i gradovima.

ALMIR ŠPIODIĆ - vijećnik NIP-a

Vi ste rekli da na osnovu Odluke koju je donijelo Općinsko vijeće, ne mogu se sjetiti koji ste rekli član, predsjednik ili članove savjeta mjesnih zajednica koji odustanu od mandata, oni predlažu druge članove u savjet. Da li je taj način izbora demokratski? To je jedno pitanje. Spominjali ste da je Komisija za statut i propise razmatrala ovaj akt i nije imala niti jednu primjedbu. U članu 86. Statuta Općine Ilijaš piše: ukoliko prestane mandat člana savjeta zbog ostavke ili nekog drugog razloga, popuna se vrši sa liste kandidata koji su dobili najveći broj glasova na izborima. Vi ste sada u nove Savjete uključili ljude koji nisu bili učesnici na izborima. Da li je ovim načinom, a to sam upozoravao prilikom donošenja ove Odluke o načinu izbora i kandidovanja predsjednika i članova savjeta mjesnih zajednica, ovom današnjom Odlukom, grubo je prekršen član 86. Statuta Općine Ilijaš u kojem stoji ovaj način kako se može popuniti Savjet? Iz tog razloga sam pokretao onu svoju inicijativu na početku sjednice. Ovaj način kako ste vi proveli, mislim, nemam ništa protiv ljudi koji ušli u Vijeće i koji su proveli način prijedloga drugih kandidata, oni su postupili po Odluci koju je donijelo Općinsko vijeće i oni su uradili onako kako smo im mi naložili odnosno Odluka Općinskog vijeća. Međutim, interesantno je da Komisija za statut i propise, možda nije čitala do kraja Statut Općine Ilijaš član 86., jer na kraju se kaže ukoliko prestane mandat članovima Savjeta zbog ostavke ili nekog drugog razloga, popuna se vrši sa liste kandidata koji su dobili najveći broj glasova na izborima. Vi ste u Savjete uveli ljude koji nisu birani voljom građana. Nisu bili ni na kakvim listama. Da li je ovaj način demokratski? Pretpostavljam da bi se neko od kolega mogao javiti kao, jeste demokratski

ili nije demokratski. Nije problem podržati ovu Odluku, nije problem glasati, evo čisto da bi Savjeti MZ-a funkcionisali ubuduće. Ali, ukazujem vam na potrebu izmjene Odluke o načinu kandidovanja i izbora predsjednika i članova savjeta mjesnih zajednica. I kada se donosila ova Odluka, ukazivao sam na ovaj problem i tačno ovako vam i pretpostavio. Načelnik mi je tada rekao zbog političkog građenja predsjednika mjesnih zajednica, on želi da to razdvoji. Neću ulaziti lično u svoj slučaj gdje je uzeto moje ljudsko pravo da se kandidujem, da budem uopće kandidat na izborima. Znači, to je kršenja svih međunarodnih ljudskih prava, konvencija itd. Ja samo želim da potenciram ponovo član 86. Statuta Općine Ilijaš čisto da ga svi dobro zapamtimo koji kaže: "Ukoliko prestane mandat člana savjeta zbog ostavke ili nekog drugog razloga, popuna se vrši sa liste kandidata koji su dobili najveći broj glasova na izborima". Nemojte mi odgovoriti samo da ima Odluka Općinskog vijeća. Ako ima Odluka Općinskog vijeća, ona mora biti usklađena sa Statutom Općine Ilijaš, jer Odluke Općinskog vijeća ne mogu biti mimo Statuta i propisa koje nam nalaže Ustav Federacije BiH, Zakon o principima jedinica lokalne samouprave, itd. Ne možemo mi donositi Odluke koje poništavaju ljudska prava, poništavaju demokratski način izbora članova i predsjednika savjeta mjesnih zajednica. Znači, na samu Odluku, na sam način kako su to provele kolege koje su dobile mandat u Općinskom vijeću, jedino što bih pitao, da li ste vi u Službi dobili neki zapisnik gdje ste rekli tamo da će se članovi Savjeta dogovoriti ko je taj drugi čovjek koji ulazi u savjet mjesne zajednice. Da li imate napisмено tu Odluku i koja je po redu bila sjednica i volio bih da vidim ako postoji taj Zapisnik sa te sjednice gdje je donesena Odluka da se popune ova imena. Samo još jednom da ponovim, nemam ništa protiv ovih ljudi i da neko ne bi pomislio da govorim ovo lično. Pričam samo o kršenju Statuta Općine Ilijaš i pričam o greški koju je napravio prethodni saziv Općinskog vijeća. Naravno, tada sam prepoznao i uvidio ovaj problem i nisam glasao za tu Odluku, upozoravao sam i molio kolege da ne glasaju za Odluku. Međutim, čini mi se, da je politička moć nad ljudima imala više uticaja nego sam razum.

ALAN ŠERAK – vijećnik SDP-a

Tek sada vidimo pogubnost donošenja onakve vrste Odluke, odnosno Pravilnika o načinu izbora savjeta mjesnih zajednica koji je bio u prošlom sazivu. I tada smo upozoravali, umjesto da idemo u depolitizaciju mjesnih zajednica kao osnovne ćelije gdje se biraju određeni predstavnici određenih podružnica koji bi trebalo da budu predstavničko tijelo građana na najnižem nivou, da rješavaju određene probleme, došli smo u situaciju da stranke delegiraju svoje prijedloge za savjete mjesnih zajednica i onda se na bazi stranačkih imena pristupilo glasanju i došli smo do toga da imamo upotpunosti stranačke savjete mjesnih zajednica. Još veći problem jeste da smo sada dobili određena imena i mi treba da popunimo Savjet, jer su ljudi iz opravdanih razloga napustili rad u savjetima mjesnih zajednica prihvativši mandat općinskog vijećnika za ovaj manddatni period. Ono što me posebno zanima jeste kako i na koji način su Savjeti došli do ovih imena kojim oni žele da popune te savjete? Čime su se rukovodili da baš oni budu ti, a posebno onaj dio koj istoji u Pravilniku i kaže da bi trebalo da bude višenacionalnog karaktera ukoliko postoje te vrste mogućnosti. Postoje, ali nažalost, ovdje ih u Prijedlogu nemamo. Ja ovdje opet čitam imena nekih Hrvata Stranke demokratske akcije koje sad mi treba ovdje da podržimo da oni uđu u Savjet, a to im je omogućio onaj Pravilnik, nažalost. Kao legalista, to je tako. Druga stvar, vezano za ovo što je kolega Špiodić govorio, mi u narednom period moramo da uskladimo taj Pravilnik sa našim Statutom. Statut je viši pravni akt kojeg mi treba da poštujemo i svi akti ispod Statuta trebaju da budu usklađeni sa istim. Ja ću ovdje predložiti Zaključak kojim ćemo zadužiti nadležnu službu da nam napravi novi Pravilnik u

neko dogledno vrijeme, možemo se dogovoriti koje, gdje ćemo uskladiti naš Pravilnik o načinu izbora savjeta mjesnih zajednica sa članom 86. Statuta Općine Ilijaš. Dakle, te se stvari jednostavno moraju riješiti. U suprotnom, ako ovaj Pravilnik ili neko ko je učestvovao u izborima, podnese Sudu da rješava ove stvari, onda će nam Sud naložiti da to moramo uraditi, pa onda ulazimo u neki pravni vakum. Smatram da ne trebamo ići u tom pravcu. Ovi Savjeti, neka su ih popunili kako su ih popunili, a tebe ću Sanja zamoliti da nam obrazložiš da li imaš informaciju kako su došli do ovih imena? Ovdje evo, Ilijaš Grad, zadirat ću lično, ali znam o čemu se radi. Neko se ovdje rukovodio da neko ima 50,00 KM po sjednici. Ne možemo toliko biti lični ljudi. Stvarno ne možemo, a posebno onaj dio koji se odnosi na višenacionalni karakter. Pa ako išta, u Ilijaš Gradu smo mogli da ispoštujemo tu priču. I ne mora on biti član niti jedne strane, neka nije ničiji član, ali dajte da zadovoljimo tu odredbu Pravilnika. Ja toliko, a tebe Sanja zamolit ću, ako imaš tu informaciju, da podijeliš sa nama.

ALEMA DŽAFO – vijećnica NIP-a (replika)

Ne samo da se nije vodilo računa o nacionalnim manjinama, nego se nije vodilo računa ni o ravnopravnosti spolova. Znači, na ove tri liste, koliko sam mogla vidjeti, imamo samo jednu ženu. Znači, samim tim to nije ispoštovano. Druga stvar, način na koji se birala zamjena za ove članove koji su morali istupiti, nema nikakvog smisla. Znači, možda su ovdje stavljena pojedina imena za koje ljudi da su znali da će se ta imena naći, nikada ne bi glasali za ovu listu. Ipak su članovi mjesne zajednice produžena ruka građana i ćelija lokalne zajednice i smatram da ovaj način izbora nema smisla i da mora naći neki drugi način, da li ponovnim izborima, ili čim, ne znam.

ALMIR ŠPIODIĆ – vijećnik NIP-a (replika)

Zaista je divno slušati jednu mladu osobu koja razmišlja racionalno i onako kako bi to trebalo da bude. Međutim, gospođice Alema, nažalost, vaše razmišljanje koliko god da je ispravno, on neće naići na razumijevanje većine kolega ovdje koji će opet postupiti po nečijem naređenju, a ne po takvom i sličnom razmišljanju. Ja ti zaista, kao mladoj osobi, čestitam na promišljanju, koja je uvidjela da je mjesna zajednica prva distance gdje se ljudi trebaju javiti, da je mjesna zajednica prvi centar za iznošenje mišljenja, problema i predlaganje rješenja za građane. Građanima zaista znači mjesna zajednica i dužni smo je, na neki način, vratiti građanima. Nadovezat ću se na ovo što je kolega Šerak govorio, mi podhitno moramo ovo uraditi, a ako ne uradimo, pretpostavljam da ćemo u nekom roku imati tematsku sjednicu ili tačku dnevnog reda po pitanju referendum koje smo danas pokrenuli, grupa vijećnika, nas jedanaest, jer ovo je gorući problem koji se tiče direktno građana. Mi ćemo danas, na osnovu ovih prijedloga, evo izglasat, ili vi, izglasat ćemo zajedno i to je najmanji problem. Imena koja ste vi predložili, ova imena koja trebaju da budu na predispoziciji građanima neće biti, zato što njih nisu birali građani. Njih smo izabrali danas mi. S kojim pravom, danas mi, u ovoj toploj sali, ugodnoj atmosferi, udobnim foteljama biramo nekome nekoga u Dragoradima, cijeneći da je kolega Denis Dilberović izabrao najmoralniju, najčestitiju, najugledniju, najbolju osobu itd. Isto tako, cijeneći da je kolega Hasić izabrao, ili Kenan Buza izabrao, najbolje ljude koji će predstavljati i čuvati njihov obraz. Međutim, to nije demokratski da mi biramo ljude kojima bi se "sutra" trebali građani obraćati za rješavanje nekih problema. Ako zaista mislite da je ovo demokratski, recite. Ja vam čestitam. Za mene ovo nije demokratija. Zaista ovdje ima mladih i pametnih ljudi koji mogu razumjeti na način kako je to uradila gospođica Alema. Alema čestitam ti na diskusiji.

#### MUHAMED HANDŽIĆ – vijećnik SBB-a (replika)

Ne znam šta je, replika ili diskusija, ali evo neka bude replika kolegi, vjerovatno će on mene razumjeti. Dakle, iako je replika, ja se upotpunosti slažem sa diskusijama skoro svih kolega prethodnika i kolegica naravno, svaka čast za lijepo razmišljanje, ali moramo istaći jednu napomenu. Ima, dakle vas sviju tu u ovim prošlim mjesnim zajednicama, u ovoj Odluci. Znači, ima i sa lijeve i sa desne strane, tako da ste se vi sada svi izmješali i mi ne znamo ko je ko. Kolega Buza je tamo bio član Savjeta i on je dobio zamjenu, Dilberović isto tako. Samo mene i Akifa ovdje nema i Šeraka i njegovih. Da se fokusiram na ovaj problem. Dakle, ovo nije način demokratije, ovo što je kolega Špiodić već pomenuo i kolega Šerak. Ovo nije način na koji se trebaju birati Savjeti mjesnih zajednica koja je najniži nivo vlasti. Ja ću navesti primjer, u mojoj zajednici gdje ja živim, niko ne zna ni ko mu je predsjednik podružnice, eto znamo slučajno ko je predsjednik savjeta mjesne zajednice, a ko predstavlja ono malo gore naroda, veze niko nema vjerujte. Najviše se obraćaju meni, a ja nisam ništa. Ja sam samo vijećnik. I šta god treba, oni mene pitaju, a ja ne znam koga bih pitao, jer ne znam ko nas predstavlja. Dakle, mora se pristupiti sistematično i da se riješi, ali definitivno da se riješi Odluka o načinu provođenja izbora u mjesnim zajednicama, da se riješi Pravilnik o provođenju izbora i izboru savjeta mjesnih zajednica i da mi to uradimo u skladu sa svim važećim propisima i zakonima. Naravno da je narušeno ovde niz propisa i zakona, i o ljudskim pravima, Izbornog zakona i svašta nešto. To je u jednom momentu urađeno radi mene i ja sam to prepoznao. Ali vidite, suština je u ovome – obzirom da uskoro treba da usvojimo Budžet, mi ćemo zajedno napraviti prijedlog za novi Pravilnik da ovo što prije promijenimo, dajte da omogućimo ovim ljudima da rade i da rade savjeti mjesnih zajednica do njihove promjene. Znači, dok ih mi ne promijenimo. Predlažem da ovu Odluku danas usvojimo, neka ona ide i neka ljudi rade na takav način kako su zamijenjeni, a da mi to u narednom periodu uradimo u skladu sa zakonom.

#### ALMIR ŠPIODIĆ – vijećnik NIP-a (replika)

Po pitanju ove tačke dnevnog reda, upotpunosti se slažem i ja sa diskusijom kolege Handžića i on sa mojom diskusijom i neupitno je, mi trebamo ovu Odluku usvojiti i zbog građana ovakvu kakva jeste, mislim dopunu Odluke. Međutim, definitivno, ako već kolega Handžić naglašava, zaista ima potrebe da se ovo mijenja i mislim da ima dovoljno političke pameti i snage da mi ovu Odluku u narednom periodu promijenimo, pa čak možda i da poništimo izbore predsjednika i članova savjeta mjesnih zajednica. Ne zbog njih lično, ili njihovog nekakvog nerada, oni to nama neće zamjeriti, nego će i oni željeti da se vratimo demoratičnijem načinu izbora predsjednika i članova savjeta mjesnih zajednica. Rekli ste da ste vi neutralni ovdje, mislim da u politici vrlo teško je biti neutralan i da u politici nema neutralnih. Govorim kolegi Handžiću, vrlo je teško ostati neutralan. Ono što je ispravno treba reći i ja cijenim da ste vi to uradili kroz ovu diskusiju, a i ono što nije ispravno takođe treba reći, dužni smo sa svake strane, i moralne itd.

#### ALAN ŠERAK – vijećnik SDP-a (replika)

Na fonu ove dvije prethodne diskusije, moram samo kratak osvrt, vraća nam se izgleda kolega Handžić, onaj stari Handžić u pravom izvornom smislu i drago mi je svakako. Dakle, mi ovdje sada treba da dogovorimo način, do kada da damo rok da dobijemo novi Pravilnik. Po meni je to 60 dana i više nego dovoljno, pa da damo i nadležnoj Službi

mogućnost da vidi kakva su iskustva drugih lokalnih zajednica i tako te stvari, pa da dođemo do novog Pravilnika onako kako treba i da se kanimo politizacije mjesnih zajednica ljudi, stvarno. Druga stvar, pozivate nas da podržimo ovo. Možemo i ne moramo. Po meni je logičnije da se ova Odluka vrati, doradi u skladu sa ovim važećim ne Statutarnim Pravilnikom po pitanju i Gendera i nacionalne strukture, a možemo je i podržati, evo neka rade narednih mjesec-dva dana, a onda da pristupimo sistemskom rješavanju pitanja mjesnih zajednica na području Općine Ilijaš. Jedna od naših budućih inicijativa će svakako biti reorganizacija mjesnih zajednica, jer mi imamo i više nego potrebno izjašnjenje određenih dijelova naše općine gdje ljudi traže da imaju svoju mjesnu zajednicu, jer su na neki način pripojeni jednoj, a imaju određene prirodne granice između te dvije mjesne zajednice, pa čak šta više nemaju ni iste običaje ljudi.

ALMA OMEROVIĆ – predsjedavajuća

Kolega Šerak, izvinite što vas prekidam, ali da se držimo ove Odluke, a svakao ćemo sva ta pitanja i na Kolegij staviti u formi zaključka ili bilo šta, samo da diskutujemo u ovoj formi i repliciramo, a sve inicijative da ostavimo nekom drugom prilikom.

ALAN ŠERAK – vijećnik SDP-a (replika)

Da završimo, obzirom da je 18:05 h, a ja sam imao nijet da mi radimo večeras do 24:00h, pa vidjet ćemo da li ćemo ispoštovati. Dakle, zamolit ću još jednom Sanju da nam kaže čime se ova gospoda rukovodila da nam predlože ova imena da im popunimo ove Savjete u ovom obliku kako su oni predložili, ništa više.

ALMIR ŠPIODIĆ – vijećnik NIP-a (replika)

U većini slučajeva bih se složio sa kolegom Šerakom, spominjete da bi mi trebali, odnosno kako ste rekli, da nam neko pripremi taj Pravilnik, pa da ga mi usvojimo ovdje na način kako je usvojena ova Odluka. Ja bih svakako predložio, na osnovu ove Odluke, koju možda i usvojimo, ako nam Sanja dadne validna obrazloženja ovo što je Šerak tražio, a i ja, da li postoje Zapisnici sa sjednica gdje su na sjednicama jednoglasno ili većinom glasova usvojeni prijedlozi da dođu ta i ta imena u savjete mjesnih zajednica. Znači, kažem, imamo pokrenut pitanje raspravljanja oko referenduma mjesnih zajednica i mislim da bi u roku od 60 dana svakako trebali imati jednu tematsku sjednicu po pitanju mjesnih zajednica i da se svi maksimalno uključimo da jednom ovaj problem riješimo i da ga vratimo na pravi put.

ADNAN ABADŽIJA – vijećnik NIP-a

Ja nemam ništa protiv imena koja su predložena, ali kršenjem Statuta Općine Ilijaš, dovodite nas u situaciju da donesemo neku Odluku koja je vanstatutarna. Želio bih da predložim da u novi Pravilnik o izboru članova savjeta mjesnih zajednica, ne ovako kako se desilo ovdje, u ovom slučaju popunjavanje novih ljudi, ne ni na onaj način kako je to bilo odrađen zadnji put, da se ljudi ipak poredaju na jednu listu i onda da ljudi koji žele i hoće da rade u mjesnoj zajednici, u lokalnoj zajednici, da kažemo na samom startu, da budu pružena ruka građanima, da sazivaju, osim sastanaka savjeta mjesne zajednice, da sazovu ljude na sastanke da im oni iznesu svoje prijedloge, a ne ono što kolega Handžić kaže, traže nas da mi na Vijeće iznosimo neke detalje koji su za mjesnu zajednicu. Prošli put se pravila lista od pet ljudi i nije se razmišljalo o tome da li će nekad neko ispod

crte ući u to "tijelo" da radi. Po meni, ja nemam ništa protiv da sada izglasamo ovu Odluku, ali da ona bude privremenog karaktera, dok se ne dogovorimo drugačije, ukoliko evo bude prijedlog Šeraka da bude novi Pravilnik o izboru u savjet mjesnih zajednica gdje bi jako dobro bilo da bude ispoštovan Gender i da u svakom savjetu mjesne zajednice imamo po jednu žensku osobu, kao što je slučaju u Savjetu MZ Mrakovo.

SANJA ZAGORAC-JOŽIĆ – pomoćnica načelnika

Zahvaljujem se na svim upućenim pitanjima i zaista mogu vam reći da 80% dijelim mišljenje sa vama. Jedino što ne mogu prihvatiti jeste kolega Almir da je ovo bio ne demokratski pristup, jer ova Odluka upravo demantuje to što vi tvrdite da je nekome uskraćeno pravo da se kandiduje. Evo kolege su bile u Savjetima i bili predsjednici Savjeta, kandidovali se, osvojili mandate u Vijeću i evo sada ih razrješavamo i dopunjavamo novim članovima. Da li je to riješeno u skladu sa Statutom Općine Ilijaš, očigledno da nije. Ja sam bila vrlo malo uključena, iako sam rukovodilac Službe, u donošenju ove Odluke o uslovima i načinu kandidiranja, provođenju izbora i potvrđivanju mandata koja je donesena 2019. godine, ali mislim da je ovdje pravo rješenje da se na kandidacijsku listu koja je sada imala pet kandidata, da ona ima deset kandidata, kao što i vi na listama za Vijeće imate 30 ili 35 kandidata, a 25 se vijećnika bira. Pod tim da pozicije od 6-10 budu zamjenski članovi i da svi ti ljudi prođu demokratsku proceduru, da se malo znoje pred biračim mjestima, da idu u kampanju i to sve. To je vjerujte i potpuno moje mišljenje. Šta je dobra stvar u ovome svemu? Da je ova Odluka zaista promjenljiva. Znači, ona se donosi pred svake izbore u mjesnim zajednicama i sada kada bi mi uporedili ovu Odluku donesenu 2019. godine sa onom Odlukom iz 2014. godine, isto kao da ne pričamo o istoj materiji. A šta nas je ponukalo da idemo u ovom pravcu? Vi ste kolega Špiodić bili predsjednik Savjeta mjesne zajednice Podlugovi i vi znate kolika je oblast te mjesne samouprave u Ilijašu bila zapuštena, koliko smo mi imali ne funkcionalne Savjete. Kada smo imali kandidacijske liste sa imenima, pa oni koj osvoje najveći broj glasova uđu u Savjet, pa mu se nešto ne sviđa "moja frizura ili moje ime", pa ne dolazi sa sastanke Savjeta. Ovakve liste su upravo predložene i naravno bila je svima data mogućnost i grupama građana i političkim subjektima da kandiduju svoje prijedloge. Znači, da onaj koji je na čelu te liste ima tim od još četiri čovjeka u koje može da vjeruje da će raditi, da će se odazvati pozivima i to je pokazalo ove dvije godine da ovi Savjeti dobro funkcionišu. Mi, kao Služba, smo zaprimili zvanične prijedloge za popunu imena. Znači, Savjeti su zasjedali, donijeli Odluku i mi imamo zvaničan protokolisan dokument koji je došao u Službu. Baviti se time kako su oni došli, ja nemam taj mandat istraživački, da istražujem zašto je neko predložio nekoga i da uopšte spominjem imena i da licitiram da ne dovedem u nezgodnu situaciju ove predložene ljude. Ali kažem, zahvaljujući možda mišljenju vašem, Akifovom, Muhamedovom, koji su dugo u Vijeću i prate rad mjesnih zajednica, možete uporediti da zaista u posljednje dvije godine smo izraziti iskorak napravili u ovoj oblasti. To potvrđuje i drugi krug UNDP-ovog projekta jačanje uloge mjesnih zajednica, da je Ilijaš ušao u nekoj kandidaturi sa 140 općina u BiH, da smo mi ušli u taj neki uski krug od 20-ak općina da nam je potvrđeno da još naših novih pet mjesnih zajednica ulaze, da će one biti prvo kapaciteti ljudski u tim savjetima podignuti, da će ne biti opremljene, da ćemo realizovati neke infrastrukturne projekte na teritorijama tih novih mjesnih zajednica, da mi po prvi put imamo situaciju da sve mjesne zajednice imaju donesene Statute, da mi dobivamo zapisnike sa svih sjednica, da se isplata vrši na osnovu evidencije prisustva tim sjednicama, a ne onako što se nekome dopada ili ne dopada, ali uvijek može bolje. I apsolutno se slažem, šta god ovo Vijeće donese, ako nam da rok od 60 dana mi promijenimo ovu Odluku, uskladimo sa Statutom, to znači da moramo poništiti rezultate

izbora i provesti nove izbore. Prvi put smo imali situaciju da Općinska izborna komisija provodi izbore. Znači, stalno to dižemo na neki viši nivo, što ne znači da opet ovo može bolje i treba bolje. Ja vas sve pozivam da nam pomognete da to bude bolje. Odluka je naša. Vi znate Muhamede kada ste tražili mišljenje CIK-a o tome da li je vama uskraćeno pravo da možete biti vijećnik i član Savjeta da vam je CIK otprilike odgovorio u smislu da je to Odluka Općinskog vijeća i da oni ne ulaze u meritum i neće se miješati. Znači, naša je Odluka i mi možemo diktirati kriterije uslove. Da li na kandidacijskim listama da moraju biti dvije žene, da mora biti dvoje mladih do 30 godina. Sve je to do nas. Ovdje šta se mi dogovorimo, stavimo na papir i to potvrdimo i onda će se tako izbori provesti. Sad kažem, do vas je da li ćete vi sada prekinuti mandate aktuelnih Savjeta i da li ćete obezbijediti većinu da to uradite, to već izlazi iz naših okvira. Mi smo administrativna, tehnička podrška da na papir stavimo ono što ovo Vijeće bude od nas zahtijevalo.

ALMA OMEROVIĆ – predsjedavajuća

Zahvaljujem se na ovakvom obrazloženju i odgovorima. Dala sam mogućnost za diskusije i za sve i svakao sam htjela za kraj da kažem da, nako vašeg izlaganja, mi je drago da savjeti mjesnih zajednica funkcionišu, da uvijek može bolje i na fonu diskusije koje su kolege govorili, svakako da i Pravilnik možemo popraviti kako bi to još bilo bolje i podignuto na veći nivo. Obzirom da sam prethodno zatvorila diskusiju, dajem tačku na glasanje.

ALAN ŠERAK – vijećnik SDP-a

Predlažem zaključak: "Zadužuje se nadležna općinska Služba da u roku od 60 dana pripremi novi prijedlog Odluke o načinu izbora u mjesnim zajednicama, možete ugraditi ovaj dio gdje ste rekli deset ljudi, da preciziramo da Savjet mora da čine odgovarajući broj manje zastupljenog spola i po mogućnosti ljudi drugih nacija".

ALMA OMEROVIĆ – predsjedavajuća

Dala je na glasanje predloženi Zaključak.

Općinsko vijeće je glasalo sa 12 glasova ZA, 8 PROTIV i 3 UZDRŽANA.

Konstavovano je da predloženi Zaključak nije dobio potrebnu većinu.

Zatim je Općinsko vijeće, većinom glasova donijelo

Odluku o izmjeni i dopuni Odluke o potvrđivanju rezultata izbora za predsjednika i članove Savjeta mjesnih zajednica na području Općine Ilijaš

AD-13

Prijedlog Odluke o davanju saglasnosti za zaključenje Anex-a Ugovora o kreditnoj liniji uz regresiranje ukupne kamatne stope (profitne marže) u 2020. godini,  
br:01/2-11-1510/20 od 30.07.2020. godine

Pauza od 18:15-18:25h.

MERIMA OSMANOVIĆ - pomoćnica načelnika



Općinsko vijeće u prošlom sazivu donijelo je Odluku kojom je data saglasnost općinskom načelniku da može pristupiti zaključivanju Ugovora sa BBI bankom za regresiranje kamata za kredite. Ovom zaljučivanju Ugovora je prethodio Javni poziv na osnovu čega je Općina Ilijaš odabrala BBI banku, kao najpovoljnijeg ponuđača za plasiranje kredita privrednim subjektima, fizičkim licima, odnosno obrtnicima. Općina Ilijaš u Budžetu prošle godine za 2020.godinu izdvojila je sredstva u iznosu od 100.000,00 KM za regresiranje kamata svim privrednicima. Fizičkim licima je bilo omogućeno da podignu kredite, s tim da je Općina Ilijaš iz ovog izdvojenog iznosa regresirala kamate. Postupak odabira, odnosno plasiranja kredita vršila je BBI banka po određenim uslovima. Maksimalni iznos kredita koji su mogli privredni subjekti da podignu iznosio je 300.000,00 KM, odnosno 50.000,00 KM za fizička lica, odnosno obrtnike. Kako ste vidjeli u prijedlogu Odluke iskorišteno je negdje cca 50% ovih sredstava. Dakle, cca 50.000,00 KM, tačniji iznos je 57.842,00 KM, ostalo je neutrošeno oko 42.150, 00 KM. Znači, ovim prijedlogom Odluke daje se saglasnost općinskom načelniku da zaključi Ugovor sa BBI bankom za 2020. godinu za ova preostala sredstva da bi privrednici mogli iskoristiti u novom ciklusu kreditiranja za svoje potrebe.

SEID BEKTIĆ - vijećnik SDA

Ja bih da podržim ovu Odluku, jer dolazim iz realnog sektora i treba finansijska "injekcija" privatnicima, odnosno firmama koje posluju u vrijeme pandemije sa smanjenim kapacitetima i da se, u jednu "ruku", radnici ne otpuštaju, a da i dalje budu konkurentni na tržištu.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluke o davanju saglasnosti za zaključenje Anex-a Ugovora o kreditnoj liniji uz regresiranje ukupne kamatne stope (profitne marže) u 2020. godini,  
br:01/2-11-1510/20 od 30.07.2020. godine

AD-14

Prijedlog Odluke o povjeravanju vršenja poslova Pravobranilaštva Kantona Sarajevo za 2021. godinu

NIZAMA MALIŠEVIĆ - pomoćnica načelnika

Kada se tiče usvajanju Odluke o povjeravanju vršenja poslova Pravobranilaštva Kantona Sarajevo za 2021. godinu ništa se novo nije desilo u odnosu na prethodne godine. Znači, u okviru jedinice lokalne samouprave ne postoji općinsko Pravobranilaštvo, pa Općina Ilijaš shodno Zakonu o pravobranilaštvu KS poslove zastupanja povjerava Kantonalnom pravobranilaštvu. Dakle, pravni osnov za donošenje ove Odluke, jeste Zakon o pravobranilaštvu KS, Statut Općine Ilijaš i Poslovnik o radu Općinskog vijeća Ilijaš. Članom 47. Zakona o pravobranilaštvu KS je propisano da Općinsko vijeće može vršenje poslova Pravobranilaštva povjeriti Pravobranilaštvu KS gdje je takođe definisano da se sredstva za angažovanje pravobranilaštva osiguravaju u Budžetu općine. To vam ovdje govori i član 3. predložene Odluke, gdje se kaže da se u mjesečnim anuitetima 2000,00 KM osigurava u Budžetu Općine, Pravobranilaštvu KS u svrhu zastupanja Općine Ilijaš u svim postupcima pred sudovima. Obaveze Pravobranilaštva su propisane Zakonom o pravobranilaštvu u svim postupcima, pred svim organima da štite interes i prava Općine Ilijaš i imaju obavezu izvještavanja Općinskog vijeća o svom radu. Izvještaj Pravobranilaštva KS svake godine treba da bude dostavljan najkasnije do 31. marta, što

znači na aprilskoj sjednici Općinskog vijeća bude na razmatranju. Dalje ne bih obrazlagala ovu Odluku i smatram da nema potrebe da ne bude usvojena, jer mi smo u situaciji da moramo poslove zastupanja povjeriti Pravobranilaštvu KS sve dok ne budemo imali svoje Pravobranilaštvo.

ALAN ŠERAK - vijećnik SDP-a

Naravno da mi moramo imati Pravobranilaštvo da nas zastupa pred nadležnim sudovima i smatram da je ovo dobar model u biti i da nas manje košta nego da mi imamo svog pravobranioca općine koji bi nas znatno više koštao. Ono što mene zanima jeste da li je došlo do izmjene Pravobranilaštva u KS, odnosno da oni nisu zamijenili svoje Pravobranilaštvo, a ako nisu zamolit ću vas za informaciju koliko sporova se trenutno vodi protiv općine, a na bazi toga da smo prethodno pribavili njihovo mišljenje kako i na koji način da radimo, da li su nam oni na neki način pogrešno dali tumačenje određenih zakonskih akata, pa se sada protiv nas vode određeni sporovi.

VERNESA BEŠLIJA - vijećnica NIP-a

Ja se ne slažem sa kolegom Šerakom i ja baš mislim da bi smo trebali razmotriti mogućnost općinskog Pravobranilašta i čak mislim da je prije nekoliko godina bilo govora o tome i da ne znam zbog čega je prekinuto. Danas smo na dnevnom redu imali Program rada OV-a i vidjeli smo da je u aprilu planiran Izvještaj o radu Pravobranilaštva KS i mislim da je nezahvalno sada dati saglasnost na Odluku za 2021. godinu kada nemamo uvid u rad Pravobranilaštva KS za 2020. godinu i pitam se da li je taj pravobranioc ispunio sva naša očekivanja i imamo informacije da mnogo predmeta koje je zastupao, riješeno u korist druge strane, a na štetu Općine Ilijaš. Zato mislim da bi se trebala razmotriti mogućnost općinskog Pravobranilaštva, jer i druge općine u KS imaju svoje, evo i susjedna općina Vogošća.

ALMIR ŠPIODIĆ - vijećnik NIP-a

Ja bih se složio sa diskusijom kolegice Vernese. Mislim da je u proteklom periodu zaista malo sporova koje je općina dobila kada je neko tužio općinu, općinski organ. S druge strane, mislim da bi naš pravobranioc, uposlenik Općine Ilijaš ili kako se to već zakonski reguliše, puno više vodio računa o tome i puno bolje bi zastupao Općinu Ilijaš i interese općine. Ako bude, po onom Izvještaju koji smo imali u prethodnom periodu, čini mi se da ima jedna tužba privrednog subjekta prema Općini Ilijaš, to će zaista biti poražavajuće i za Pravobranilaštvo i za općinu Ilijaš, ukoliko ta tužba bude zaista u mogućnosti da se sprovede.

ALAN ŠERAK - vijećnik SDP-a (replika)

Ja sam ovdje gledao ekonomičnost poslovanja organa uprave. Jeftinije nas dođe ovaj način. Njih je gore malo više, jer to rade određene advokatske kuće. S druge strane, ne možemo kriviti Pravobranilaštvo za određene izgubljene sporove iz razloga, jer za dosta stvari naša lokalna zajednica ne pribavlja mišljenja Pravobranilaštva, već ide sama svojim putem. Kad god je nešto šakljivo nikad ga neće pribaviti, već će krenuti svojim putem i onda tu dođe do određenih sporova i onda Pravobranilaštvo brani što se braniti da. To je činjenica. Jeli tako? Imate niz nekih stvari koje su urađene, a da prethodno nisu

pribavljena mišljenja Pravobranilaštva KS. O tome se radi. A sada ovdje uvesti pravobranioca da radi u stalnom radnom odnosu. OK, ali onda morete znati da će nas to puno, puno više koštati nego 2000,00 KM mjesečno.

NIZAMA MALIŠEVIĆ - pomoćnica načelnika

Ja bih samo kratko odgovorila na pitanje gospodina Šeraka kada je u pitanju Izvještaj, odnosno Informacija o zastupanju Općine Ilijaš od strane Pravobranilaštva KS i o stanju spisa. Na sjednici Općinskog vijeća, mislim u oktobru ili u septembru, imali smo na dnevnom redu Izvještaj o radu Pravobranilaštva, u materijalima dostavljen, gdje je detaljno obrazložen svaki od tih, kako ćete vi nazvati "škakljivih" predmeta za općinu Ilijaš. Tako da ja ne bih komentarisala kada je u pitanju Izvještaj o radu Pravobranilaštva KS i stanje spisa, jer ga samo pravobranioc, odnosno zamjenik pravobranioca u postupajućem predmetu zna. Općina Ilijaš, naročito Služba za imovinsko-pravne poslove u svojoj saradnji sa Pravobranilaštvom postupa redovno, agilno, u svim predmetima gdje je potrebno da se traži mišljenje Pravobranilaštva, zatraži se mišljenje i ni jedan predmet, ja govorim u pogledu Službe ispred koje dolazim, u kojem je potrebno pribaviti mišljenje, ne ide u proceduru bez pribavljenog mišljenja Pravobranilaštva KS. To je jedna stvar, a druga stvar, kada je u pitanju osnivanje općinskog Pravobranilaštva, svi znamo da vam ja trenutno odgovor ne mogu dati, znate na koji način se to stavlja u funkciju.

ALAN ŠERAK - vijećnik SDP-a

Samo još pitanje, da li je došlo do promjene na kantonalnom nivou?

NIZAMA MALIŠEVIĆ - pomoćnica načelnika

U toku prošle godine, kantonalno Pravobranilaštvo je popunjeno određenim brojem uposlenika, a kantonalni pravobranioc, prema mojoj zadnjoj informaciji koju ja imam je i dalje Kemal Karić.

ALAN ŠERAK - vijećnik SDP-a

Još jedno pitanje. Da li smo nekada dobili njihovo mišljenje, a da nije bilo baš povoljno za nas?

NIZAMA MALIŠEVIĆ - pomoćnica načelnika

Ja vam mogu reći za ovu posljednju godinu kako sam ja pomoćnik načelnika, svako mišljenje koje je došlo sa rezervom od strane Kantonalnog pravobranilaštva, postupilo se u skladu sa dostavljenim mišljenjem i nastavio se i dalje voditi postupak upravo onako kako je Kantonalno pravobranilaštvo predložilo.

Diskutanata po ovoj tački dnevnog reda više nije bili, pa je OV-e većinom glasova donijelo

Odluku o povjeravanju vršenja poslova  
Pravobranilaštva Kantona Sarajevo za 2021. godinu

#### AD-15

### Prijedlog Odluke o prestanku važenja Odluke o neposrednoj pogodbi za prodaju neizgrađenog građevinskog zemljišta

NIZAMA MALIŠEVIĆ - pomoćnica načelnika

Općinsko vijeće Ilijaš je na sjednici 26.07.2016. godine donijelo Odluku o neposrednoj pogodbi, odnosno dozvolilo prodaju neposrednom pogodbom građevinskog zemljišta označenog kao 257/62 K.O. Donja Vogošća u ukupnoj površini 491 m<sup>2</sup>. Ta neposredna pogodba trebala je da se realizuje između Općine Ilijaš i "Superior" d.o.o. Dakle, firma koja firma koja posluje u Industrijskoj zoni Luka. U momentu donošenja Odluke, Superior group je izvršio, prethodno, kupovinu građevinske parcele u svrhu čijeg oblikovanja je i donesena ova Odluka i dozvoljena neposredna pogodba ovih 400 i nešto m<sup>2</sup>. Od momenta donošenja Odluke do momenta današnje sjednice Superior gruoup d.o.o., nije izvršio prethodni uslov koji je morao izvršiti, a to je upis prava vlasništva u Zemljišnoj knjizi na osnovnoj građevinskoj parceli koja se oblikuje. To je jedan od osnovnih razloga poništenja ove Odluke, a drugi razlog za poništenje ove Odluke jeste što je, u međuvremenu, katastarska općina Ilijaš Grad bila dijelom projekta registracije nekretnina gdje su podaci katastarskog operata preuzeti u Zemljišnu knjigu i ovaj podatak koji se odnosi na broj katastarske čestice 257/62 K.O. Donja Vogošća je preuzimanjem podataka iz katastarskog operata zamijenjen i uspostavljen je Zemljišno knjižni ulošak na bazi podataka novog premjera i ta čestica sada ima oznaku 965/8 K.O. Ilijaš Grad. Iz tog razloga je, ova Odluka ovakva kakva je donesena, neprovođiva kroz Zemljišnu knjigu i ona ne može imati pravne posljedice. Dakle, da bi stvorili prohodnost za formiranje ove građevinske parcele i njeno privođenje krajnjoj namjeni i u pogledu vlasničko pravnih odnosa i u pogledu same građevinske parcele i privođenja krajnje namjene u pogledu građenja, mi smo ovu Odluku morali staviti van snage. Dakle, to je razlog zbog čega se ona stavlja van snage.

U prethodnih pet godina nisu bile plaćene naknade i rente koje je Superior group imao obavezu da plati u postupku izdavanja građevinske dozvole, prema općini Ilijaš. U mjesecu januaru Superior group je izvršio uplatu svih naknada, nakon čega je njegov otpisak izvornika, odnosno ugovor, predate nadležnoj poreznoj upravi, Superior group platio porez, međutim, nije se još uknjižio u Zemljišnoj knjizi, a što mu je preduslov da bi ova Odluka mogla biti provedena.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluke o prestanku važenja Odluke o neposrednoj pogodbi za prodaju neizgrađenog građevinskog zemljišta

#### AD-16

### Prijedlog Odluke o utvrđivanju raspona cijena za neizgrađeno građevinsko zemljište prema zonama građevinskog zemljišta u općini Ilijaš za 2021. godinu

NIZAMA MALIŠEVIĆ – pomoćnica načelnika

Pravni osnov za donošenje Odluke o rasponu cijena za neizgrađeno građevinsko zemljište predstavlja Zakon o principima lokalne samouprave Federacije BiH, Zakon o građevinskom zemljištu Federacije BiH, Zakon o prostornom uređenju KS, Statut Općine

Ilijaš, Poslovnik o radu Općinskog vijeća Ilijaš i Odluka o građevinskom zemljištu Općine Ilijaš. Kada su u pitanju zakonske osnove, ne bih posebno obrazlagala svaki član temeljem kojeg je donesena ova Odluka. Međutim, ono što nas zanima jeste Odluka o građevinskom zemljištu Općine Ilijaš koju je usvojilo ovo Općinsko vijeće gdje je članom 10. stav 1. Propisano da isto ovo Vijeće mora donijeti, odnosno treba da donese posebnu Odluku kojom se uređuje raspon cijena za neizgrađeno građevinsko zemljište prema zonama građevinskog zemljišta I ta Odluka treba da bude donesena najkasnije do 31. Januara za tekuću godinu. Ove godine, redovna sjednica se nije desila do 31. Januara i zato je prolongirana na današnji datum. Članom 42. Iste Odluke o građevinskom zemljištu je određeno da se građevinsko zemljište dijeli na četiri zone na području Općine Ilijaš. Inače, građevinsko zemljište se prema Zakonu dijeli na najviše šest zona s tim što je ovom Odlukom o građevinskom zemljištu definisano da na području Općine Ilijaš imamo četiri zone građevinskog zemljišta i to III, IV, V i VI zona. Članom 1. su razrađene cijene građevinskog zemljišta gdje je definisano da je za zonu III, kao i u Odluci o rasponu cijena prošle godine, stav za III zonu je osta isti od 80,00-100,00 KM po 1m<sup>2</sup> površine, zona IV i zona V isti raspon cijena kao i prošle godine, a imamo malu promjenu kada je u pitanju zona VI, a zona VI vam predstavlja kompletan gornji kraj kako volite čuti i reći, a ja ne volim. Dakle, zona VI, tu smo prošle godine imali raspon cijena od 5-20,00 KM, a ove godine je raspon cijena od 3-20,00 KM. Razlog za smanjenje ovog raspona cijena, odnosno za smanjenje sa 5 na 3 jeste slijedeći: sve više smo u situaciji da ovaj gornji dio općine postaje vidljiv, postaje atraktivan, postaje dostupan. Izlaganjem podataka na javni uvid imamo situaciju da gornji kraj imamo priliku vidjeti i na "Geoportalu", a Komisija za procjenu vrijednosti nepokretnosti i prava čiji sam i ja član, često je u situaciji, ne često nego vrlo često, da su nam Ugovori kojima je ostvarena kupoprodaja na ovom dijelu zemljišta na gornjem kraju bude dobro niže ispod 5 KM. Uglavnom, ako se radi o onim rubnim dijelovima općine koji graniče posebno gore prema Općini Vogošća, kada su u pitanju Tihovska brda, vjerujte da imamo puno Ugovora, a nismo u prilici da spustimo procjenu vrijednosti ispod 5 KM, a realno gledajući, ne vrijedi toliko. Zato smo smanjili ove godine ovaj raspon cijena od 3-20 KM, što nam je normalno u ovom urbanijem dijelu gornjeg kraja cijena takva. Predlažem vam da usvojite ovu Odluku. Naša je i obaveza Općinskog vijeća da je usvojimo do 31. januara, eto sada sa danjašnjim danom da bude usvojene, jer ova Odluka o rasponu cijena je osnov za raspolaganje imovinom općine i građevinskim zemljištem.

ADNAN ABADŽIJA – vijećnik NIP-a

Ja bih postavio jedno pitanje. Raspon je dosta velik. Evo zona IV od 40-80 KM. Ne znam zbog čega je ovoliki raspon? Ako možete da mi pojasnite, da li se to odnosi na udaljenost objekata gdje se grade itd.

NIZAMA MALIŠEVIĆ – pomoćnica načelnika

Poštovani gospodine Abadžija, ukoliko ste imali priliku da pogledate Odluku o građevinskom zemljištu Općine Ilijaš i podjelu na zone građevinskog zemljišta Općine Ilijaš, onda bi ste shvatili ovaj veliki raspon cijena u zoni IV. Znači, zona IV nam predstavlja kompletno zemljište uz regionalnu cestu, od ulaza iz Visokog u Općinu Ilijaš, zatim zemljište uz auto-put, ovaj ravni dio Ljubnića, Kadarića, Balibegovića, pa do Misoče Gornje gdje se ne mogu porediti lokacije zemljišta uz regional i recimo zemljište kod Sarajevoputeva u Misoči. Moramo imati veliki raspon. Dakle, položaj, udaljenost, prema Zakonu o građevinskom zemljištu i Zakonu o prostornom planiranju, određen je način kako

se formiraju zone zemljišta i šta sve utiče na cijenu zemljišta u jednoj zoni.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o utvrđivanju raspona cijena za neizgrađeno građevinsko zemljište prema zonama građevinskog zemljišta u općini Ilijaš za 2021. godinu

AD-17

Prijedlog Odluke o neposrednoj pogodbi za prodaju neizgrađenog građevinskog zemljišta k.č.br. 760/25 Srednje

NIZAMA MALIŠEVIĆ – pomoćnica načelnika

U konkretnom slučaju radi se o pravnom osnovu Zakona o stvarnim pravima član 363. koji nam daje mogućnost da pristupimo neposrednoj pogodbi neizgrađenog građevinskog zemljišta kada su za to prethodno ispunjeni uslovi. U predmetnom postupku, gospođa Vuković Vitomirka, obratila se Općini Ilijaš sa zahtjevom za regulisanje imovinsko-pravnih odnosa na parceli 760/25 K.O. Srednje, po kulturi ostalo neplodno zemljište, u površini od 323 m<sup>2</sup>. Predmetna parcela 760/25 neposredno graniči sa parcelom koja je vlasništvo gospođe Vuković Vitomirke upisana i u katastarskoj evidenciji i zemljišno knjižnoj evidenciji tako da je gospođa imala osnov da traži da joj putem neposredne pogodbe Općina Ilijaš proda predmetnu nekretninu. U postupku rješavanja imovinsko-pravnih odnosa, Služba je pribavila izvod iz prostorno-planske dokumentacije gdje je temeljem Regulacionog plana Srednje utvrđeno da parcela vlasništvo gospođe Vuković Vitomirke i parcela koja je predmetom ove Odluke čine jednu građevinsku parcelu, što je preduslov za postupanje ovakve vrste u ovom predmetu. Ovdje ne postoje zakonske smetnje, gospođa Vuković ima parcelu u svom vlasništvu i to je preduslov za donošenje ovakve Odluke. Gledajući kao prostorno plansku cjelinu, parcela koja je općinsko vlasništvo i parcela koja je privatno vlasništvo, čine jednu građevinsku cjelinu. Prema tome, nema smetnji za regulisanje imovinsko-pravnih odnosa u ovakvom smislu.

ALMIR ŠPIODIĆ – vijećnik NIP-a

Ma ništa.

ALMA OMEROVIĆ - predsjedavajuća

Molim vas, uozbiljite se, radimo. Nizama je tu i poštujemo njeno vrijeme.

NIZAMA MALIŠEVIĆ – pomoćnica načelnika

Gospodine Špiodiću postajete neozbiljni. Molim vas, postavite pitanje, da vam mogu odgovoriti.

ALMIR ŠPIODIĆ – vijećnik NIP-a

Nije u pitanju postavljanje pitanja, već sam samo htio da čestitam kupovinu vlasniku ove parcele.

NIZAMA MALIŠEVIĆ – pomoćnica načelnika

To je jako neozbiljno gospodine.

ALMA OMEROVIĆ – predsjedavajuća

Diskutanata po ovoj tački dnevnog reda više nije bilo, pa je OV-e većinom glasova donijelo

Odluku o neposrednoj pogodbi za prodaju neizgrađenog građevinskog zemljišta k.č.br.  
760/25 Srednje

AD-18

Prijedlog Rješenja iz imovinsko-pravne oblasti,  
broj: 06/1-27-3414/20 od 22.01.2021. godine

Diskutanata po ovoj tački dnevnog reda nije bilo, pa je OV-e većinom glasova donijelo

Rješenje iz imovinsko-pravne oblasti,  
broj: 06/1-27-3414/20 od 22.01.2021. godine

AD-19

Informacija Službe Civilne zaštite o protivminskim akcijama i mjerama zaštite i spašavanja  
za 2020 godinu

JASMIN ŠUVALIJA – stručni saradnik operativnog centra i koordinator za deminiranje u  
Službi civilne zaštite

Služba CZ u protekloj godini je ažurirala podatke o planskoj dokumentaciji. Ostvarila je dobre rezultate sa Kantonalnom upravom CZ, sa Zavodom za izgradnju KS o stanju klizišta i sa Agencijom za vodno područje slivova rijeke Save, kao i sa BH MAC-om gdje smo ostvarili rezultate u 2020. godini dogovorili deminiranje rejona Kozlovca u površini od 2 miliona m<sup>2</sup>, a to je dio zaštićene zone Bijambara. Ostali projekti su predloženi. Ostaje na donatorima i organima uprave Federalne i oružanih snaga da nam izađu u susret da se ova lokacija uzme u razmatranje za deminiranje. Prikupljanje NUS-a i MES-a u protekloj godini ovdje imamo navedeno za čitavu godinu gdje je Federalna uprava CZ izlazila na lice mjesta i uklonila te ili uništila na licu mjesta ubojna sredstva.

ALAN ŠERAK – vijećnik SDP-a

Jasmine, zamolit ću te samo da mi pojasniš koja vrsta opremanja COVID ambulante u Semizovcu je bila u pitanju?

JASMIN ŠUVALIJA - stručni saradnik operativnog centra i koordinator za deminiranje u  
Službi civilne zaštite

Učestvovanje u COVID ambulanti Općine Ilijaš i Općine Vogošća je bila u donacijama za dva kontejnera i zajedno sa timovima koji su gore radili iz Općine Ilijaš. Pošto je štab u martu prošle godine, kada je imao nadležnost za COVID virus, je sve COVID timove opremio sa opremom. Poslije toga, nadležnost je Zavoda za zdravstvo KS da vodi tu akciju. Znači dva kontejnera koja su gore, učestvovali smo i ovdje kontejner za ambulantu.

ALAN ŠERAK – vijećnik SDP-a

Mene konkretno zanima Semizovac iz razloga da li će ta oprema biti vraćena našoj općini, jer Semizovac nije u sklopu Doma zdravlja Ilijaš.

JASMIN ŠUVALIJA - stručni saradnik operativnog centra i koordinator za deminiranje u Službi civilne zaštite

Kanton Sarajevo je zajedno na svim općinama rekao gdje da se formiraju COVID ambulante, tako da mi nismo imali uticaja na to, a samo smo morali pomoći sredstvima direktno kroz Dom zdravlja Ilijaš (opremanje timova).

ALAN ŠERAK – vijećnik SDP-a

Uredu, razumijem taj dio. Međutim, smatram da smo mi ipak trebali obavezati DZ Vogošća, da se nakon pandemije ta sredstva vrate nama, a ne da ostanu vlasništvo općine Vogošća. O tome se radi.

JASMIN ŠUVALIJA - stručni saradnik operativnog centra i koordinator za deminiranje u Službi civilne zaštite

Sredstva koja su više potrošna sredstva i oprema koja se u tom momentu koristi, nije za povrat. Kontejner je donacija firme Bosmal.

ALMA OMEROVIĆ – predsjedavajuća

Kolega Jasmine, ako dozvolite Alane, evo replika na ono što ste diskutovali. Čini mi se kada je bio generalni direktor Domova zdravlja Kantona Sarajevo, ni jedna općina ne polaže pravo na to, i to Domovi zdravlja KS, ustvari COVID ambulantom ne raspolaže i ne upravlja ni Općina Vogošća ni Općina Ilijaš, nego je to donirano COVID ambulantama koje su organizovane u sklopu Domova zdravlja KS, odnosno njihova je nadležnost. Znači, to je bila donacija. Prisustvovala sam sastanku kada je bio generalni direktor DZ KS i ja sam bar tako razumjela.

JASMIN ŠUVALIJA - stručni saradnik operativnog centra i koordinator za deminiranje u Službi civilne zaštite

Bili smo dužni pomoći u sredstvima koja smo imali.

ALMA OMEROVIĆ – predsjedavajuća

I naši građani su išli u tu COVID ambulantu.

ALAN ŠERAK – vijećnik SDP-a

Naravno, nije to sporno, pomagali smo i pomagat ćemo, ali samo se bojim da se ne zloupotrijebe ta sredstva, pa da završe negdje gdje ne bi trebalo, a vlasništvo su Općine Ilijaš. Dakle, praksa jeste. Evo vam primjer kod mene u firmi gdje smo jedan kamion dodijelili "Radu" koje je kantonalno preduzeće, ali taj "Rad" nema pravo da se taj kamion



voza po Starom Gradu, isključivo u Ilijašu. O tome ja pričam. Dakle, trebali smo na neki način zaštititi našu imovinu. Dali smo vam kontejnere, koristit ćete iste, kad se sva priča završi, mi te kontejnere možemo iskoristiti u neke druge svrhe. O tome se radi.

JASMIN ŠUVALIJA - stručni saradnik operativnog centra i koordinator za deminiranje u Službi civilne zaštite

Kontejneri nisu naše vlasništvo. Znači, bili su dodijeljeni Općini Ilijaš kroz donaciju firme Bosmal i mi smo ih ustupili.

ALAN ŠERAK – vijećnik SDP-a

Vratili ste ih njima.

JASMIN ŠUVALIJA - stručni saradnik operativnog centra i koordinator za deminiranje u Službi civilne zaštite

Jeste.

ADNAN ABADŽIJA – vijećnik NIP-a

Pitao bih samo da li CZ kontroliše obilježena mjesta minskih polja i da li se znakovi koji vremenom možda nestanu ili se unište što je jako opasno, da li se to kontroliše i kao i da li se vrši zamjena tih oštećenih znakova?

JASMIN ŠUVALIJA – stručni saradnik operativnog centra i koordinator za deminiranje u Službi civilne zaštite

Svim mjestima koja su rizična na području Općine Ilijaš i inače upravlja BH MAC. Svi znakovi koji se postave na bilo kojim mjestima u rizičnim zonama numerišu se, ali isključivo od BH MAC-a. Mi samo možemo zahtjeve dostaviti da je to područje, ili otuđeno ili znak oštećen da bi oni reagovali, jer se lokacijski postavlja i GPS-om se snima svaki položaj znaka. Znači isključivo BH MAC ima nadležnost za postavljanjem i kontrolisanjem teritorije koja je rizična ili se vodi kao rizična.

ADNAN ABADŽIJA – vijećnik NIP-a

Za pohvalu je to. Evo imam situaciju u Srednjem, gdje iznad naselja Srednje, lijeva strana, jako je opasno da djeca tu idu i ti znakovi se, da kažem, sklone, i jako je rizično. Pohvalio bih vaš rad, a u suštini CZ bi to trebala ipak nekada da obiđe i da sugeriše BH MAC-u.

ALAN ŠERAK – vijećnik SDP-a

Generalno, zadovoljan sam radom naše CZ i moram reći da smo mi, kao općinski krizni štab koji je oformljen kada je počeo sav ovaj "zulum" vezano za ovu pandemiju, mi smo na adekvatan način uspjeli odgovoriti na svu ovu priču imajući u vidu oskudna sredstva kojima smo raspolagali. Lično smatram da smo bolje određene stvari radili, nego neke gradske općine na Kantonu Sarajevo iako oni imaju više sredstava na raspolaganju nego mi. Ja se nadam da ćemo nastaviti ovim tempom i samo bih vas zamolio obzirom da

nisam moga da vidim u ovom tabelarnom prikazu, da li znate kolika je površina zagađena minama trenutno na području Općine Ilijaš?

JASMIN ŠUVALIJA – stručni saradnik operativnog centra i koordinator za deminiranje u Službi civilne zaštite

Na području Općine Ilijaš imamo cca 8% zagađenosti teritorije. Prošle godine, oružane snage su radile novi pregled gdje su se neke teritorije na području Crne Rijeke isključile iz sumnjive površine iz razloga što su ih ljudi koristili više godina i tako se ta teritorija poslije korištenja i obrađivanja tretira. Znači cca 8% teritorije Općine Ilijaš je zagađeno minama.

ALMA OMEROVIĆ – predsjedavajuća

Na kraju da i ja čestitam uposlenicima CZ-e.

Diskutanata po ovoj tački dnevnog reda više nije bilo, pa je OV-e primilo k znanju

Informaciju Službe Civilne zaštite o protivminskim akcijama i mjerama zaštite i spašavanja  
za 2020 godinu

Nakon što je iscrpljen dnevni red, predsjedavajuća Alma Omerović zaključila je 2. sjednicu Općinskog vijeća Ilijaš u 19:00h.

Zapisničar:  
Maida Habibović

PREDSJEDAVAJUĆA  
OPĆINSKOG VIJEĆA ILIJAŠ  
Alma Omerović, BA nov.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE, d.d. Sarajevo: 1602000000710645  
e-mail [ov@ilijas.ba](mailto:ov@ilijas.ba)  
certifikat: CRO20794Q

